



Basehan nga Kurso sang Partido

Ikatio nga Libro

Ang Partido

***Ang mga Dokumento sang Ikaduha
nga Dungganon nga Kahublagaan
sa Pagpanadlong***

Kaundan

Ang Partido

- I. **Mga Sandigan nga Kinaiya sang Marxista-Leninista nga Partido**
- II. **Ang Partido Komunista sang Pilipinas**
- III. **Ang Kasaysayan sang Partido Komunista sang Pilipinas**

Ang mga Dokumento sang Ikaduha nga Dunganon nga Kahublagaan sa Pagpanadlong

Ang Partido

Pangbukas

Ginatudlo sang kasaysayan nga kon ang proletaryado wala sang kaugalingon nga partido pangpulitika nga naarmasan sang pinakaabanse nga rebolusyonaryo nga teorya, bisan san-o indi mapasulong ang makasahi nga paghimakas sini sa husto nga direksyon kag indi maagom ang basehan nga pagbag-o sa iya pusisyon nga ginahimuslan kag ginapigos sa katilingban.

Sadtong mga panahon nga ginatukod pa lang ang kahublagaan sang mamumugon, gintum-ok na nanday Marx kag Engels ang kinahanglanon sang independyente nga partido pangpulitika sang proletaryado kadungan ang pag-arms sini sang pinakaabanse nga rebolusyonaryo nga teorya. Ini ang isa ka malahalon nga leksyon nga nakuha nila halin sa nauna nga mga eksperyensya sa paghimakas sang masa nga mamumugon. Gin-athag nila nga makahulag lamang ang proletaryado bilang isa ka sahi paagi sa pagtukod sini sang isa ka ispesyal nga partido pangpulitika nga kabanggi sang tanan nga mga partido sang mga sahi nga nagapanghimulos kag nagapigos.

Paagi sa partido mapangibabawan ang pagkakitid kag pag-atras-abante sang ispontanyo nga mga paghimakas sang proletaryado kag mapasaka ang lebel sang mga ini pakadto sa muklat kag militante nga pagsakdag sa makasahi nga interes sang proletaryado. Nagaserbi nga instrumento ini sang banggianay sang mga sahi agud hugpungon ang bilog nga sahi nga mamumugon sa idalum sang isa ka komun nga programa sa pulitika nga ang pundamental nga katuyuan amo ang pag-agaw sang gahum pangpulitika.

Tama kamalahalon para sa tagsa ka katapu sang Partido ang paghakos sa pangkabilugan nga mga kinaiya sang isa ka Marxista-Leninista nga partido, subong man ang mga prinsipyo, mga katungdanan, organisasyon kag kasaysayan sang Partido Komunista sang Pilipinas. Kadungan sini ang lubos nga pagpamatok sa ano man nga buko nga magpasulod sa partido sang indi-rebolusyonaryo nga mga panan-awan kag

polisiya agud paluyahon kag waskon ini, ukon himuon ini nga isa ka partido sang pagpakighimbon sa sahi.

Malahalon ang mga kinaalam nga ini sa pagtuman sang tagsa ka katapu sa mga katungdanan sa pagtukod sa ideolohiya, sa pulitika kag sa organisasyon sang Partido. Halin diri kag paagi sa padayon nga pagtuon kag praktika, mapasangkad kag mapadalum pa sang kada isa ang iya paghangup nahanungod sa Partido, kag sa kadungan nga mga katungdanan sa pagtukod sini.

Natunga ang topiko sa tatlo ka bahin: Ang basehan nga mga kinaiya sang isa ka Marxista-Leninista-Maoista nga partido, Ang Partido Komunista sang Pilipinas, kag Kasaysayan sang Partido Komunista sang Pilipinas.

I. Mga Basehan nga Kinaiya sang Marxista-Leninista-Maoista nga Partido

1. Ano ang Marxista-Leninista-Maoista nga partido?

Ang Marxista-Leninista-Maoista nga partido amo ang partido pangpulitika sang proletaryado. Ini ang nagapamuno sa mga rebolusyonaryo nga paghimakas sang sahi nga mamumugon kag iban pa nga sahi nga ginahimuslan kag ginapigos agud agawon ang gahum pang-estado, dag-on ang paghimakas para sa pungsudnon nga kahilwayan kag demokrasya, tukuron ang diktadurya sang proletaryado agud lubos nga lutuson ang sistema nga kapitalismo, kag tayuyon nga isulong ang sosyalista nga rebolusyon kag konstruksyon tubtob sa maagom ang komunismo.

Ang Marxista-Leninista-Maoista nga partido nakabase sa mga rebolusyonaryo nga prinsipyo nga ginlatag nanday Marx kag Engels, kag labi pa nga ginpauswag nanday Lenin, Stalin, Mao kag iban pa nga dungganon nga mga lider Komunista. Matungdan sang partido nga ini ang papel sang pagpamuno sa rebolusyonaryo nga kahublagan bangud naarmasan ini sang abanse nga rebolusyonaryo nga teorya kag muklat nga nagabantay kag nagapamatok sa lain-lain nga dagway sang suhetibismo, rebisyunismo kag oportunismo.

Pangkabilugan nga katungdanan sang Marxista-Leninista-Maoista nga partido nga isahon ang bilog nga sahi nga mamumugon sa idalum sang

isa ka komun nga programa pangpulitika nga ang sentral nga katuyuan amo ang pag-agaw sa gahum pangpulitika.

Ginabase sang Marxista-Leninista-Maoista nga partido ang iya estratehiya kag taktika sa tagsa ka halintang sang rebolusyonaryo nga paghimakas sang proletaryado sa: una, husto nga pag-analisa sa lebel sang pag-uswag sang katilingban nga ginaluntaran sini kag, ikaduha, husto nga pag-analisa sa relasyon sang mga sahi sang amo nga katilingban, agud matumod ang prinsipal nga kaaway kag mahabig ang tanan nga posible nga alyado batok sa prinsipal nga kaaway.

2. Ngaa taliba ukon abanse nga ditatsment sang proletaryado ang Marxista-Leninista-Maoista nga partido?

Bilang partido pangpulitika sang proletaryado, ang Marxista-Leninista nga partido ang pinuno pangpulitika sang sahi nga mamumugon kag yara sa unahan sang rebolusyonaryo nga kahublagaan. Bilang pinuno pangpulitika, ginapasaka sini ang lebel sang masa halin sa mga ispontanyo nga pagpamatok sa pagpanghimulos kag pagpamigos pakadto sa lebel sang muklat nga pagsakdag sa makasahi nga interes sang proletaryado.

Bilang taliba, ang partido ginabug-os sang mga pinakaabanse nga elemento sang sahi nga mamumugon. Diri nakakonsentrar ang ila mga eksperyensya, rebolusyonaryo nga diwa, kag indi maki-kaugalingon nga pagbuhos sang tanan sa katuyuan sang proletaryado. Ginabaton man nga katapu sini ang sin-o man nga naghalin sa iban nga sahi nga handa maghakos sa interes sang proletaryado kag bayaan ang interes sang iya sahi nga ginhalinan.

Taliba sang sahi nga mamumugon ang Marxista-Leninista-Maoista nga partido bangud ini naarmasan sang rebolusyonaryo nga teorya, nga nagaubay sa pagpamuno sa rebolusyonaryo nga kahublagaan. Marxismo-Leninismo-Maoismo ang rebolusyonaryo nga teorya sang proletaryo nga partido.

Ang Partido Komunista sang Pilipinas ang taliba sang proletaryado nga Pilipino. Ini ang nagapamuno kag yara sa unahan sang subong nga demokratiko nga rebolusyon sang banwa. Ini naarmasan sang Marxismo-Leninismo-Maoismo, nga ginahatagan sang pungsudnon nga dagway sa teorya kag praktika sang subong nga halintang sang rebolusyon Pilipino. Ang Partido padayon nga nagabaskog sa tunga sang rebolusyonaryo nga paghimakas sang pumuluyong Pilipino. Ginabug-os ini sang pinakamauswag nga mga elemento sang mamumugon nga Pilipino, upod

na sang iban nga sahi nga anakbalhas kag ginahimuslan, nga ginpanday kag padayon nga ginapanday sa rebolusyonaryo nga paghimakas.

3. Ngaa pinakamataas nga porma sang organisasyon sang proletaryado ang Marxista-Leninista-Maoista nga partido?

Ang Partido ang pinakamataas nga porma sang organisasyon sang proletaryado kag permi nga may hugot nga angtanay sa malapad nga masa. Yara sa pusisyon ini agud italana kag ipatuman ang husto nga linya kag direksyon sang paghulag nga nagasakop kag nagaubay sa iban pa nga mga organisasyon sang proletaryado kag sang iban nga mga sahi nga ginahimuslan kag ginapigos. Gani, hugot nga nagaangot ang Partido sa malapad nga masa, ginaisa sila, kag maka-ubay sa ila pakadto sa husto nga rebolusyonaryo nga banas.

Bangud ang Partido naarmasan sang rebolusyonaryo nga teorya, ginabug-os sang pinakaabanse nga mga elemento sang proletaryado, kag nagapamuno kag yara sa unahan sang rebolusyon, pinasahi ini sa iban nga organisasyon sang mamumugon pareho sang unyon kag kooperatiba.

Sa pulitika, pinakamataas nga porma ini sang organisasyon sang pangpulitika nga pagpamuno nga nagasakop sa bug-os nga rebolusyonaryo nga kahublagan. Sa ideolohiya, pinakamataas nga porma ini sang organisasyon nga taga-bandera sang Marxismo-Leninismo-Maoismo nga pinakamauswagon nga panan-awan sang rebolusyonaryo nga proletaryado. Sa organisasyon, pinakamataas nga porma ini sang organisasyon nga ginabug-os sang pinakamauswagon nga mga mamumugon kag iban pa halin sa mga sahi nga anakbalhas kag pigos.

Wala nagakahulugan nga elitista ang Partido bangud ini ang pinakamataas nga porma sang organisasyon sang proletaryado; sa pagkamatuod, permi hugot ang angtanay sini sa malapad nga masa. Ang husto nga pagpamuno sa rebolusyonaryo nga kahublagan kag ang praktikal nga pagpamuno sa mga pangmasa nga paghimakas matungdan lamang, kag ginapalig-on pa, sa hugot nga pag-angtanay sang Partido kag malapad nga masa.

Ang mga yunit sang Partido nga nakabase sa lugar sang trabaho kag puluy-an sang masa kag yara sa tunga sang ila rebolusyonaryo nga paghulag isa ka kapat-uran sang hugot nga angot sang Partido sa malapad nga masa sang pumulujo.

4. Ngaa organisado nga ditatsment sang proletaryado ang Marxista-Leninista-Maoista nga partido?

Indi lamang abanse nga ditatsment sang proletaryado ang Marxista-Leninista nga partido kundi isa ini ka organisado nga ditatsment. Buot silingon, ini isa ka sistema sang organisasyon sa diin ang tanan nga mga katapu sini napunpon sa isa lang ka komun nga ditatsment kag nahugpong paagi sa paghiliusa sa desisyon kag paghiliusa sa paghulag para sa katumanan sang rebolusyonaryo nga mga katuyuan.

Ang Partido isa ka bilog nga sistema sang organisasyon nga may ara isa lang ka sentro nga nagadumala sa mga hilikuton. May ara ini sang manubo kag mataas nga mga organo, nga nagaandar santo sa prinsipyo sang demokratiko sentralismo. May epektibidad sa tanan nga katapu ang mga disisyon sini.

Ang Partido indi isa ka haluga nga organisasyon. Organisado ini sa pinakahugot nga pamaagi nga kinahanglan sa isa ka partido nga nagapamuno sa kabuhi-kag-kamatayon nga paghimakas batok sa mga sahi nga nagapanghimulos kag nagahari. May paghiliusa ini sa pamensaron kag buhat. May disiplina nga muklat kag pareho sang salsalon katig-a, nga nagahugpong sa tanan nga katapu sa mga disisyon nga nabilog matapos ang maid-id nga talakayan, mga banggianay kag sawayanay.

Indi bisan san-o magtabo sa subong sini nga ispiritu sang Partido ang pagluntad sang mga paksyon, nga nagakahulugan nga may madamo nga sentro sa sulod sang Partido. Kag ang pagluntad sang madamo nga sentro nagakahulugan sang kawawad-an sang isa lang ka sentro para sa tanan, sang pagkawasak sang paghiliusa sa pamensaron kag buhat, sang paghuyang kag pagkabungkag sang disiplina.

5. Ngaa ang Marxista-Leninista-Maoista nga partido ang nagatiglawas sa hugot nga angtanay sang proletaryado kag sang iban pa nga sahi nga ginahimuslan kag ginapigos?

Lubos nga ginasakdag sang Marxista-Leninista nga partido ang interes sang iban pa nga sahi nga ginahimuslan kag ginapigos kag ginapakigsumpong ang ila kahilwayan. Indi maagom sang proletaryado ang kaugalingon nga kahilwayan tubtob wala mahilway ang iban pa nga sahi nga ginahimuslan kag ginapigos. Gani, kinahanglan nga pamunuan sang proletaryado ang paghimakas para sa kahilwayan sang iban pa nga sahi nga ginahimuslan kag ginapigos.

Sa Pilipinas, Ang Partido Komunista sang Pilipinas, nga pinakaabanse nga ditatsment kag partido pangpulitika sang sahi nga proletaryado, nagasakdag sa paghimakas sang malapad nga pumuluyong Pilipino batok sa imperyalismo, pyudalismo kag burukrata kapitalismo nga may sosyalista nga perspektiba.

Ginalab-ot sang partido ang minilyon-milyon nga masa, ginahugpong sila kag ginaangkon ang ila lubos nga pagsalig kag suporta bangud ara sa pusisyon ini agud italana ang linya kag direksyon sang paghulag nga nagasabat sa ila interes kag nagaubay sa ila mga organisasyon kag mga paghimakas.

6. Ngaa basehan nga prinsipyo sang Partido ang pagsaway sa kaugalingon?

Ang pagsaway sa kaugalingon marka sang isa ka Partido nga aktibo kag tampad sa obligasyon sini sa kaugalingon nga sahi kag sa masang anakbalhas. Tampad sini nga ginabaton ang kaugalingon nga mga kasaypanan, ginapangita ang mga kabangdanan sang mga ini, ginaanalisar ang mga kahimtangan nga nagabunga sa mga ini kag madalum nga ginatalakay ang mga pamaagi sa pagpanadlong. Gani ginatungdan sang Partido ang mga katungdanan sini, kag ginahanas ang proletaryado kag ang masa sa pamaagi sang pagpanadlong.

Paagi lamang sa pagsaway sa kaugalingon matadlong sang Partido ang mga kasaypanan sini, mapat-ud ang pag-usoy sang rebolusyon sa husto nga banas, kag mapadaog ang handum sang proletaryado kag malapad nga masa sang pumuluyo. Labi nga mapahugot ang angot sang Partido sa masa, kag matukod ang pagsalig kag paghakos nila sa pagpamuno sini. Labi nga nagapag-on ang paghiliusa sa pamensaron kag buhat sa sulod mismo sang Partido.

II. Ang Partido Komunista sang Pilipinas

1. Ano ang Partido Komunista sang Pilipinas (MLM)?

Ang Partido Komunista sang Pilipinas nga ginaubayan sang Marxismo-Leninismo-Maoismo (MLM) ang partido pangpulitika sang proletaryo nga Pilipino. Ginatiglawas kag ginasakdag sini ang makasahi

nga interes sang proletaryo nga Pilipino kag amo ang abanse nga ditatsment sini. Ginapamunuan sini ang duha-ka-halintang nga rebolusyong Pilipino—ang demokratiko nga rebolusyon sang banwa nga ginasulong subong kag ang madason nga halintang sang sosyalista nga rebolusyon.

Makasaysayan nga katungdanan sang Partido Komunista sang Pilipinas, kaupod ang iban pa nga Marxista-Leninista nga partido sa bug-os nga kalibutan, ang pamunuan ang rebolusyonaryo nga paghimakas para sa sosyalismo kag hawanan ang banas pakadto sa komunismo.

Marxismo-Leninismo-Maoismo ang teoretikal nga pundasyon sang Partido Komunista sang Pilipinas. Malig-on nga nagapanindugan ang Partido nga bisan san-o indi magaangkon sang rebolusyonaryo nga kahublagan sa Pilipinas kon wala sang rebolusyonaryo nga teorya nga nagaubay diri. Ang pagdapat sang unibersal nga kamatuoran sang Marxismo-Leninismo-Maoismo sa kongkreto nga praktika sang rebolusyong Pilipino ang pinakamataas nga katungdanan sang Partido.

Nagakuha ang Partido sang mga leksyon halin sa tanan nga nagligad nga rebolusyonaryo nga paghimakas sang pumuluyong Pilipino. Nagatuon man sang leksyon kag nagaagubay sa pagsulong sang teorya kag praktika sang pangkalibutanon nga rebolusyonaryo nga kahublagan nga proletaryo.

Tayuyon nga ginapabaskog sang Partido ang kaugalingon sini sa ideolohiya, pulitika kag organisasyon agud mangin matuod nga taliba sang proletaryado kag agud epektibo nga matungdan sini ang istorikal nga katungdanan sang pagpamuno sa rebolusyong Pilipino. Ginapamatukan sini ang tanan nga mga panan-awan kag impluwensya nga indi proletaryo kag mabug-at nga ginapamatukan ang ano man nga pagbuko nga ipasulod ang mga ini sa sulod sang Partido. Sa patag sang ideolohiya, malig-on nga ginasaway sang Partido ang tanan nga tendensya sang suhetibismo kag rebisyunismo nga nagahatag-dalan sa oportunismo sa pulitika, Tuo man ukon “Wala”. Kag sa patag sang organisasyon, nagabanggi ini sa liberalismo kag sektaryanismo.

Ginagamit sang Partido ang pagsaway kag pagsaway sa kaugalingon indi lamang agud pabakuron ang kaugalingon sini, ipabilin ang husto nga makasahi nga panindugan kag istilo sang pagtrabaho kundi agud maagom sini ang tayuyon nga suporta kag pagsalig sang malapad nga pumuluyo.

Sa pagsulong sang pungsudnon kag demokratiko nga mga handum sang pumuluyong Pilipino, ginatungdan sang Partido ang iya proletaryo nga internasyunalista nga katungdanan. Ang rebolusyon Pilipino kabahin

sang pangkalibutanon nga rebolusyong proletaryo. Ano man nga kadalagan nga ginaagom sang mga rebolusyonaryo nga paghimakas sang pumuluyong Pilipino sa pagpamuno sang Partido malahalon nga amot sang proletaryo nga Pilipino sa pagsulong sang dungganon nga handum sang pangkalibutanon nga proletaryado.

Ang simbolo sang Partido amo ang hayahay nga pula nga may maso kag garab nga bulawan ukon puti sa tunga. Ang maso nagatiglawas sa sahi nga mamumugon kag ang garab nagatiglawas sa sahi nga mangunguma. Ang Internasyonal amo ang ambahanon sang Partido.

2. Ano ang linya sa ideolohiya sang Partido Komunista sang Pilipinas?

Ang linya sang Partido Komunista sang Pilipinas sa ideolohiya amo ang Marxismo-Leninismo-Maoismo. Paagi sa Marxismo-Leninismo-Maoismo, ang Partido naarmasan sang pinakagamhanan nga hinganiban nga teoretikal sang proletaryado indi lamang agud hangpon ang kalibutan kundi, labaw sa tanan, bag-uhon ini. Nagaserbi ini nga indi-mapahigad nga ubay agud tayuyon nga isulong kag padag-on ang rebolusyon Pilipino. Ang pagsakdag ukon indi sa linya nga ini sa ideolohiya ang talaksan kon ang isa ka partido matuod nga nagaalagad sa interes sang proletaryado.

Ang rebolusyonaryo nga teorya sang Marxismo-Leninismo amo ang mga inagihan sang proletaryado sa bug-os nga kalibutan nga ginsuma agud mag-ubay sa pagsulong sang paghimakas sang proletaryado para sa sosyalismo kag komunismo. Nag-agi na ini sa tatlo ka halintang sang pag-uswag.

Ginlatag nanday Marx kag Engels, sa una nga kahigayunan, ang teoretikal nga pundasyon sang Marxismo. Ini ginabug-os sang tatlo ka malahalon nga mga sangkap: ang pilosopiya sang materyalismo diyalektiko kag ang pagdapat sini sa kasaysayan sang katilingban ukon ang materyalismo istoriko, ang ekonomiya pangpulitika nga nagaathag sa mga layi sang paghulag sang kapitalismo kag sa indi malikawan nga pagkapukan sini, kag ang siyentipiko nga sosyalismo. Gin-athag nanday Marx kag Engels ang mga ini sadtong panahon sang kapitalismo nga hilway nga kumpetisyon kag ang proletaryado, bilang isa na ka nagakinaugalingon nga pwersa pangkatilingban, nagahanda pa lang sa ila rebolusyon.

Labi pa nga ginpauswag ni Lenin ang tatlo ka sangkap sang Marxismo sa pagpakigbanggi sa mga suhetibista nga burges kag rebisyunista nga klasikal sa sulod kag guwa sang Unyon Sobyet sadtong

mga panahon nga nagatapak na ang kapitalismo sa halintang sang monopolyo. Kaupod si Stalin, ginhatagan ni Lenin sang katumanan ang halintang sang Leninismo paagi sa pag-establisar sa Unyon Sobyet bilang isa ka diktadurya nga proletaryo, kag sa sustinido nga proseso sang sosyalista nga rebolusyon kag konstruksyon tubtob sa sa pagtuhaw sang pila ka banwa nga sosyalista sa panahon sang moderno nga imperyalismo kag sosyalista nga rebolusyon.

Nagtuhaw bilang ikatlo nga halintang sa pag-uswag sang Marxismo ang Kaisipan Mao Zedong ukon Maoismo, sang atubangon ni Mao ang problema sang moderno nga rebisyunismo kag kapitalista nga pagpanumbalik nga makit-an na sa Unyon Sobyet kag Sidlangan nga Europa, kag may ara man mga patimaan sa Tsina. Ginplastar niya ang teorya sang nagapadayon nga rebolusyon sa idalum sang diktadurya sang proletaryado agud konsolidahon ang sosyalismo, pamatukan ang moderno nga rebisyunismo kag punggang pagbalik sang kapitalismo, kag madinalag-on niya nga ginsapraktika ang teorya sa una nga kahigayunan, halin 1966 tubtob 1976.

Apang ang mga tudlo ni Mao kaangot sang bag-o nga demokratiko nga rebolusyon ang nangin pinakagamhanan gilayon nga impluwensya sa mga proletaryo nga rebolusyonaryo nga Pilipino, sa simple nga kabangdanan nga ang mga ini may hugot nga kaangtanan sa kahimtangan pangkatilingban sang Pilipinas kag ginapakita ang banas sa bag-o nga demokratiko kag sosyalista nga halintang sang rebolusyon Pilipino. Labaw pa, ginatudlo sang Kaisipan Mao Zedong ang teorya kag praktika sang nagapadayon nga rebolusyon sa idalum sang diktadurya sang proletaryado tubtob sa mangin posible ang paglutos sa imperyalismo kag pag-agom sa komunismo sa pangkalibutanon nga sakop.

Ang Marxismo-Leninismo-Maoismo ang pinaka-gamhanan nga hinganiban pang-ideolohiya sang proletaryado sang kalibutan sa subong. Ini ang pinakakomprehensibo kag pinakamadalum nga ubay teoretikal sang mga proletaryo nga rebolusyonaryo nga Pilipino, sang Partido Komunista sang Pilipinas kag sang rebolusyon Pilipino sa pag-analisa sa rebolusyonaryo nga kasaysayan kag kahimtangan sang pumuluyong Pilipino, sa paglunsar sang bag-o nga demokratiko nga rebolusyon paagi sa inaway banwa kag sa pagtan-aw sa sosyalista nga palaabuton tubtob sa ganhaan sang komunismo. Marxismo-Leninismo-Maoismo ang mikroskopyo kag teleskopyo sang rebolusyon Pilipino.

3. Ano ang pangkabilugan nga linya sa pulitika sang Partido Komunista sang Pilipinas?

Ang pangkabilugan nga linya sa pulitika sang Partido Komunista sang Pilipinas amo ang linya sang demokratiko nga rebolusyon sang banwa nga may perspektiba nga sosyalista. Ang pangkabilugan nga linya sang demokratiko nga rebolusyon sang banwa sa Pilipinas nagasunod sa teorya sang duha ka halintang nga rebolusyon – ang magkasunod nga halintang sang demokratiko nga rebolusyon sang banwa, kag pagkatapos nga magdaog ini, ang halintang sang sosyalista nga rebolusyon.

Ang teorya sang duha ka halintang nga rebolusyon una nga ginathag nanday Marx kag Engels kag nagsunod si Lenin sa kahimtangan nga nagaluntad kag kinahanglan nga dulaon pa ang mga dalagku nga salin sang pyudalismo sa nagauswag nga mga kapitalista nga pungsod sa Europa antes makakadto sa sosyalista nga rebolusyon. Labi nga nagdaku ang kapuslanan sang teorya sang duha ka halintang nga rebolusyon sang magsaylo ang sentro sang burges-demokratiko nga rebolusyon sa Sidlangan.

Magkatuhay ang duha ka halintang nga ini pero indi separado kag sa pagkamatuod magkasugpon. Mapaseguro ang tayuyon nga pagsulong sang rebolusyon Pilipino halin sa una nga halintang pakadto sa madason nga halintang bangud sa hugot nga pag-uyat sang proletaryado sa makasahi nga pagpamuno sini paagi sa iya taliba nga partido. Paagi sa paglunsar sang demokratiko nga rebolusyon sang banwa bilang una nga halintang sa duha ka halintang nga rebolusyon mahanda ang mga paktor para sa madinalagon nga pagsulong sa halintang sang sosyalista nga rebolusyon.

Katuyuan sang pangkabilugan nga linya sang demokratiko nga rebolusyon sang banwa nga kumpletuhon ang paghimakas sang pumuluyong Pilipino para sa pungsudnon nga kahilwayan kag demokrasya. Ini pagpadayon sang Rebolusyon 1896 kag Inaway nga Pilipino-Amerikano nga pareho napaslawan bangud sa pagluib sang liderato nga ilustrado kag sa pagpasilabot sang imperyalismong U.S.

Ginalubad sang demokratiko nga rebolusyon sang banwa ang subong nga basehan nga mga kontradiksyon sang katilingban Pilipino: sa tunga sang imperyalismo kag bug-os nga pumuluyong Pilipino; kag, sa tunga sang daku nga burgesya komprador kag sahi nga agalon nga mayduta, sa isa ka bahin, kag sang mas madamo nga pumuluyo — ang sahi nga mamumugon, sahi nga mangunguma, petiburgesya sa syudad kag pungsudnon burgesya — sa pihak nga bahin. Sentral nga katungdanan sang

demokratiko nga rebolusyon sang banwa ang pag-agaw sang gahum pangpulitika paagi sa armado nga paghimakas bilang nagapanguna nga porma sang paghimakas, kag ang parlamentaryo nga paghimakas bilang sekundaryo nga porma. Ang kadalag-an sang demokratiko nga rebolusyon sang banwa ang magatapos sa malakolonyal kag malapyudal nga mga kondisyon sang katilingban Pilipino kag palaagyan sa padayon nga pag-uswag sini.

Sa subong, ang tanan nga mga pagtinguha sang bilog nga Partido sa pulitika nagatuyog sa pagpatuman sang pangkabilugan nga linya sang demokratiko nga rebolusyon sang banwa. Agud matungdan ini, ginagamit sang Partido ang gamhanan nga mga hinganiban sang malawigan nga inaway banwa kag pungsudnon nga nagahiliugyon nga prente.

Nakumpleto sa basehan ang demokratiko nga rebolusyon sang banwa oras nga napukan na sa bilog nga pungsod ang gahum pangpulitika sang daku nga kumprador burgesya kag sahi nga agalon nga mayduta kag ang sosyalista nga rebolusyon igalunsar dayon.

Kabanggi sa pangkabilugan nga linya sang demokratiko nga rebolusyon sang banwa ang Tuo kag "Wala" nga oportunistang mga linya nga ginapalapta sang mga rebisyunista nga traidor. Ang sala nga mga linya nga ini nagatungtong sa sala nga pag-analisa nga indi na malapyudal ang katilingban Pilipino. Ang pinakamalala sa mga rebisyunista nagasiling nga ang subong sini nga pagbag-o resulta sang pag-industriyalisa kag pag-urbanisa sa Pilipinas nga ginhimo sang pasista nga diktadurang US-Marcos.

Ginasiling sang Tuo nga oportunistang linya ang pagtukod sang isa ka ginatawag nga “pungsudnon-demokratiko nga katilingban” bilang katuyuan sang pungsudnon-demokratiko nga rebolusyon gani ginapaburon kag ginaguba sini ang sosyalista nga perspektiba sang rebolusyon Pilipino. Hayag man ukon indi, ginsiling sang linya nga ini nga lubos nga pagapauswag anay ang kapitalismo sa Pilipinas antes mangin posible ang sosyalismo. Wala sini nahangpan nga ang pungsudnon-demokratiko nga rebolusyon nakumpleto na sa basehan sa tion nga napukan na ang gahum sang daku nga kumprador burgesya kag sahi nga agalon nga mayduta sa pungsudnon nga sakop kag ini ang nagakatag sang mga kondisyon agud ilunsar dayon ang sosyalista nga rebolusyon. Ang pinakamalala sa mga Tuo nga oportunistang nagaduso sa mga panan-awan nga pwede ipahigad sang pungsudnon-demokratiko nga rebolusyon ang taliba nga papel sang proletaryado kag ang katilingban nga igabunga sang

subong sadto nga rebolusyon walay kahalabtan sa diktadurya sang proletaryado.

Sa pihak nga bahin, ginapalapta sang mga Trotskyista nga hubon nga ginapasakupan sang hubon nga Felimon "Popoy" Lagman, Tabara, Lopez, ang "Wala" nga oportunistang linya nga ang Pilipinas isa na ka kapitalista nga pungsod, kag ang Manila-Rizal isa na ka syudad nga ginaharian sang burgesyang industriyal sa baylo nga ang daku nga burgesya kumprador. Kag sigun sa subong sini nga pag-analisa mahimo na nga ilunsar dayon ang sosyalista nga rebolusyon sa rehiyon kag sa bilog nga pungsod. Wala sini nahakos nga indi pwede umpisahan ang sosyalismo nga wala sang nauna nga basehan nga pagkumpleto sa pungsudnon-demokratiko nga rebolusyon nga amo ang magatapos sa malakolonyal kag malapyudal nga kahimtangan sang pungsod.

4. Ano ang linya sa organisasyon sang Partido Komunista sang Pilipinas?

Ang linya sang Partido sa pagtukod sa organisasyon amo ang demokratiko sentralismo. Ini ang yabi nga prinsipyo sa pag-organisa kag pagpauwang sang rebolusyonaryo nga kusog kag kabuhi sang Partido. Paagi sa demokratiko sentralismo mapat-ud ang nagahiliusa nga disisyon kag nagahiliusa nga paghulag sang bilog nga Partido.

Ang demokratiko sentralismo nagakahulugan sang sentralisado nga pagpamuno nga nakabase sa demokrasya kag demokrasya nga ginaubayan sang sentralisado nga pagpamuno. Ang esensya sang sentralismo amo ang pagsunod sa Marxismo-Leninismo-Maoismo kag ang determinasyon nga isulong ang bag-o nga demokratiko nga rebolusyon kag pagkatapos ipatuman ang makasaysayan nga misyon sang sahi nga mamumugon nga itukod ang sosyalismo tubtob sa malab-ot ang katapusan nga katuyuan nga komunismo. Sa iban nga pulong, ang demokratiko sentralismo indi isa ka simple nga proseso nga wala sang pat-ud nga kaundan kag katuyuan.

Bilang proseso sang pagdisisyon, ang demokratiko sentralismo ginabug-os sang pagpaidalum sang minoritya sa mayorya, sang manubo nga organo sa mas mataas nga organo, sang indibidwal sa bilog nga organisasyon sang Partido kag sang bilog nga katapuan sang Partido sa Komite Sentral. Paagi sa demokrasya sa sulod sang Partido, ginapaambit kag ginatingob ang mga datos kag ideya sang mga kadre kag katapu sang Partido paagi sa tayuyon nga proseso sang diyalektiko nga interaksyon sa

tunga sang mga manubo kag mas mataas nga lebel sang organisasyon sang Partido.

Ang mga basehan nga kundisyon agud matuman ang prinsipyo nga ini ang masunod:

a. Ang mga nagapamuno nga organo sang Partido sa tanan nga lebel ginapili kag responsable sa organisasyon ukon kumperensya sang partido nga nagpili sa ila.

b. Matapos ang hilway kag lubos nga talakayan, ang mga disisyon ginapatuman nga wala sang pagpasulabi, base sa pagsulundan nga:

- ang indibidwal napaidalum sa organisasyon,
- ang minoriya napaidalum sa mayoriya,
- ang manubo nga lebel napaidalum sa mas mataas nga lebel, kag
- ang bilog nga katapuan napaidalum sa Komite Sentral kag Pungsudnon nga Konggreso

k. Ang mga nagapamuno nga organo sang Partido permi nga nagahatag sang maid-id nga igtalupangod sa mga pahayag kag ideya sang mga manubo nga organo sang Partido kag pangmasang katapuan, kag permi nga nagatuon sa mga kongkreto nga eksperyensya kag nagahatag sang gilayon nga bulig sa paglubad sang mga problema.

d. Ang mga manubo nga organo sang Partido nagahatag sang mga regular kag ispesyal nga pahayag sa hilikuton sa organo nga mas mataas sa ila, kag gilayon nga nagapangayo sang tagubilin nahanungod sa mga problema nga nagakinahanglan sang desisyon sang mas mataas nga organo sang Partido.

e. Tanan nga organisasyon sang Partido nagasunod sa prinsipyo sang kolektibo nga pagpamuno, kag kolektibo nga ginadesisyanan ang tanan nga importante nga halambalanon.

Sa tian nga nakadesisyon na bahin sa ano man nga isyu sigun sa demokratiko sentralismo, may paghiliusa sa desisyon kag paghulag. Ang sin-o man pwede mag-angkon sang iya opinyon apang dapat nga magsunod sa desisyon. Indi maatubang sang Partido ang kabuhi-kag-kamatayon nga rebolusyonaryo nga paghimakas batok sa kaaway kon wala ang kinahanglan nga disiplina matapos ang proseso sang demokratiko nga pagdesisyon.

Makangilil-ad sa demokratiko sentralismo ang burukratismo kag ultrademokrasya ukon liberalismo. Ang indi magtadlong nga mga oportunistang kag traidor naghiwat sang burukratismo kag komandismo sang sila nagapamuno kag ultrademokrasya sang sila nagapakigbanggi sa mas mataas nga mga organo. Indi lamang nila ginlapas ang pang-organisasyon nga proseso sang pagdedesisyon, kundi, malala sa tanan, nagpangutsot pa sila sang mga linya nga kontra-rebolusyonaryo kontra sa Marxismo-Leninismo kag sa Partido kag nagpadihot nga gub-ona ang Partido sa ideolohiya, pulitika kag organisasyon.

5. Ano ang kabilugan nga balayon sang mga organisasyon sang Partido?

Ang balayon sang mga organisasyon sang Partido kag ang mga nagapamuno nga organo nila ang masunod:

- a. Sa bilog nga pungsod, ang tanan nga katapu ang nagabug-os sa pungsudnon nga organisasyon sang Partido. Ang nagapamuno nga organo amo ang Pungsudnon nga Kongreso, kag sa tunga sang mga kongreso, ang Komite Sentral.
- b. Sa mga rehiyon, may ara organisasyon sang Partido sa rehiyon. Nagapamuno ang kumperensya sang rehiyon, kag sa tunga sang mga kumperensya, ang komite sang rehiyon.
- k. Sa mga probinsya, may organisasyon sang Partido sa probinsya. Nagapamuno ang kumperensya sang probinsya, kag sa tunga sang mga kumperensya, ang komite sang probinsya.
- d. Sa mga distrito, may organisasyon sang Partido sa distrito. Nagapamuno ang kumperensya sang distrito, kag sa tunga sang mga kumperensya, ang komite sang distrito.
- e. Sa mga seksyon, may organisasyon sang Partido sa seksyon. Nagapamuno ang kumperensya sang seksyon, kag sa tunga sang mga kumperensya, ang komite sang seksyon.
- g. Sa mga pabrika, minahan, plantasyon, asyenda, baryo ukon buluthuan, may mga sanga sang Partido. Nagapamuno ang mga sinapol sang sanga,

kag sa tunga sang mga sinapol, ang mga komiteng manugpatuman sang sanga.

Nagatukod man sang mga organisasyon sang Partido agud pagdumalahan ang partikular nga mga patag sang hilikuton pareho sang sa edukasyon, militar, pinansya kag propaganda, subong man ang hilikuton sa mga sektor pareho sang sa mamumugon, mangunguma, pamatan-on, kababainhan kag iban pa.

6. Ano ang basehan nga yunit sang Partido kag ang mga katungdanan sini?

Ang sanga ang basehan nga organisasyon sang Partido. Ginatukod ini diin man may ara nga tatlo ka katapu sang Partido nga pwede nga ululupod nga maghulag bilang isa ka kolektiba, base sa lugar sang puluyan, trabaho ukon iban pa. Ginatukod ang sanga sa mga pabrika, minahan, plantasyon, asyenda, baryo, buluthuan, kalsada, talatapan kag komunidad kag sa tagsa ka kumpanya ukon platun sang hangaway sang banwa, santo sa kahimtangan.

Ang pinakapundamental nga katungdanan sang sanga amo ang pagpauusap sa pinakahugot nga pag-angot sang Partido kag sang masa sang pumuluyo. Mga pangkabilugan nga responsibilidad sang sanga ang masunod:

- a. magpropaganda kag mag-organisa sa kubay sang masa agud ipabaton kag paluntaron ang linya sang Partido kag ang mga polisiya kag disisyon sang mga mas mataas nga organo sang Partido;
- b. hibal-on sa masa ang ila mga handum kag pangabay, maghimo sang napanahon nga mga pahayag sa mas mataas nga organo sang Partido, magubay kag magpartisipar sa kabuhi pangpulitika, pang-ekonomiya kag pangkultura sang pumuluyo;
- k. mangalap sang bulig nga materyal para sa armado nga paghimakas nga ginalunsar sang Bag-ong Hangaway sang Banwa;
- d. magrekrut sang mga bag-o nga katapu sang Partido kag mga Pulang hangaway, magkulekta sang butaw halin sa mga katapu sang Partido,

magsayasat sa mga pahayag halin sa mga katapu, kag mag-amlig sa disiplina kag seguridad sang Partido;

e. Magbalay sang mga kurso sa pagtuon para sa mga katapu sang Partido kag magpanagtag sang mga publikasyon sang Partido; kag

g. Magrekomenda sang mga katapu sang Partido nga magakuha sang paghanas nga pangkadre sa Rebolusyonaryo nga Buluthuan sang Kaisipan Mao Zedong.

7. Sanday sin-o ang pwede magpatapu sa Partido?

Ang sin-o man nga pumuluyo ukon nagapuyo sa Pilipinas, nga indi-magnubo sa 18 tuig nga edad, nagasakdag sa Marxismo-Leninismo-Maoismo, sa Programa kag Konsti-tusyon sang Partido, kag nagapasugot nga maghulag sang lubos nga kapagsik sa isa ka organisasyon sang Partido, magpatuman sa mga disisyon sang Partido, kag magbayad sang butaw sa pagsulod kag regular nga bulanan nga butaw, pwede batunon nga katapu sang Partido.

Ang pagpatapu sa Partido may epektibidad sa basehan nga indibidwal lamang kag base sa masunod nga pamaagi:

a. Ang mga mamumugon, mamumugon sa uma, imol nga mangunguma, imol nga mangingisda ukon imol sa syudad pwede mangin katapu sang Partido base sa rekomendasyon sang duha ka katapu nga maayo ang tindog sa Partido kag pagligad sila nga batunon santo sa disisyon sang sinapol sang sanga (ukon sang komiteng manugpatuman sang sanga), kag pagligad sang anum ka bulan nga pagka-kandidato nga katapu.

b. Ang mga nahanunga nga mangunguma, nahanunga nga mangingisda, empleyado sa talatapan, manughimo-sa-kamot, mga gagmay nga negosyante, intelektwal ukon propesyonal, istudyante kag iban pa nga halin sa petiburgesya pwede mangin katapu sang Partido base sa rekomendasyon sang duha ka katapu nga may indi magnubo sa isa ka tuig nga maayo nga tindog sa Partido, kag matapos sila nga batunon santo sa disisyon sang komiteng manugpatuman sang sanga ukon grupo sang Partido sa isa ka organisasyon pangmasa, kag pagligad sang isa ka tuig nga pagka-kandidato nga katapu.

k. Ang mga pusisyon pangkatilingban nga luwas sa mga nasambit sa (a) kag (b) pwede mangin katapu sang Partido base sa rekomendasyon sang duha ka katapu nga may tayuyon nga tatlo ka tuig nga maayo nga tindog sa Partido, matapos sila nga batunon sang komiteng manugpatuman sang sanga ukon grupo sang Partido sa isa ka organisasyon pangmasa, kag polisiya sang duha ka tuig nga pagka-kandidato nga katapu.

8. Ano ang sumpa sang kada katapu sang Partido?

Ang kada nagasulod sa Partido bilang kandidato nga katapu kag ang kada kandidato nga katapu nga ginabaton bilang bug-os nga katapu sang Partido pagapasumpaon. Katungdanan sang kada katapu nga isaulo, hangpon kag lubos nga isapraktika ang iya sumpa sa Partido.

Ang sumpa nga ini ang masunod:

Ako, si _____, nagapahayag sang akon lubos nga pagsugot sa teorya kag praktika sang Marxismo-Leninismo-Kaisipan Mao Zedong, sa Programa kag Konstitusyon sang Partido Komunista sang Pilipinas, kag sa tanan nga disisyon sang mas mataas nga mga organo sang Partido kag sang yunit sang Partido nga ginatapan ko.

Nagasumpa ako nga tungdan ang tanan nga katungdanan ko kag responsibilidad sa malab-ot sang akon masarangan, pataason ang akon proletaryo nga kamuklatan nga rebolusyonaryo, permi alagaran ang pumuluyo kag mangin malapit sa ila, pangapinan kag ipakigsumpong ang interes sang pumuluyo, ipabilin nga mataas ang dungog kag prestihiyo sang Partido, halungan ang siguridad sang Partido kag tanan nga kaupod ko kabuhi ko man ang ihalad, lubos katampat nga sawayon ang mga kasaypanan kag kahuyangan ko kag sang akon mga kaupod agud mapaayo ang pagtrabaho kag istilo sang pagtrabaho base sa husto nga makasahi nga panindugan kag agud matukod ang paghiliusa kag kusog kag igasulong ko ang interes sang Partido kag sang masa. Pagagamiton ko ang tagsa ka kahigayunan nga palapnagon ang Marxismo-Leninismo-Kaisipan Mao Zedong kag tumanon ang rebolusyonaryo nga linya nga proletaryo sang Partido.

9. Ano ang mga katungdanan sang mga katapu sang Partido?

Ang mga katungdanan sang mga katapu sang Partido masuma sa pagsulundan ni Kaupod nga Mao bahin sa tatlo ka dapat himuon kag tatlo ka indi dapat himuon. Siling niya, *“Isapraktika ang Marxismo, indi ang rebisyunismo; mangin bukas kag tampad, indi magpadihot, indi mang-intriga; makig-isa, indi magpangpihak.”* Base diri, dapat tumanon sang kada katapu ang masunod nga mga katungdanan :

a. Pauswagon ang paghiliusa kag kusog sang Partido paagi sa pagpataas sa lebel sang iya paghangup sa Marxismo-Leninismo-Kaisipan Mao Zedong kag sa pag-aplikar sini sa mga kongkreto nga problema sang Partido kag sang rebolusyon;

b. Ipauna ang interes sang Partido ukon interes sang masa sang pumuluyo sa pangkinaugalingon nga interes, alagaran ang masa nga wala sang kondisyon, makatuon sa ila kag ipaathag sa ila ang mga polisiya kag disisyon sang Partido, kag gilayon nga mag-pahayag sa Partido bahin sa mga kinahanglanon kag handum sang mga pumuluyo;

k. Pamatukan ang moderno nga rebisyunismo kag tanan nga sala nga huyog sa pamensaron kag buhat sa sulod sang Partido;

d. Sundon ang Konstitusyon kag Programa sang Partido;

e. Lubos nga magpatuman sa linya sang Partido kag sa tanan nga partikular nga katungdanan nga ginahatag sa iya;

g. Magpakasampaton sa iya linya sang hilikuton kag mangin modelo sang disiplina, maukod nga pagtrabaho, pagpaumod kag simple nga pangabuhi sa mga organisasyon sang Partido, organisasyon pangmasa kag sa kubay sang pumuluyo;

h. Magpakigsawayanay kag magsaway sa kaugalingon agud maiplastar ang mga kasaypanan kag kahuyangan, hugot sa buot nga magsikap pangibabawan ang mga ini, kag paayuhon ang iya hilikuton pangpulitika;

i. Maghulag sa isa ka partikular nga organisasyon sang Partido kag permi nga magtambong sa mga sinapol sini;

l. Permi nga magtambong sa mga kurso sang pagtuon, kag magbasa kag magpalapnag sang mga publikasyon sang Partido;

m. Mangin tampad sa Partido kag maglahad sang tanan nga pamatuod nga kinahanglan agud madihon ang mga husto nga disisyon;

n. Gilayon nga magbayad sang butaw; kag

ng. Magbantay sa ano man nga bagay ukon hitabo sa sulod kag guwa sang Partido nga makatalagam para sa Partido, kag magpamatok sa tanan nga makahalalit sa interes sang Partido kag sang pumuluyo.

10. Ano ang mga kinamatarung sang mga katapu sang Partido?

Ang mga kinamatarung sang mga katapu sang Partido may katuyuan nga hatagan sang pinakamaayo nga kundisyon ang kada isa sa abot-masarangan nga pagtuman sa iya mga katungdanan sa Partido kag rebolusyon. Dapat sakdagon kag tahuron sang kada isa ang mga kinamatarung sang iban pa nga mga katapu.

Ang mga kinamatarung nga ini ang mga masunod :

a. Hilway nga magpasakop sa mga talakayan sa mga sinapol sang Partido bahin sa teoretikal kag praktikal nga mga problema kaangot sang linya, mga polisiya kag disisyon sang Partido;

b. Magpili kag mapilian sa sulod sang Partido;

k. Magplastar sang mga suhestyon, pahayag ukon reklamo sa ano man nga organisasyon ukon organo sang Partido sa ano man nga lebel;

d. Magsaway sa ano man nga organisasyon, organo ukon sa sin-o man nga katapu sang Partido sa mga sinapol sang Partido;

e. Magsiyasat sa kinaiya sang kandidato para sa ano man nga katungdanan ukon komite;

g. Maglagas sa ano man nga disisyon sa mas mataas nga organo sang Partido tubtob sa Komite Sentral kag Pungsudnon nga Kongreso; kag

h. Maghingyo nga magtambong sa ano man nga sinapol nga ginpatawag agud usisaon ang ila mga kinaiya, hilikuton ukon ano man nga aksyon pangdisiplina nga igahatag saila, maluwas kon wala ginatugutan para sa siguridad sang Partido.

Ang mga katungdanan kag kinamatarung sang mga kandidato nga katapu pareho sang mga bug-os nga katapu, maluwas sa wala sila sang kinamatarung nga magpili kag mapilian, kag wala sang boto sa pagdisisyon sa sulod sang Partido.

Hilway nga maghalin sa Partido ang sin-o man nga kandidato nga katapu ukon bug-os na nga katapu. Ang tagsa ka paghalin lubos nga igapaathag sa sulod sang natungdan nga komite sang Partido.

Ang tagsa ka katapu sang Partido, ano man kaayo sang rekord ukon taas sang pusisyon, nga indi magtuman sa iya mga katungdanan ukon wala nagatahud sa mga kinamatarung sang iya mga kaupod, pagasawayon kag papangaralan. Ang mga malala nga paglapas sa disiplina pagahatagan sang nagakaigo nga silot. Base sa kabug-aton sang kasal-anan, iga-imponer ang ano man sa mga masunod: paandam, mabug-at nga paandam, pagkuha sa hilikuton, paghatag sang pangtilaw nga hilikuton, suspensyon, ukon pagpahalin sa Partido.

Ang ano man nga aksyon pangdisiplina nga igahatag sa mga katapu sang organo ukon yunit nga ginapasakupan nila. Kon pagpahalin sa Partido ang silot, kinahanglan nga magpasugot ang gilayon nga mas mataas nga komite sang Partido. Ang ano man nga aksyon pangdisiplina sa mga katapu sang mga komite sang Partido pagadesisyon sang kumperensya nga nagpili sa ila ukon sang mas mataas nga komite sang Partido. Ang ano man nga aksyon pangdisiplina sa mga katapu sang Komite Sentral pagadisisyunan sang plenum sang Komite Sentral.

III. Ang Kasaysayan sang Partido Komunista sang Pilipinas

A. Ang Pagbun-ang sang Partido Komunista sang Pilipinas

1. Paano nabun-ag ang Partido Komunista sang Pilipinas?

Nabun-ag ang Partido sa tunga sang mga paghimakas sang sahi nga mamumugon kag pumuluyong Pilipino batok sa kolonyalismo nga U.S. kag lokal nga pyudalismo. Sa idalum sang kolonyal nga paghari sang imperyalismong U.S., ginpalapnag ang malapyudalismo kag ginpapagsik ang kolonyal nga baligyaanay sa tunga sang Pilipinas kag U.S. Naghatag-palaagyan ini sa dugang nga pagdaku sang sahi nga mamumugon kadungan sang nagapasingki nga pagpanghimulos kag pagpamigos sa ila kag sa masa nga mangunguma. Samtang, lab-as pa sa pamensaron sang pumuluyo ang pagkapaslaw sa kamot sang imperyalismong U.S. sang pungsudnon-demokratiko nga rebolusyon nga ginpamunuan sang liberal nga burgesya. Sa kahimtangan nga ini, nagpagsik kag naglapnag ang ispontanyo nga paghimakas sang masa nga mamumugon kag mangunguma.

Sadtong pagbukas sang ika-20 siglo, nagsugod na nga magsulod sa pungsod ang pila ka sinulatan nga Sosyalista, upod ang pila ka sinulatan nanday Marx kag Engels. Nagserbi nga panugod nga teoretikal nga ubay ang mga ini sa abanse nga lider-mamumugon agud ikatag kag isulong ang kahublagan sang mamumugon. Apang ang kadalag-an sang Rebolusyon Oktubre sa Rusya sadtong 1917 nga ginpamunuan ni Lenin kag sang proletaryo nga partido nga Ruso ang naghatag sang daku nga inspirasyon sa proletaryo nga Pilipino. Sang tuig nga 1920, ang militante nga kahublagan sang mamumugon sa pungsod nakaangot sa mga kahublagan sang mamumugon nga naimpluwensyahan sang mga Marxista-Leninista sa Asya kag sa iban nga bahin sang kalibutan. Diri nakit-an sang proletaryo nga Pilipino ang Marxismo-Leninismo. Gindala sa Pilipinas sang mga lider-mamumugon nga ginapamunuan ni Crisanto Evangelista ang Marxismo-Leninismo. Kag sadtong Nobyembre 7, 1930, gintukod ang Partido Komunista sang Pilipinas sa Maynila.

2. Ano ang istoriko nga kapuslanan sang pagkatukod sang Partido Komunista sang Pilipinas?

Ang pagkatukod sang Partido senyal nga ang proletaryo nga Pilipino nag-abanse na sa ideolohiya, pulitika kag organisasyon kag nagsugod na nga maghatag sang makasahi nga pagpamuno sa rebolusyon Pilipino. Gani, nagsulod sa halintang sang demokratiko nga rebolusyon sang banwa ang rebolusyon Pilipino kadungan sang pagkabun-ag sang partido sang proletaryado nga nakatalana nga magdapat sang teorya sang Marxismo-Leninismo sa praktika sang rebolusyon Pilipino.

3. Ngaa napi-ang dayon ang bag-o matukod nga Partido?

Ang bag-o matukod nga partido ginbinase sa syudad kag nagpamuno sa hayag nga mga organisasyon kag pangmasang paghimakas. Wala magdugay, sadtong Mayo 1, 1931 kag pagligad sini, naghulag ang reaksyonaryo nga awtoridad agud sugpuon ini. Gindakop kag ginpreso ang mga kadre kag katapu sang Partido. Gindumili ang mga organisasyon pangmasa nga ginapamunuan sini.

Sadtong 1932, pormal nga gindeklara sang reaksyonaryo nga Korte Suprema nga ilegal ang Partido kag mga organisasyon pangmasa sini kag ginsentensiyahan nga mapreso ang mga nagapamuno nga katapu sini. Napiang gilayon ang una nga linya sang liderato nga wala sang nakahanda nga ikaduha nga linya sang pamunuan.

B. Ang Pagtingob sang Partido Komunista kag Partido Sosyalista, Pagsulod kag Tayuyon nga Pagpanghalit sang Kontra-rebolusyonaryo nga Linyang Burges sang mga Lava kag Taruc, kag Pagkatunaw sang Partido

1. Paano nakasulod ang reaksyunaryo nga linya nga burges sang mga Lava kag Taruc sa Partido?

Nalatag ang kahimtangan para sa pagsulod sang suhetibista kag oportunistang linya sang mga Lava kag Taruc sang magtingob ang Partido Komunista sang Pilipinas kag Partido Sosyalista sadtong 1938. Ginhimo ang pagtingob matapos buhian sang papet nga gubyernong Komonwelt ang ginpreso nga mga lider sang Partido base sa polisiya nga prente popular sa bilog nga kalibutan batok sa pasismo nga Aleman, Italyano kag Hapones.

Bunga sang pagtingob, malaparan nga nakasulod sa Partido ang mga katapu sang Partido Sosyalista nga haluga sa ideolohiya kag organisasyon. Upod ang populista nga si Luis Taruc, isa sa mga lider sang Partido Sosyalista, nga nakapuslit sa Partido. Si Vicente Lava naman ang nakasulod sa likom nga ikaduha nga linya sang liderato samtang nga nagatrabaho bilang gamay nga burukrata sa Buru sang Syensya sang reaksyunaryo nga gubyerno. Siya ang tiglawas sang mga petiburges nga ginhanas sa idalum sang impluwensya sang rebisyunista nga liderato nga Browder sang Partido Komunista sang US. Ginpangunahan nanday

Crisanto Evangelista kag Pedro Abad Santos sang Partido Sosyalista ang una nga linya sang liderato.

Matingkad nga nasalaming ang Tuo nga oportunistang linya sa mismo nga konstitusyon sang gitingob nga Partido. Ginadeklarar sa iya preambulo nga *“ginapangapinan sini ang Konstitusyon (sang papet nga gubernong Komonwelt sang US) kag ang mga kinamatarung nga ginasaad didto ...”* samtang ginapakita naman sang seksyon 1 sang Artikulo III nga *“ginapamatukan sang ubos-kusog ang ano man nga grupo, hubon, sirkulo, paksyon ukon partido nga nagapadihut ukon nagahulag agud waskon, gub-on, paluyahon ukon pukanon ang ano man ukon tanan nga institusyon sang demokrasyang Pilipino nga instrumento agud maagom sang kadam-an sa pumuluyong Pilipino ang gahum nga disisyunan sa paano man ang ila kapalaran”*.

Sa baylo nga manuto sa nagligad nga mga inagihan, padayon nga ginhatagan tum-ok sang gitingob nga partido ang paghimakas sa syudad kag parlamentaryo. Mas gin-asikaso sang mga lider sini ang pangangayupapa kay Quezon kag sa imperyalismong U.S. sangsa hatagan nagapanguna nga igtalupangod ang paghanda sa pumuluyong Pilipino, labina ang masa nga mangunguma, sa nagahana nga pagsalakay sang imperyalismong Hapones.

2. Paano nagpanghalit ang reaksyunaryo nga linyang burges sa Partido kag rebolusyonaryo nga kahublagan sadtong panahon sang pagsakop sang imperyalismong Hapon?

Nagtuga sang daku nga halit sa Partido ang kawawad-an sang kahandaan sang pamunuan sini sang salakayon sang pwersa nga Hapones ang Pilipinas. Disorganisado nga nag-atras sa kaumhan ang mga kadre nga nakabase sa syudad. Apang nadab-ot kag nadakpan sang mga Hapones ang una nga linya sang liderato sang Partido.

Sa ginhiwat nga kumperensya sang Buru sa Sentral Luzon sang Partido sadtong Pebrero 6, 1942, pormal nga gindisisyunan ang pagpasaka kay Vicente Lava kag sang ikaduha nga linya sang liderato sa sentral nga pamunuan. Gindisisyunan man sini ang pagtukod sang isa ka hangaway nga gerilya sa atubang sang pag-inisyatiba sang masa sa armado nga pagbato sa mga manugsakop.

Sadtong Marso 29, 1942, gintukod ang Hangaway sang Banwa Kontra sa Hapon (Hukbala) agud pangunahan ang armado nga pagbato

sang pumuluyo sa mga manugsalakay nga Hapones kag sa gubyernong papet nga gintukod sini. Kadungan sini, ginsuguran sang Partido ang pagtukod sang gahum pangpulitika sa kaumhan. Bisan pa man, nagpadayon sa pangkabilugan ang Tuo nga oportunistang linya sa sulod sang Partido.

Sadtong Marso, 1943, ginsalakay sang mga tropang Hapones ang puno-talatapan sang Partido kag hangaway sang banwa sa Bukid Arayat sa Pampanga. Nabihag ang madamo nga nagapamuno nga kadre kag katapu sang Partido. Bunga sang kapaslawan nga ini, ginpatuman sang liderato nga Vicente Lava ang polisiya nga “mag-isol agud magpangapin”. Ginbungkag sa mga gagmay nga hubon sang tatlo tubtob sa lima ka hangaway ang mga iskwadron (kusog- kumpanya) sang hangaway sang banwa. Hungod nga ginpaluya sini ang ikasarang nga magbato sang hangaway sang banwa kag nagbunga sang pagkapisibo sini sa atubang sang kaaway.

Sadto lamang Setyembre, 1943 sa Komperensya sa Bagumbali gindeklara nga sala ang polisiya nga “mag-isol agud magpangapin” matapos mabuyagyag ang pagkakabangkarote sini sang pag-inisyatiba sang masa sa pagbato. Ginpapaang sa katungdanan si Vicente Lava apang nagpabilin pa gihapon siya sa Komite Sentral agud magpadayon sa pagpalapad sang Tuo nga oportunistang linya. Gindesisyunan man sang Komperensya ang paghanda para sa pagwarik sa parlamentaryo nga paghimakas pagbalik sang imperyalismong U.S. kag gubyernong Komonwelt base sa tiko nga kabangdanan nga nakapoy na ang pumuluyo sa inaway.

Nag-agum sang limitado nga kadalag-an ang Partido kag hangaway sang banwa tuga sang pagsikway sa sala nga polisiya nga “mag-isol agud magpangapin”. Sa sulod sang pila bulan antes mag-abot ang mga pwersang U.S., nagdaku ang teritoryo kag populasyon sa epektibo nga nasakupan sang pagpamuno sang Partido kag hangaway sang banwa. Napaidalum sa direkta nga impluwensya sang Partido kag hangaway sang banwa ang daku nga bahin sang Sentral Luzon. Ginhingalitan naman masa nga mangunguma didto ang kahimtangan nga ini agud uyatan kag panginpuslan ang mga kadutaan nga ginbayaan sang mga agalon nga mayduta. Nakadeploy man sang daku-dako nga pwersa ang yunir sang hangaway sang banwa yunit agud magtukod sang mga armado nga base sa Nabagatnan Katagalugan.

Sa bilog nga panahon sang inaway nga kontra-Hapones, wala sang matuod nga pagtumod sang igtalupangod ang pamunuan sang Partido sa pungsudnon nga pagpalapad kag pagtukod sang hangaway sang banwa. Sa

madamo nga bahin sang pungsod, nagpabilin sa kamot sang mga yunit gerilya nga maki-Amerikano ang inisyatiba sa armado nga batok sa mga manugsakop nga Hapones.

3. Paano nagpanghalit sa Partido kag rebolusyonaryo nga kahublagan ang reaksyunaryo nga linya nga burges sang liwat nga magbalik ang imperyalismong U.S. sa Pilipinas?

Wala sang ginhimo ang Partido agud lubos nga analisahon kag tadlungon ang mga kasaypanan sa nagligad. Labi pa gani nga ginpalala ang mga sayup bangud sa aktibo nga pagduso sang Tuo nga oportunistang linya ni Vicente Lava kag nanday Pedro Castro kag Jorge Frianeza nga sulunod nga nagpungko bilang pangkabilugan nga sekretaryo sang Partido sa pila ka. Bunga ini sang daku nga pagpabaya sa Marxista-Leninista nga edukasyon sa katapuan sang Partido. Bangud sa mga kasaypanan, nag-agi ang Partido kag rebolusyonaryo nga kahublagan sang mas dalagku nga mga kapaslawan sang liwat nga magbalik sa pungsod ang imperyalismong U.S.

Nangin tampok ang Tuo nga oportunistang linya sa panahon nga ini sang pagbuhi sa armas kag sa linya sang armado nga rebolusyon, pagpabanga sa ligal kag parlamentaryo nga paghimakas, kag kakulangan sang pagbuyagyag sa imperyalismong U.S. bilang kaaway sang pumuluyong Pilipino.

Sadto pa man sang panahon sang pagpakig-away nga kontra-Hapones, daku nga sayup na sang pamunuan sang Partido ang indi lubos nga pagbuyagyag sa mapangsalakay nga kinaiya sang imperyalismong US samtang bangian nga ginsakdag ang linya nga lunsay kontra-Hapones. Indi maid-id nga napahangup sa katapuan sang Partido, sa mga katapu sang hangaway sang banwa kag sa rebolusyonaryo nga masa ang kontrarebolusyonaryo nga alyansa sang imperyalismong US kag lokal nga pyudalismo bilang pundasyon sang nagaluntad nga sistema nga manughimulos kag manugpigis. Gani wala nahanda ang pamensaron sang Partido, hangaway sang banwa kag masa para sa pagbabalik sang imperyalismong US.

Ginsakdag sang Partido ang linya sang parlamentaryo nga paghimakas bilang nagapanguna nga porma sang paghimakas. Ginsaylo ang puno-talatapan sini halin sa kaumhan pabalik sa kasyudaran. Nagpasakop ang Partido sa Democratic Alliance (Alyansang Demokratiko) agud makaupod sa piniliay nga burges. Sa alyansa nga ini, ang Partido

nangin isa ka ordinaryo nga organisasyon lamang sa nagahiliugyon nga prente nga ginapangibabawan sang mga personahe nga burges.

Ang hangaway sang banwa gin-islan sang Huk Veterans League (Liga sang mga Beterano nga Huk) kag gintukod ang hayag nga mga organisasyon pangmasa pareho sang Kongreso sang mga Organisasyon sa Pangabudlay kag Pungsudnon nga Kaisahan sang mga Mangunguma agud itumod sa legal kag parlamentaryo nga paghimakas.

Base sa linya nga parlamentaryo, ang mga armas nga yara sa kamot sang masa ginlubong ukon gani gin-ampo sa kaaway sa sugo sang pamunuan sang Partido. Ang mga pinuno sang Partido, sa pagpanguna sang mga Lava kag Taruc, nagkampanya para sa “demokratiko nga kalinungan”. Ginhimuslan sang imperyalismong US kag lokal nga mga reaksyonaryo ang subong sini nga kahimtangan agud makahas nga salakayon ang hangaway sang banwa kag rebolusyonaryo nga masa. Ginmnasaker ang bilog-bilog nga mga iskwadron sang hangaway sang banwa pareho sang Iskwadron 77 kag 99. Madamuan nga gindakop kag ginapamatay ang mga kadre sang Partido, Pulang hangaway kag mga lider sang mga organisasyon pangmasa.

Makahas nga nakapanumbalik sa kaumhan ang pyudal nga paghari sang mga agalon nga mayduta. Ang mga kadalag-an pang-ekonomya kag pangpulitika nga naagom sang masa matapos lamang ang mabudlay nga paghimakas kag pagbuwis sang kabuhi ang lubos nga nadula.

Lubos nga napamatud-an ang pagkabangkarote sang linya nga parlamentaryo sang pahalinin sa reaksyunaryo nga Kongreso ang mga tiglawas sang Partido nga napilian kag nagpanguna sa legal nga kampanya batok sa *Bell Trade Act, Parity Amendments* (ukon Susog Pariti) kag iban pa nga padihut sang imperyalismong US.

Naglala nga naglala ang mga kasaypanan tubtob sa maglab-ot sa lebel sang mga panan-awan kag polisiya sang lubos nga pagpakighimbon sa kaaway kag paglikidar sa Partido. Ginsakdag ni Pedro Castro ang pagtukod sang “partido nga pangmasa” para sa parlamentaryo nga paghimakas kag ang pagtunaw sang hilikuton nga ilegal sang Partido. Ginsakdag naman ni Jorge Frianeza ang lubos nga pagbungkag sa hangaway sang banwa kag ang “pagpakig-isa ka prente” sa reaksyunaryo nga gubernong Roxas. Nagpabilin nga napasulod sa konstitusyon sang Partido nga gin-aprubahan sadtong 1943 ang hayag nga Tuo nga oportunistang linya. Ginasiling sang Seksyon 2, Artikulo VIII nga “*Ang pagtapu ukon pagpasakop sa mga aktibidad sang ano man nga hubon, sahi, paksyon ukon partido nga nagatuyo ukon nagahulag agud waskon,*

paluyahon ukon pukanon ang demokratiko nga Konstitusyon sang Pilipinas pagasilutan sang gilayon nga pagpahalin sa Partido.”

Wala sang ginhimo nga madalum nga pag-analisa kag lubos nga pagpakamalaut sa Tuo nga oportunistang linya nga nagalapnag kag nakapanggamot na sa Partido sa pihak sang nagadamo na nga kapaslawan nga gintuga sini sa rebolusyonaryo nga kahublagan. Bisan pa ginsaway kag gin-islan pareho ang liderato nga Pedro Castro kag Jorge Frianeza, wala sang nahimo nga pagpaathag sa katapuan sang Partido. Kag mas malala diri, wala sang ginlunsar nga kahublagan sa pagpanadlong agud gabuton ang gamot sa ideolohiya sang mga kasaypanan sa pulitika.

4. Paano nagpanghalit ang "Wala" nga oportunistang linya ni Jose Lava sa Partido kag rebolusyonaryo nga kahublagan?

Sadtong Mayo 1948, nagsaka sa sentral nga pamunuan ang liderato nga Jose Lava. Sa idalum sang liderato nga ini, naghabyog ang Partido sa "Wala" nga oportunistang linya nga ginkatampukan sang adbenturismo militar. Apang nagpabilin nga mabaskog nga paidalum nga ilig ang Tuo nga oportunismo.

Pagkatapos sang nagsulunod nga kapaslawan bunga sang linya nga parlamentaryo sang dalagku nga mga kahalitan nga gintuga sang makahas nga pagsupil sang kaaway, ginhingalitan ni Jose Lava ang hugot nga pangabay sang katapuan sang Partido kag sang rebolusyonaryo nga masa para sa armadong paghimakas agud makatal-os sa pamunuan. Apang gintalana sini ang adbenturista nga polisiya sang pag-agaw sang gahum pangpulitika sa bilog nga pungsod sa sulod sang duha ka tuig.

Ginbase sang liderato nga Jose Lava ang pagpati sini sa madasigan nga kadalag-an sa mga kabangdanan nga panggwa pareho sang banggianay sa kubay sang lokal nga mga reaksyunaryo bunga sang mga pagdinayaay sa piniliyay nga burges sadtong 1949, kadalag-an sang rebolusyon Tsino, inaway sa Korea, kag krisis pang-ekonomya sa United States. Wala sini ginkonsiderar ang hugot nga kinahanglanon sang lubos nga pagpanadlong sa nagligad nga mga kasaypanan kag ang mga dalagku nga katungdanan sa paghanda sang Partido kag rebolusyonaryo nga kahublagan sa sulod sang malawig nga panahon antes maagaw ang gahum sa bilog nga banwa.

Ang linya sang adbenturismo militar sang liderato nga Jose Lava ginakinaiyahan sang paglunsar sang mga aksyong militar nga lapaw sa ikasarang sang hangaway sang banwa kag sang walay pagkonsiderar sa balos-salakay sang kaaway. Dugang pa, wala sang gintalana nga maathag

nga estratehiya kag taktika bahin sa pagsulong sang armado nga paghimakas. Mas ginpatampok ang mga magarbo kag bugalon nga aksyon militar sangsa maghandum sang solido nga mga kadalag-an. Kadungan, ang mga kadre kag katapu sang Partido kag ang mga kumander kag hangaway sang hangaway sang banwa ginpaidalum sa burges nga mga pagsulundan militar kag naglapnag ang mabug-at nga pagsilot para sa mga gagmay nga kasal-anan. Mga malala nga kahalitan ang gintuga sang sala nga linya nga ini sa Partido, hangaway sang banwa kag rebolusyonaryo nga masa.

Sadtong Marso 29 kag Agosto 26, 1950, ginlunsar sang hangaway sang banwa ang hitad nga hitad kag dululungan nga pagsalakay sa mga dalagku nga kampo militar sang kaaway, mga pangprobinsya nga kapitolyo kag mga syudad. Wala magdugay ginlunsar sang kaaway ang iya kontra-opensiba nga nagtuga sang mas mga dalagku pa nga mga kahalitan sa hangaway sang banwa kag nahulog sa pasibo nga pusisyon. Sa bilog nga kasaysayan sang Partido natabo ang pinakadaku nga pagbuwis sang kabuhi sang mga kadre, Pulang hangaway kag rebolusyonaryo nga masa sa idalum sang liderato nga Jose Lava. Halos lubos nga nalutos ang hangaway sang banwa sa malip-ot nga panahon sang duha ka tuig.

Samtang, ang Partido nagpabilin nga partido nga syudad sa idalum sang liderato nga Jose Lava. Ginpamunuan sini ang armado nga paghimakas halin sa syudad. Gintunga sa duha ka bahin ang Politburo, isa nga nakabase sa syudad kag isa nga nakabase sa pinakaligwin sang Sierra Madre sa may Laguna ayon nga pareho hamulag sa pangunahon nga mga pwera sang hangaway sang banwa. Sadtong Oktubre, 1950, lubos nga napiang ang bahin sang Politburo nga nakabase sa syudad dulot sang pagkadakop sang mga katapu sini kaupod ang iban pa nga mga katapu, simpatisador kag kuryer sang Partido. Nakakumpiska ang kaaway sang madamo nga dokumento sang Partido nga ginalakipan sang listahan sang mga katapu kag taktikal nga plano kag ini iya lubos nga napuslan agud waskon ang organisasyon sang Partido sa syudad kag bungkagon ang rebolusyonaryo nga armado nga kusog sa kaumhan.

Padayon nga nakapanghalit sa mga panahon nga ini ang Tuo nga oportunismo sa pihak sang paidalum nga ilig ini sang oportunismo. Bunga ini sang kawawad-an sang lubos nga pagpanadlong sa mga kasaypanan sang nauna nga Tuo nga liderato nga simple nga ginkuha lamang sa katungdanan. Ginpakita ini sang pagpasugot kay Luis Taruc, ang mismo nga punong kumander sang hangaway sang banwa, nga magpakigsugot sa

gubyernong Quirino nahanungod sa mga kondisyon sang pag-ampo kag amnestiya para sa armado nga rebolusyonaryo nga pwersa. Labi ini nga nakademoralisa sa masa sangsa nakatiplang sa kaaway. Wala sang matuod nga Marxista-Leninista nga liderato sang Partido ang san-o man magahandom mag-ampo ukon mangayo sang pasaylo sa kaaway. Ini hayag nga kapitulasyon sa kaaway kag pagtraidor sa pumuluyo.

5. Paano natunaw ang Partido kag ang hangaway sang banwa sa idalum sang liderato nga Jesus Lava?

Ginpadayon sang nagtal-os nga liderato nga Jesus Lava ang "Wala" nga oportunistang linya sang iya utod nga si Jose Lava sa temprano nga bahin sang pagpamuno diri. Apang naghabyog ini sa Tuo nga oportunismo sang mautod ang epektibo nga kontrol sini sa mga yunit sang hangaway sang banwa kag sang makatitaw sang malala nga ita-ita dulot sang segi-segi nga pagpanglaot sang kaaway.

Wala naplastar, madaluman nga naanalisa kag nasaway ang adbenturista nga mga kasaypanan sang liderato nga Jose Lava. Ginapaburon pa gani ang mga ini sang manabaw nga rason sang liderato nga Jesus Lava sa pagsiling nga "pagpabaya" sa seguridad ang kabangdanan sang pagkadakop sang mga lider sang Partido kag kasaypanan sa taktika sang mga manubo nga kadre kag kumander ang kabangdanan sang mga kapaslawan sa militar.

Bunga sang wala natadlong nga mga kahuyangan sa ideolohiya kag pulitika, subong man sang mga halit nga gintuga sang linya sang adbenturistang militar sang liderato nga Jose Lava, nagsugod nga magtingkad ang kapitulasyonismo sa kubay sang liderato sang Partido. Talalupangdon nga ginpakita ini sang pag-ampo ni Luis Taruc sa papet nga rehimen Magsaysay sadtong 1954. Naglala ang huyog nga palaampo bunga sang nagsulunod nga kapaslawan militar. Naglala man ang demoralisasyon sa kubay sang mga kadre bangud sa mga maniobra pang-organisasyon sang dinastiya nga Lava agud lamang makapabilin sa liderato sang Partido.

Maghalin 1951 tubtob sa 1955, madamo nga nagapanguna nga lider sang armado nga paghimakas ang napikuta sang dalagkuan nga mga kampanya sang paglikup sang kaaway sa Nabagatnan Luzon, Sentral Luzon, Bikol kag Panay. Nautod ang epektibo nga kontrol sang sentral nga liderato sa mga yunit sang hangaway sang banwa nga naghatag-palaagyan sa pagsulpot kag pagkusog sang pamensaron nga rebelde nga lagawan sa kubay sang hangaway sang banwa.

Sadtong 1954, ginbungkag sang liderato nga Jesus Lava ang armado nga mga yunit nga nalab-ot pa sini kag ginhimo nga mga “brigada sa organisasyon”. Sadtong 1956, pormal nga ginsakdag sini ang linya nga parlamentaryo bilang pangunahon nga porma sang paghimakas. Nagsugod na nga maglapnag ang rebisyunismo nga Khrushchov sa mga panahon nga ini nga labi nga nagganyat sa liderato nga Jesus Lava agud iduso ang iya sala nga mga polisiya. Sadtong 1958, ginbayaan ni Jesus Lava ang kaumhan kag nagsugod nga magpamuhi nga isa ka pugante sa syudad nga hamulag sa masa.

Samtang nagapangabuhi nga isa ka pugante sa syudad, nagpapanaog si Jesus Lava sang mga “political transmission” kag direktiba kag nagbutang sang mga tinawo nga wala sang kolektibo nga talakayan sa Partido. Solo nga gindisisyunan man niya ang polisiya nga “isa-ka-pila” nga nagatalana nga ang isa ka katapu sang Partido sa isa ka panahon magpakig-angut lang sa isa ka katapu. Gani ang organisasyon sang Partido ginakomposar sang pila lang ka tag-isa-ka-direksyon nga pila. Wala magdugay nagdangat ini sa pagkadugmok sang lubos sang mga pila bangud lang sa pagkadula sang isa ka katapu sa isa ka pila. Gin-guba sini ang kolektibo nga pagpamuno kag kabuhi sang Partido, kag ang resulta amo ang epektibo nga pagkatunaw sang daan nga gintingob nga Partido.

Pagligad sang pila ka tuig, dalayon na nga nadula ang angot ni Jesus Lava sa ligal kag armado nga mga kadre sang Partido. Sadtong 1964, siya ang nag-ampo sa kaaway.

6. Ano ang malahalon nga mga leksyon nga maayap sa halintang nga ini sang kasaysayan sang Partido?

May malahalon nga mga leksyon nga maayap sang Partido sa ideolohiya, pulitika, militar kag organisasyon sa halintang nga ini sang iya kasaysayan. Ini ang mga ubay nga mapuslan sang Partido sa pagtukod sa kaugalingon sini kag sa pagpamuno sa rebolusyon Pilipino.

Ang mga nagapanguna nga leksyon sa patag sang ideolohiya ang mga masunod:

a. Dapat tukuron ang Partido base sa hugot nga paghangup sa Marxismo-Leninismo-Maoismo kag kongkreto nga pag-aplikar sini sa kongkreto nga praktika sang rebolusyon Pilipino. Katungdanan sang taga ka katapu sang Partido ang padayon nga pagpataas sa iya proletaryo nga

rebolusyonaryo nga kamuklatan. Dapat padayon kita nga magtuon sa rebolusyonaryo nga teorya kag pauswagon ang ikasarang nga isapraktika ini.

Wala sang matuod nga paghangup ang mga Lava kag Taruc sa Marxismo-Leninismo, labi nga wala sang kinaalam sa pagdapat sini sa kongkreto nga kahimtangan sang nasyon, kag pasulit-sulit nga naglisa sa mga pundamental nga prinsipyo sini. Gani nag-agi sang mga dalagku nga kapaslawan kag kahalitan ang Partido kag rebolusyon sang makalusot sila kag makapangibabaw sa Partido.

Hugot nga uyatan ang pangkabilugan nga linya sa pulitika sang demokratiko nga rebolusyon sang banwa nga nagasakdag sa armado nga paghimakas bilang pangunahon nga porma sang paghimakas kag sa parlamentaryo nga paghimakas bilang sekundaryo nga porma. Ang pagsakdag ukon paglihis diri ang makahulugan nga talaksan kon husto ukon indi ang paghangup sa Marxismo-Leninismo-Kaisipan Mao Zedong kag sa pagdapat sini sa kongkreto nga kahimtangan sang pungsod. Nagapangibabaw nga kasaypanan sang mga Lava kag Taruc ang paglihis sa pangkabilugan nga linya sang demokratiko nga rebolusyon sang banwa. Gin-ilis nila ang linya nga burges nga palaampo kag pagpakighimbon sa mga nagahari nga sahi kag bunga sini nag-agum sang dalagku nga kapaslawan kag kahalitan ang Partido kag rebolusyon.

b. Hugot nga pamatukan ang ano man nga tipo sang suhetibismo, dogmatismo ukon empirisismo man, sa sulod sang Partido. Ang suhetibismo ang pag-umpisa sa suhetibo nga kagustuhan kag panan-awan, sa baylo nga sa pag-analisar sa obhetibo kag kongkreto nga kahimtangan. Ang suhetibismo manipestasyon sang ideyalismo sa sulod sang Partido.

Empirisismo ang nagapangibabaw nga kasaypanan sa ideolohiya sang mga Lava kag Taruc. Ginkatampukan ini sang pagbuhi sa madamo nga pundamental nga prinsipyo sang Marxismo-Leninismo kag mga pahat-pahat, pangmadalian kag hapaw nga pag-analisa sa mga hitabo kag kahimtangan; ang istatiko kag bangian nga sobra nga pagtanya sa kusog sang kaaway kag pagpakagamay sa pwersa sang rebolusyon. Ini ang basehan sa ideolohiya sang ila linya nga palaampo.

Matingkad nga nagpangibabaw naman ang dogmatismo sadtong panahon sang adbenturismo militar sa idalum sang liderato nga Jose Lava kag sa damlag nga bahin sang liderato nga Jesus Lava. Ang istatiko kag bangian nga pag-analisa nga ginsalaming sang sobra nga pagtanya sa

pwera sang rebolusyon kag sobra nga pagpakanubo sa pwera sang kaaway.

Ang pagtuhaw sang suhetibismo sa sulod sang Partido ang repleksyon sang banggianay sang mga sahi sa katilingban. Makaguluba ini nga mga impluwensya sang pamensaron nga petiburges nga dala-dala kag ginapalapnag sang mga katapu nga indi lubos nga nagahimulat agud lubos nga makaremolde sa ila panan-awan sa kalibutan base sa materyalismo nga diyalektiko kag istoriko. Sa katilingban nga malakolonyal kag malapyudal, daku ang petiburgesya kag lapnagon ang impluwensya sang pamensaron sini. Gani dapat permi nga magmatyag kag pamatukan ang suhetibismo kag impluwensya nga petiburges sa sulod sang Partido. Kinahanglan nga muklat nga sakdagon ang materyalismo nga diyalektiko kag istoriko kag padayon nga pataason ang lebel sang paghangup sang bilog nga Partido sa Marxismo-Leninismo-Maoismo.

k. Dapat permi nga sumahon ang mga inagihan kag maghiwat sang pagsaway kag pagsaway sa kaugalingon agud gilayon nga matadlong ang mga kasaypanan kag permi nga maseguro nga ang Partido naga-usoy sa husto nga banas. Ang mga Lava kag Taruc nahadlok sa pagsaway kag pagsaway sa kaugalingon. Sa malawig nga panahon nga nagpangibabaw sila sa Partido, natabo ang nagsulunod nga mga dalagku nga kasaypanan nga naghalit sa Partido. Apang bunga sang sobra nga pagpakamahal nila sa amor propyo kag pagsupil sa ano man nga pagsaway sa ila pagpamuno, nagtinarankos ang mga kasaypanan kag kagamo sa pamensaron sa sulod sang Partido. Nadisarmahan ang pamensaron sang bilog nga Partido kag padayon nga nagpanghalit ang reaksyunaryo nga linya nga burges tubtob sa natunaw ang organisasyon sang Partido kag halos ang bilog nga pwera sang rebolusyon.

Ang mga nagapanguna nga leksyon sa patag sang pulitika:

a. Kinahanglan nga tukuron ang pinakahugot nga angtanay sa tunga sang Partido kag sang malapad nga masa base sa husto nga linya sa pulitika. Makahulugang ang papel sang husto nga linya sa pulitika agud sabton ini. Bangud sa paliwat-liwat nga paglihis diri sa idalum sang pagpamuno sang reaksyunaryo nga linya nga burges sang mga Lava kag Taruc nahamulag ang Partido sa malapad nga masa kag mahapos nga napusa sang kaaway.

Kinahanglan nga pamatukan ang Tuo kag "Wala" nga oportunidad sa sulod sang Partido. Ang Tuo nga oportunidad amo ang pagbiya sa basehan nga rebolusyonaryo nga mga katungdanan kag pag-usoy sa linya sang pag-ampo, pagpakighimbon kag pangangayupapa sa kaaway. Ini ang nagapangibabaw nga kinaiya kag kasaypanan sang reaksyunaryo nga linya nga burges sang mga Lava kag Taruc.

Ang "Wala" nga oportunidad naman amo ang padasu-daso nga pagsulong sa mga aksyon nga labaw sa ikasarang sang rebolusyonaryo nga pwera bunga sang bangian nga sobra nga pagtanya sa pwera sang rebolusyon kag sobra nga pagpakagamay sa kaaway, sang pagkataka kag sang pagpadasu-daso.

b. Maghimud-os sa armado nga paghimakas bilang pangunahon nga porma sang paghimakas samtang ginapauswag ang parlamentaryo nga paghimakas bilang sekundaryo nga porma. Tubtob san-o, indi dapat buhian sang Partido ang armas kag bungkagon ang hangaway sang banwa agud lamang magpakabanga sa parlamentaryo nga paghimakas, sa atubang sang makahas nga pagsalakay kag pagpanghalit sang kaaway sa rebolusyonaryo nga kahublagan, sa panahon nga nagabaha ang rebolusyonaryo nga paghimakas kag mas nagapangingibabaw sa masa ang impluwensya sang mga reaksyunaryo.

k. Ipatuman ang rebolusyon agraryo bilang pangunahon nga kaundan sang demokratiko nga rebolusyon sang banwa. Ini ang pangunahon nga nagpaseguro sang mabakud nga pagpanggamot sang Partido sa masa nga mangunguma. Sa bilog nga panahon sang pagpangibabaw nila sa Partido, wala bisan san-o seryoso nga gin-asikaso sang mga Lava kag Taruc ang rebolusyon agraryo. Bisan sa panahon sang adbenturismo militar, wala nahangpan sang liderato nga Jose Lava ang hugot nga pag-angot sang rebolusyon agraryo kag armado nga paghimakas. Ginsakdag sini ang linya nga lunsay militar nga nagatalana sang madasigan nga kadalag-an-militar sa bilog nga banwa. Bangud sa pagpabaya sa rebolusyon agraryo kag sa iban pa nga mga dalagku nga kasaypanan, nangin buhaghag ang rebolusyonaryo nga baseng masa nga ginatukod sa kaumhan gani mahapog nga ginabungkag sang kaaway.

d. Tukuron ang rebolusyonaryo nga nagahiliugyon nga prente nga nagaalagad sa armado nga paghimakas kag nakabase sa alyansa sang sahi nga mamumugon kag sahi nga mangunguma. Lubos nga wala nahangpan

sang mga Lava kag Taruc ang katungdanan nga ini. Ang pagpakig-isa ka prente nga ginbuylugan nila sa masami para sa parlamentaryo nga paghimakas. Nasisilaw man ang mga Lava kag Taruc sa prestihiyo sang mga personahe nga burges gani ipinaubaya nila ang pagpamuno sa nagahiliugyon nga prente nila sa mga ini. Burges nga pagpakigkompromiso ang ideya nila sa nagahiliugyon nga prente kag indi ang prinsipyado nga pagpakig-isa ka prente sa idalum sang pagpamuno sang Partido. Ini bangud wala nila nahangpan ang makahuluga nga papel sang sandigan nga alyansa sang sahi nga mamumugon kag sahi nga mangunguma nga matukod kag mapabakud sa tunga sang armado nga paghimakas bilang pundasyon sang rebolusyonaryo nga nagahiliugyon nga prente.

Ang mga nagapanguna nga leksyon sa patag sang militar:

a. Makahuluga ang pagtukod sang isa ka hangaway sang banwa nga yara sa idalum sang absoluto nga pagpamuno sang Partido. Kon wala sang hangaway sang banwa, wala bisan ano ang pumuluyo. Tuman kaathag sini sa inagihan sang Partido. Sa panahon nga mabaskog kag nagasulong ang hangaway sang banwa, nagapagsik kag nagabaskog ang bilog nga rebolusyonaryo nga kahublagan. Makaagom ang masa sang demokratiko nga gahum sa pulitika kag ekonomiya. Sa panahon nga wala ukon hungod nga ginabungkag ang hangaway sang banwa, wala sang pili nga ginasalakay kag ginaguba sang kaaway ang Partido, rebolusyonaryo nga kahublagan pangmasa kag ang pumuluyo. Wala ini nahangpan sang mga Lava kag Taruc.

b. Nakasandig ang husto nga linya militar sa husto nga linya ideolohiya kag pulitika. Dapat mahakos ang diyalektiko nga relasyon sang ideolohiya, pulitika kag militar kag pamatukan ang panan-awan nga lunsay militar.

Maugat ang mga kasaypanan sang mga Lava kag Taruc sa patag militar sa ila mga kasaypanan sa ideolohiya kag pulitika. Sa esensya, ang kasaypanan sang mga Lava kag Taruc ang pagpanginwala sa makahuluga nga kamalahalon sang armado nga paghimakas kag rebolusyonaryo nga hilikuton militar sa pagtukod sang Partido kag sa pagtungod sa mga basehan nga katungdanan sa pulitika sang rebolusyon. Sa mga panahon naman nga nagalunsar sila sang armado nga paghimakas, wala nila ginaathag ang husto nga basehan sa teorya kag ang basehan nga mga katungdanan sa pulitika sang pagpakig-away. Nagasalimuan sila sa burges

nga mga pagsulundan kag pamaagi militar. Nagakabanga sila sa pagsulong sang hilikuton militar nga indi husto nga ginakonsiderar kag ginatungdan ang mga katungdanan sa ideolohiya kag pulitika nga amo ang pundasyon sang kadalag-an sa militar. Wala nila nahangpan ang hugot nga pag-angot sang armado nga paghimakas kag sang pagtukod sang Partido kag rebolusyonaryo nga nagahiliugyon nga prente.

k. Sakdagon ang malawigan nga inaway banwa kag ang pagsulong sang armado nga paghimakas kalakip sang pagsulong sa rebolusyon agraryo kag pagtukod sang baseng masa. Ipatuman ang estratehiko nga prinsipyo sang paglikup sa kasyudaran halin sa kaumhan. Seguraduhon ang pagkatag sang malapad kag solido nga pundasyon para sa pag-agaw sang gahum pangpulitika paagi sa hulu-halintang kag mahipid nga pagpauswag sa kusog kag ikasarang sang Partido, hangaway sang banwa kag rebolusyonaryo nga kahublagan pangmasa. Kinahanglan nga magtukod sang mga baseng bukid kag magsulong sang pabalod-balod halin sa mga ini. Bangud sa ila linya nga lunsay militar, pagsako kag pagkataka, dalagkuan nga ginlapas ini sang mga Lava kag Taruc halin 1949 tubtob sa 1954.

d. Sa paglunsar sang mga aksyong militar, isakonsiderar ang diyalektiko nga relasyon sini kag sang balos-salakay sang kaaway. Dapat may konsiderasyon kag paghanda para sa mga balos-salakay sang kaaway agud permi nga mapasanto sa ikasarang sang mga rebolusyonaryo nga pwera ang lebel kag kabug-aton sang pagpakig-away. Sa subong sini nga pamaagi, ang pagsulong sang inaway banwa kag pagpabakud sa hangaway sang banwa matungdan sa pamaagi nga sistematiko. Malikawan ang pagsurong sang Partido, hangaway sang banwa kag rebolusyonaryo nga masa sa mga inaway nga labaw sa ila ikasarang. Sa panahon sang adbenturismo militar, dalagkuan nga ginlalis ini sang mga Lava kag Taruc kag bangud diri nag-agom sang dalagku nga mga kapyerdehan kag kahalitan ang Partido kag rebolusyon.

e. Siguruhon ang absoluto nga pagpamuno sang Partido sa hangaway sang banwa kag tukuron ang isa ka hangaway sang banwa nga ginaubayan sang proletaryo nga rebolusyonaryo nga ideolohiya. Ginsunod sang mga Lava kag Taruc ang mga pagsulundan kag pamaagi nga burges sa militar sa pagtukod kag pagpamuno sa hangaway sang banwa. Wala nila ginsiguro ang hugot nga pagpamuno sang Partido sa hangaway sang banwa. Wala nila lubos nga ginpamatukan ang mga indi-proletaryo nga

pamensaron nga naglapnag sa sulod sang hangaway sang banwa. Ang Marxista-Leninista nga linya sa militar sang malawigan nga inaway banwa kag ang estratehiya kag taktika nga kalakip sini wala napahangup kag napaggamot sa hangaway sang banwa. Bangud sa daku nga kakulangan nga ini, ang hangaway sang banwa wala napauswag agud mangin matuod nga kuta kag basehan sang demokratiko nga gahum sang banwa. Ginbahiran ini sang mga pamensaron nga palaampo, lunsay militar kag rebelde nga lagawan nga nagpahuyang diri tubtob sa ang hangaway sang banwa mahamulag sa malapad nga masa kag halos lubos nga mapusa sang kaaway.

Ang mga nagapanguna nga leksyon sa patag sang organisasyon:

a. Dapat tukuron ang isa ka partido nga pungsudnon ang sakop kag may malapad nga kinaiya nga pangmasa. Kinahanglan nga makatag kag makapanggamot ang organisasyon sang Partido sa lain-lain nga bahin sang pungsod agud epektibo nga matungdan sini ang katungdanan sang pagpamuno sa rebolusyonaryo nga kahublagan sa bilog nga banwa. Dapat magpatuhaw ang Partido sang daku nga isip sang mga kadre kag mga basehan nga yunit nga may hugot nga angot kag madalum nga panggamot sa malapad nga masa. Sa subong sini nga pamaagi, mangin matuod nga epektibo ang pagpatuman sang pagpamuno sang Partido sa rebolusyonaryo nga mga paghimakas sang malapad nga masa sang pumuluyo. Ang pagtuman sa katungdanan nga ini isa ka malawig, mabudlay kag marikot nga proseso nga dapat waay kataka nga pursigeran sang Partido. Bisan san-o wala gin-athag kag ginahatagan-igtalupangod ini sang mga Lava kag Taruc.

b. Kinahanglan pamatukan ang liberalismo, sektarismo, sentimentalismo kag karerismo. Liberalismo ang paglikaw sa prinsipyado nga pagpakigbanggi sa ideolohiya sa sulod sang Partido, ang pagbaton sang mga katapu ukon paghatag sang mga katungdanan indi base sa ila paghangop kag katampad sa mga rebolusyonaryong prinsipyo kundi base sa mga konsiderasyon personal. Sektarismo ang pagpangindi nga palaparon ang Partido labina sa kubay sang masang anakbalhas ukon ang tuman ka eksihido nga pagtratar sa mga kadre kag katapu sang Partido agud mapangibabaw ang impluwensya sang isa ka gamay nga hubon. Ang sentimentalismo isa ka dagway sang liberalismo. Tuman nga ginapakamahala sang mga sentimentalista ang daan nga pag-inupdanay

ukon mga ginahaum-haom nga sakripisyo sang mga nakasala agud likawan ang madaluman nga pagsaway kag lubos nga pagpanadlong. Ang karerismo ang paghangad sang mataas nga pusisyon para sa kaugalingon nga pagpahambog kag benepisyo. Ginpalapnag sang mga Lava kag Taruc ang nasambit nga mga sakit sa organisasyon sang Partido agud ipanagil-ot ang ila linya nga burges kag ipabilin ang ila garuk nga pagpamuno. Bangud diri, amat-amat nga napatay ang kritikal kag militante nga ispiritu sa sulod sang Partido.

k. Sakdagon ang prinsipyo sa organisasyon sang demokratiko sentralismo kag pamatukan ang kumandismo kag burukratismo. Ginpangibabaw sang demokratiko sentralismo ang kolektibo nga opinyon kag pagdisisyon sa sulod sang Partido agud matukod ang pinakamalig-on kag muklat nga paghiliusa kag disiplina. Dalagkuan nga ginlalis ini sang mga Lava kag Taruc. Sa malawig nga pagpangibabaw nila sa Partido, ginupangan sang mga Lava kag Taruc ang pagpatingkad sang mapuslanon nga partisipasyon sang masa nga katapuan sa pagdesisyon sa malahalon nga mga halambalanon. Ginpabay-an nila ang pagpataas sa lebel sang kamuklatan sa ideolohiya kag pulitika sang masang katapuan kag ginpungan nila ang pagpauswag sang demokrasya sa sulod sang Partido agud mapabilin ang paghari nila diri. Ang pinakatalalupangdon nga paglapas sa demokratiko sentralismo amo ang kaugalingon nga pagdesisyon ni Jesus Lava sa polisiya nga “isa ka linya” nga nagbunga sang pagkatunaw sang kolektibo nga pagpamuno kag kabuhi sang Partido.

Ang kumandismo kag burukratismo amo ang mga paglapas sa demokratiko sentralismo. Ang kumandismo ang pagmonopolisa sang isa ukon pila ka tawo sa pagdisisyon sang Partido. Ang burukratismo ang pagtukod kag paghulag sang isa ka hubon nga nagapamuno nga nagaangkon sang ispesyal nga mga pribilehiyo kag nagahulag sang hamulag sa masa. Ang kumandismo kag burukratismo mga malain nga istilo sang pagpamuno nga gindala sang mga Lava kag Taruc sa sulod sang Partido.

K. Ang Liwat nga Gintukod nga Partido Komunista sang Pilipinas (MLM)

1. Ano ang nagaluntad nga kahimtangan antes liwat natukod ang Partido gikan sa abo sang rebisyunistang daan gintingub nga Partido?

Sadtong dekada '50 wala na sang mapuslanon nga rebolusyonaryo nga kahublagan pangmasa nga naghangkat sa imperyalismong US kag lokal nga mga reaksyunaryo. Pero halin 1959 tubtob sa 1968 liwat nga nag-igrab ang kahublagan pangmasa nga kontra-imperyalista kag kontrapyudal. Ginakabig man ang panahon nga ini nga paghanda para sa pagtukod sang isa ka bag-o nga Partido.

Ginhangad sang reaksyon nga upangan ang liwat nga pagbangon sang rebolusyonaryo nga kahublagan paagi sa nanuhay-tuhay nga kontra-komunista nga pagpahadlok ukon pagpang-ipit. Pero ang mga ini ginkumpronta sang protesta nga mga aksyong masa nga gin-umpisahan sang bag-o nga ulhot nga mga lamharon nga proletaryo nga rebolusyonaryo nga wala sang pagderiher halin sa indi-hayag nga salin sang daan nga gintingob nga Partido. Talalupangdon diri ang demonstrasyon sang 5,000 istudyante, kalabanan halin sa Unibersidad sang Pilipinas, sadtong 1961. Ini ang solo nga hitabo nga nagbuka sa malawig nga panahon sang pamamayagpag sang reaksyon kag nag-umpisa pamukaw sa liwat nga pagpagsik sang rebolusyonaryong kahublagan pangmasa nga amo ang naghatag-palaagyan sa pagtuhaw sang pungsudnon-demokratiko nga kahublagan.

Kasunod sang mga kadalag-an, ginpasangkad sang mga lamharon nga proletaryo nga rebolusyonaryo ang mga aktibidad sa pagtuon kag pag-organisar sa iban pa nga mga unibersidad sa Manila. Samtang hayag nga ginapalapnag ang pangkabilugan nga linya sang pungsudnon-demokratiko nga rebolusyon, likum man sila nga nagaorganisa sang Marxista-Leninista nga mga grupo sa pagtuon.

Sang matalupangdan ni Jesus Lava ang militante nga kahublagan nga progresibo kag ang panugod nga mga pagtinguha sang militante nga pamatan-on nga mag-angot sa mga organisasyon sang progresibo nga mamumugon kag mangunguma, gin-imbatar niya ang tiglawas sang militante nga pamatan-on kag ang tiglawas sang progresibo nga mga unyon nga magpatapu sa daan nga gintingob nga Partido nga PK-PS, kag magpungko sa komiteng manugpatuman nga gintukod niya sadtong ulihi nga bahin sang 1962. Sigun sa dinastiko nga tradisyon sang mga Lava, ginhingadlan man niya sa lima-katawo nga komite ang duha sa iya mga hinablos nga wala sang ano man nga kahalabtan sa ano man nga tipo sang kahublagan pangmasa.

Aktibo nga nag-angot ang mga lamharon nga proletaryo nga rebolusyonaryo sa beterano nga mga kadre kag masa sa mga progresibo

nga unyon kag asosasyon mangunguma. Tayuyon nga nagdaku ang kahublagan pangmasa sang mga pamatan-on, mamumugon kag mangunguma. Sadtong 1964, gintukod ang KM bilang kumprehensibo nga organisasyon pangmasa sang pamatan-on sa kubay sang mga istudyante, mamumugon, mangunguma kag propesyunal. Nangin militante ang duha ka ligal nga pederasyon sa pangabudlay kag pila ka unyon sa idalum sang Partido sang Mamumugon sadtong 1963 (liwat nga gin-ngalanan nga Partido Sosyalista sadtong 1964). Sa idalum sang ngalan nga MASAKA, liwat nga nabuhi ang kahublagan mangunguma sadtong 1963.

Pinakaaktibo ang mga lamharon nga kadre nga proletaryo nga rebolusyonaryo sa pagsakdag sang pagtuon sa mga sinulatan nanday Marx, Engels, Lenin, Stalin kag Mao kag sa pagtukod sang mga grupo sang Partido sa mga organisasyon pangmasa kag mga sanga sang Partido sa mga lokalidad agud magserbi nga rebolusyonaryo nga tugas sang kahublagan pangmasa. Sila man ang pinakamilitante sa paglunsar sang mga welga sang mamumugon kag aksyon masa agud ibuyagyag kag pamatukan ang kontra-nasyunal kag kontra-demokratiko nga mga polisiya sang reaksyunaryo nga gubyerno.

Naglapnag man ang mga balasahon nga nagaathag sang mga isyu sa ekonomiya, pulitika kag kultura base sa pungsudnon-demokratiko nga linya kag nagareplektar sa pagsulong sang mga pangmasang paghimakas sa mga panahon nga ini. Sadtong 1967 nagguwa ang libro nga Maghimakas para sa Pungsudnon nga Demokrasya nga nangin pinakamalalahanon kag pinakakomprehensibo nga materyal sa pagpalapnag sang pungsudnon-demokratiko nga linya. Halin sa punto-de-bista sang Marxista-Leninista nga panindugan, panan-awan kag pamaagi, ginaathag sini ang mga halintang sang kasaysayan sang Pilipinas, malakolonyal kag malapyudal nga kinaiya sang katilingban Pilipino, kag ang kinahanglanon sang isa ka pungsudnon-demokratiko nga rebolusyon agud hilwayon ang pumuluyong Pilipino sa dominasyon nga dumuluong kag pyudal.

Sa pihak sang pagkahamulag sang hubon nga Lava sa mga bilin sang hangaway sang banwa nga nagsupak sa polisiya ni Jesus Lava sadtong 1955 nga likidahon ang hangaway sang banwa, nagpauswag sang relasyon ang mga lamharon nga proletaryo nga rebolusyonaryo, sa mga kadre kag kumander sini, paagi sa paghatag sa ila sang rebolusyonaryo nga propaganda kag mga sinulatan nga Marxista-Leninista, labi na yadtong kay Kaupod nga Mao Zedong. Ang tsapter sang Kabataang Makabayan sa Sentral Luzon ang nagpaseguro sang tayuyon nga pagpakig-angtanay sa ila.

Ang mga lamharon nga kadre nga proletaryo nga rebolusyonaryo nga nagpatapu sa daan nga gintingob nga Partido nagdaog sa pag-uyat sang inisyatiba sa ideolohiya, pulitika kag organisasyon. Nagtukod sila sang mga sanga sang Partido kag gintuga ang liwat nga pagpagsik sang rebolusyonaryo nga kahublagan. Sa pila ka panahon, nagpakunu-kuno nga nagapakig-isa sa rebolusyonaryo nga linya ang mga manunubli sang dinastiyang Lava. Apang sadtong Disyembre, 1965, nagsugod nga mag-init ang banggianay sa sulod sang Partido kaangot sang mga pundamental nga isyu, sang iplastar sang tiglawas sang mga lamharon nga kadre nga proletaryo ang pangkabilugan nga pahayag nga ginmandu sang komiteng manugpatuman nga iya balayon.

Pareho sang nagakadapat, gintinguhaan iplastar kag analisahon sang pangkabilugan nga pahayag ang kasaysayan sang daan nga gintingob nga Partido kag ipaathag ang mga mayor nga kasaypanan kag kakulangan nga nagresulta sa grabe nga kapaslawan sang rebolusyonaryo nga kahublagan sadtong dekada '50. Ang nagapanguna nga katuyuan sini amo nga tadlungon ang mga kasaypanan kag kakulangan kag itum-ok ang kakinahanglanon nga umpisahan liwat ang armado nga rebolusyon. Bisan bukas kag tampad nga ginplastar ang pahayag nga santo sa mandu, ginpakamalain ini sang mga manunubli sang dinastiyang Lava kag isa sa ila ang nagproponer nga himuon na lamang isa ka memorandum ang pahayag agud mabuligan siya kuno, sa pagbalay sang panibag-o nga borador nga bisan san-o wala niya ginhimo. Mas malala pa, nagpalapnag siya sang mga intriga kontra sa naghimo sang pahayag kag kontra sa rebolusyonaryo nga linya.

Ang pangsulod nga banggianay sa Partido nagtiyog sa mga isyu sang suhetibismo kag oportunistismo nga Lava, kag moderno nga rebisyunismo nga nakasentro sa Sobyet. Luyag ipilit sang mga traidor nga rebisyunistang Lava ang ila linya sang walay-katapusan nga paghimakas nga parlamentaryo sa mga proletaryo nga rebolusyonaryo kag pumuluyo. Ang ila linya gin-anak sang ila kaugalingon nga burges nga suhetibista kag oportunista nga panan-awan sa kalibutan kag sang linya sang mga traidor nga rebisyunistang Sobyet.

Nangin tuman kabug-at ang banggianay sang duha ka linya sa tunga sang mga proletaryo nga rebolusyonaryo kag traidor nga rebisyunistang Lava tubtob sa magpamahog ang naulihi sang pisikal nga pagpanakit sa una. Indi malikawan gani nga magdisisyon ang mga proletaryo nga rebolusyonaryo nga kadre sadtong Abril, 1967, nga maghalin sa daan nga Partido nga gintingob, kag ilunsar ang mapagsik nga

kampanya sang pagsaway kag pagsikway sa mga traidor nga rebisyunistang Lava kag magsugod nga maghanda para sa liwat nga pagtukod sang Partido. Gintawag ini nga ang [*Unang*] *Dungganon nga Kahublagan sa Pagpanadlong* nga nagatuyo nga tukuron ang isa ka proletaryo nga partido sa idalum sang teoretikal nga ubay sang Marxismo-Leninismo-Kaisipan Mao Zedong.

2. Paano liwat nga natukod ang Partido Komunista sang Pilipinas sa ubay sang Marxismo-Leninismo-Maoismo? Ano ang Una nga Dungganon nga Kahublagan sa pagpanadlong kag kapuslanan sini sa pagtukod sang Partido Komunista sang Pilipinas?

Ang liwat nga pagtukod sang Partido Komunista sang Pilipinas ginkinaiyahan sang integrasyon sang unibersal nga teorya sang Marxismo-Leninismo-Maoismo sa mga kongkreto nga kahimtangan kag kongkreto nga praktika sang rebolusyon Pilipino. Paagi sa Marxista-Leninista nga panindugan, panan-awan kag pamaagi, lubos nga gintun-an kag gin-analisar ang kasaysayan kag mga subong nga sirkumstansya sang mga proletaryo nga rebolusyonaryo nga kadre kag sang pumuluwong Pilipino.

Sa sulod sang kapin sa isa ka tuig antes ang liwat nga pagtukod sang Partido, ginhiwat ang Una nga Dungganon nga Kahublagan sa pagpanadlong sandig sa linya nga Marxista-Leninista. Ang mga mayor nga kasaypanan kag kakulangan sang daan nga Partido Komunista (halin 1930) kag sang kasunod sini nga gintingob nga Partido (halin 1938) gintumod, ginsaway kag ginsikway. Ang mga pinakamakahalalit nga kasaypanan ang serye sang mga pagsayup sang magulutod nga Lava nga nagtindog nga mga pangkabilugan nga sekretaryo sang daan nga gintingob nga Partido sa panahon nga halin 1942 tubtob 1954. Gin-igo sila sang suhetibismo nga burges kag nagpawaslik-waslik sa Tuo kag "Wala" nga oportunismo.

Ang dokumento nga *Tadlungon ang mga Kasaypanan kag Liwat nga Tukuron ang Partido* matutom nga gintun-an sang mga proletaryo nga rebolusyonaryo nga kadre kag mga abanse nga rebolusyonaryo nga aktibistang masa. Gintun-an kag gin-analisar nila ang kasaysayan kag mga sirkumstansya sang sahi nga mamumugon kag sang bilog nga pumuluyo. Ginpreparar man kag gintun-an ang *Programa Para Sa Demokratiko nga Rebolusyon sang Banwa* kag ang *Konstitusyon sang Partido*. Ginpalapnag ang mga Marxista-Leninista nga klasika nanday Marx, Engels, Lenin, Stalin kag Mao. Samtang seryoso nga ginatun-an ang rebolusyonaryo nga teorya sang proletaryado kag ang linya pang-ideolohiya kag pangpulpitika

nga nagasanto sa kongkreto nga mga kahimtangan sa Pilipinas, ang mga proletaryo nga rebolusyonaryo nga kadre yara sa unahan man sang ligal nga demokratiko nga kahublagan kag determinado nga liwat nga itukod ang Partido Komunista sang Pilipinas.

Tayuyon nga ginsakdag sang mga proletaryo nga rebolusyonaryo nga kadre ang Marxista-Leninista nga linya sa ideolohiya, pulitika kag organisasyon. Halin sadtong umpisa sang dekada 1960, sila ang naghimo sang paathag sa malakolonyal kag malapyudal nga kinaiya sang katilingban Pilipino, sa kinaiya sang subong nga rebolusyon bilang pungsudnon-demokratiko nga bag-o nga tipo (ginapamunuan sang proletaryado), sa mga motibo nga pwera, sa mga target, sa estratehiya kag mga taktika kag sa sosyalista nga perspektiba sang rebolusyon Pilipino.

Nagpadayon ang Una nga Dunganon nga Kahublagan sa pagpanadlong tubtob sa 1972 sa diin madinalag-on nga nakatag ang Partido sa bilog nga pungsod, napaugat na ang Bag-ong Hangaway sang Banwa sa kaumhan, malig-on nga nagsulong ang ligal nga demokratiko nga kahublagan nga ginaubayan na sang naathag nga estratehiya kag taktika sang demokratiko nga rebolusyon sang banwa kag naplastar ang mga sandigan nga polisiya sang Partido sa pagtukod sa Partido, armado nga paghimakas kag nagahiliugyon nga prente.

Ang kahublagan sa pagpanadlong isa ka malahalona nga pamaagi agud pabakuron ang isa ka rebolusyonaryo nga partido kag agud pamatukan kag mapangibabawan ang mga kasaypanan kag kakulangan nga nagapahuyang diri labina ang mayor amo ang kinaiya nga may pila ka panahon na nga natipon. Kon indi bangud sa Una nga Dunganon nga Kahublagan sa pagpanadlong nga kadungan sang liwat nga pagkatukod sang Partido, indi tani nakalatag sang solido nga pundasyon ang Partido kag indi man tani ini madinalag-on nga nag-uswag.

3. Paano kumulatibo nga nag-uswag kag nagsulong sang hulu-halintang ang rebolusyonaryo nga kahublagan sa pagpamuno sang Partido Komunista sang Pilipinas halin 1968 tubtob 1979?

Nangin makahuluga ang husto nga linya sa ideolohiya, pulitika kag organisasyon sang Partido agud kumulatibo nga mag-uswag kag magsulong sang hulu-halintang ang rebolusyonaryo nga kahublagan sa pagpamuno sang Partido Komunista sang Pilipinas. Sandig sining husto nga linya, ginpatuman sang Partido ang masunod:

- Pagpalapnag sang Marxismo-Leninismo-Maoismo paagi sa pagbalay sang tatlo-ka-lebel nga kurso sang Partido. Ang abanse kag intermedya nga kurso ginadumalahan sang Rebolusyonaryo nga Buluthuan sang Kaisipan Mao Zedong kag ang Pungsudnon nga Departamento sa Edukasyon ang nagadumala sa basehan nga kurso nga pangpartido. Kadungan, nagpanawagan para sa mapagsik kag malaparan nga pangkabilugan nga edukasyong masa bahin sa pungsudnon-demokratiko nga rebolusyon. Nagsalhin, nagbalhag kag nagpanagtag sang mga kinahanglanon nga balasahon. Ginsalhin kag ginpadamo ang mga sinulatan ni Mao Zedong. Naghimo ang Partido sang isa ka seleksyon sang mga natungdan nga sinulatan sa pito ka libro sa masunod nga mga tig-ulo: *Nahanungod sa Pilosopiya*, *Nahanungod sa Pag-analisar sa Sahi kag Pangkatilingban nga Pagpanayasad*, *Nahanungod sa Pagtukod sang Partido*, *Nahanungod sa Armado nga Paghimakas (duha ka libro)*, *Nahanungod sa Nagahiliugyon nga Prente kag Nahanungod sa Hilikuton Pang-ekonomya kag Reporma sa Duta*. Ang mga ini nakapatungod sa kurso nga intermedya sang Partido kag para sa abanse nga pagbasa kag pagtuon sang mga organo, yunit kag mga indibidwal nga katapu sang Partido.
- Pagtukod sa Bag-ong Hangaway sang Banwa bilang pangunahon nga organisasyon sang Partido nga ara sa absoluto nga pagpamuno sini. Ang BHB naglunsar sang gerilya nga pagpakig-away. Kag, paagi sa mga ambus kag reyd, napadamo sini ang isip sang riple nga awtomatik halin sa gin-umpisahan nga siyam.
- Tayuyon nga pagpamuno kag pagpauswag sa ligal nga demokratiko nga kahublagan pangmasa nga nakabase sa kasyudaran. Ginakoordinar sang Partido ang rebolusyonaryo nga paghimakas pareho sa sakop sang kasyudaran kag kaumhan. Sa padayon nga pagpamuno sa demokratiko nga kahublagan pangmasa nga ligal nga nakabase sa kasyudaran, ginhatagan-direksyon kag ginpatuman sang Partido ang Unos sang Una nga Kwarto sang 1970. Ginbug-os ini sang mga semanal nga demonstrasyon kag martsa nga ginpasakpan sang 50,000 tubtob 100,000 pamatan-on kag mamumugon sa Metro Manila kag daku-dako sang isip sang pamatan-on kag iban pa nga pumuluyo sa mga syudad sa probinsya. Ang mga aksyon pangmasa nga ini nagpalapnag sang pangkabilugan nga linya sang pungsudnon-demokratiko nga rebolusyon kag nagbun-ag sang gamhanan nga kahublagan pangmasa

sa bilog nga banwa. Nagpatuhaw ang mga ini sang mga abanse nga aktibistang masa nga sa ulihi nagtapu sa Partido Komunista kag Bag-o nga Hangaway sang Banwa.

- Pagsakdag sa nagahiliugyon nga prente, pangunahon para sa armado nga paghimakas, kag nagapangduha para sa ligal nga paghimakas. Ang rebolusyonaryo nga linya sa sahi sa kabilugan sang pungsudnon-demokratiko nga rebolusyon amo man ang makasahi nga linya para sa pagpauswag sang nagahiliugyon nga prente.
- Nagpanawagan ang Partido sa paghatag-kabuhi sa isa ka pormal nga organisasyon sang pungsudnon nga nagahiliugyon nga prente kag nagpresintar ini sang 10-ka-punto nga programa sang Pungsudnon Demokratiko nga Prente (National Democratic Front) sadtong Abril 24, 1973. Sandig sa programa nga ini, ang Komite nga Manughanda sang NDF (NDF-Prepcom) nagtinguha nga ikoordina ang paglab-ot sa mga anay ligal nga organisasyon nga napilitan maghulag sa likum, habigon ang mga alyadong gikan sa petiburgesya sa syudad kag nahanunga nga burgesya, kag tukuron ang mga relasyon sang pagbuligay sa mga reaksyunaryo nga hubon kag lider nga batuk sa pasistang diktadurya sang nagahari nga hubon US-Marcos.
- Nagtukod ang Partido sang isa ka daku nga baseng masa nga nagaabot sa 50,000 ka tawo sa Isabela kag Nueva Vizcaya, magluwas pa sa Sentral Luzon. Ang lugar nga ini ang nangin lugar-lunsaran sa paghanas sang mas madamo pa nga kadre para sa pungsudnon nga pagpalapad.
- Maid-id nga gintalakay kag ginplano sang Komite Sentral ang pungsudnon nga pagpalapad sang Partido kag iban pa nga mga rebolusyonaryo nga pwersa. Gindesisyunan nga pagasakupon ang pungsod sang pito ka rehiyunal nga organisasyon sang Partido: Naaminhan nga Luzon, Tunga nga Luzon, Manila-Rizal, Nabagatnan Luzon, Nakatungdan nga Kabisayaan, Sidlangan nga Kabisayaan kag Mindanao. Ginpili ang mga kadre para sa pagpabakud sang mga nagatindog na nga komite sa rehiyon ukon indi gani, para sa pagtukod sang mga bag-o nga komite sa rehiyon kon wala pa sang natukod.. Ang pagtukod sang isa ka probisyunal nga komite sang Partido sa rehiyon

sang Mindanao, ang ikaduha nga pinakadaku nga isla sa kapuluan, isa sa mga mayor nga katuyuan.

- Ginbalay sang sentral nga pamunuan sang Partido sang mga malahalón nga dokumento para sa pag-ubay sa demokratiko nga rebolusyon sang banwa. Kalakip sini ang mga masunod: *Katilingban kag Rebolusyon Pilipino, Ubay Pang-organisasyon kag Pagpahayag, Ubay para sa Pagtukod sang Gubyerno sang Banwa, Rebolusyonaryo nga Ubay sa Reporma sa Duta, Mga Partikular nga Kinaiya sang Aton nga Inaway banwa.*
- Ang Partido nagpagwa man sang mga mapang-athag kag napanahon nga artikulo nahanungod sa mga isyu lokal kag pangkalibutan. Ang pinakapinasahi sa mga ini nahanungod sa mga mayor nga isyu nga lokal kag pangkalibutan, upod na ang Bagyo sang Una nga Kwarto (FQS) sang 1970, ang Dunganon nga Proletaryo nga Rebolusyon Pangkultura sa Tsina kag ang gyera sa Byetnam. Ginpublisar ang mga ini sa *ANG BAYAN*, pangunahon nga pahayagan pang-impormasyon sang Komite Sentral.
- Ginpaigting sang Partido ang rebolusyonaryo nga armadong paghimakas kag ang legal nga demokratikong kahublagang masa samtang nagahanda si Marcos para sa instalasyon sang iya diktadurya, kag bilang paghanda sa ginalauman nga layi militar, ginpabaskog ang rebolusyonaryo nga likum nga kahublagan sa kasyudaran. Gani, sang ginpapanaog sa pungsod ang layi-militar, nahimo nga nasalbar sang Partido ang pinakamadamo nga kadre kag katapu kag rebolusyonaryong aktibistang masa sa kasyudaran. Indi kalakip sa Partido ang kadam-an sa mga una nga naaresto sang pasistang diktadura. Bisan pa man, may pila ka katapu sang Partido nga naaresto kag nabiangglo nga wala sang taning.

Samtang nagahimud-os sa pagpatuman sa husto nga linya sa ideolohiya, pulitika kag organisasyon, muklat nga nagahimo ang Partido sang pagsaway kag pagsaway sa kaugalingon sa katuyuan nga gilayon nga matumod ang mga kahuyangan, kakulangan kag pagsayup. Bisan natalana na ang husto nga linya sa ideolohiya, pulitika kag organisasyon, permi may basehan ang pag-usbong sang suhetibismo kag oportunismo. Gani, bisan sa pinakamaayo nga tindog sang Partido, permi man nga nagaluntad ang banggianay sang duha ka linya sa tunga sang mga proletaryo nga

rebolusyonaryo kag mga elemento nga nagadala sang burgis nga impluwensya sa sulod sang Partido. Sa tagsa ka partikular nga panahon, nasalaming, bisan paano kag tubtob sa sa isa ka lebel, ang mga kontradiksyon sa katilingban nga ginaluntaran sini. Ang layi sang indi alalangay nga pag-uswag nagaluntad sa Partido sa kabilugan kag sa mga bahin sini. May permi nga problema sang pagremolde sa mga katapu sang Partido nga halin sa petiburgesya sang syudad kag yadtong may petiburgis nga estilo sang pagpangabuhi.

Halin 1969 tubtob sa 1979, ang kinaiya sang mga kasaypanan amo nga ispontanyo kag lapta-lapta. Talalupangdon diri ang masunod:

- Nangin mayor nga kasaypanan sadtong 1969 ang pagpadayon sang kaisipan nga rebelde nga lagawan, panan-awan nga lunsay-militar, pagpabaya sa solido nga pag-organisa sa masa, kapaslawan sa pagpauswag sa proletaryo nga komposisyon sa sahi sa mga komite pang-organisa sa mga baryo, adbenturista nga pagpadala sang mga armado nga kadre sa probinsya sang Negros nga wala man lang bisan panugod nga baseng masa didto, mga putsista nga atake sa mga “barrio self-defense unit” nga wala sang pagtuhay sa tunga sang mga elemento nga malain kag maayo sa kubay nila, kag iban pa nga mga katulad sini. Ang mga kasaypanan nga ini gilayon nga ginsaway kag gintadlong.
- Sadtong 1971, ang Plenum sang KS nagsuma kag nagkuha sang mga leksyon gikan sa mga rebolusyonaryo nga inagihan nga natipon sa Sentral Luzon, Naaminhan nga Luzon, Manila-Rizal, Nabagatnan nga Luzon kag Isla sang Negros. Ginhatagan sang nagakaigo nga atensyon ang mga daku nga kasaypanan nga nahimo sa Tarlac, subong man ang katuyuan sa pagbawi sang mga lugar nga nabayaan sa probinsya sang Tarlac kag pagpalapad sa kabug-usan sang Sentral Luzon paagi sa pagpanginpulos sa pagkawasak sang hubon nga Taruc-Sumulong nga sadto naga nagaupang sa pagpalapad sang rebolusyonaryong kahublagaan sadtong 1969 kag 1970. Ginsaway kag gintadlong ang madalian kag arbitraryo nga pagsilor sa mga ginasuspetsahan nga mpoermer sa Isabela. Gin-athag ang mga prinsipyo kag pamaagi sa pagsunod sa nagakaigo nga proseso sang hustisya. Amo man ang halambalanon sang pagtukod sang hukmanan sang banwa.

- Sadtong 1971, sa ikatlong anibersaryo sang liwat nga pagtukod sang Partido, ginhimo ang tatlo ka-tuig nga pagsuma sang una nga tatlo ka tuig sang rebolusyonaryo nga inagihan. Pareho nga ginsaway ang dogmatismo kag empirisismo. Ginsikway ang wala sang kapuslanan nga pag-alsa sang mga tinaga nga ginpulot sa libro kag ang praktika nga bulag. Nagpanawagan sa pagpahugot sang angut sa masa, kag labi nga paghipid nga pangkatilingban nga pagpanayasad agud mapalig-on ang integrasyon sang teorya kag praktika. Ang mga pagsaway pangunahon nga gintuon sa husto pag-inangtanay sang katungdanan sang BHB sa pag-away sa katungdanan sa pangkatilingban nga pagpanayasad, propaganda kag solido nga pag-organisa sa masa. Ginpahanumdom ang mga kadre kag hangaway nga indi bastante ang pagtukod sang mga komite pang-organisa sa baryo kag kinahanglan nga mag-organisa sila sang lain-lain nga tipo sang organisasyon pangmasa, mga sanga sang Partido sa lokalidad kag sang milisya. Ginpaathag ang kongkreto nga diyalektiko nga relasyon sang pagkonsolida kag pagpalapad.
- Ang una nga mga armadong yunit pangpropaganda sa Mindanao napapas sadtong 1972-73 bangud nagsayup sila nga gilayon magkadto sa mga armado nga tribo sa kabukiran nga wala anay sang hilikuton pangmasa sa kubay sang mga mangunguma sa mga kapatagan. Natukod kag napukan ang mga kumpanya sang BHB sa mga probinsya sang Aurora kag Sorsogon sadtong panahon 1973-74. Pila ka kadre sang Partido sa pungsudnon nga lebel ang nadakpan sadtong 1973 kag 1974.
- Tubtob sa sadtong 1977 ang duha ka kumpanya sang BHB nga ara sa matalon nga rehiyon sang Isabela wala ginsaylo pakadto sa Cagayan sang mga kadre nga sentral kag rehiyunal nga direkta responsable sa mga ini sa pihak sang pagbuhin sang tawo sa matalon nga rehiyon sang Isabela kag sang tayuyon nga kampanya sang kaaway nga paglikup-kag-pagsugpo, kag sa pihak sang pasulit-sulit nga instruksyon sang sentral nga pamunuan sang Partido nga ipatuman ang pagsaylo kag redispusisyon sang pwersa kag sa pihak sang maathag nga ginpakita sang isa ka platun sa Tumauni, Isabela nga maayo nga nakagwa sa sakop sang kordon sang kaaway.

- Base sa disisyon sang Plenum sang 1969 kag bunga sang pagduso sang mga kadre nga ara sa pamunuan sang hangaway sang banwa, ang sentral nga pamunuan sang Partido nakahimo sang plano kag mga pag-areglo, nga tuman kakumplikado, agud magpasulod sang armas halin sa iban nga pungsod sadtong 1972. Apang sa pihak sang desisyon nga hungod likawan ang pagpainit sa Isabela agud hatagan-alagyan ang importasyon sang armas, ang mga mataas nga kadre militar nga luyag gid makakuha sang armas nga palasudlon, sila man mismo ang nagdesisyon nga pasingkion ang mga taktikal nga opensiba sa probinsya. Sa mga opensiba nga ini sadtong ulihi nga bahin sang 1971, gin-gamit ang pila ka napulo nga awtomatik nga riple nga Browning (BAR) nga nakuha sa reyd sadtong Disyembre 1970 sa armori sang Philippine Military Academy. Gani, nabisto ang pangkabilugan nga nahamtangan sang mga nagapanguna nga pwera sang BHB.
- Bunga sini, gindugangan sang kaaway ang kusog-armas sini kag operasyon sang Task Force Saranay sa Isabela sa lebel sang isa ka dibisyon. Labi nga ginpadaku sini ang tanan nga kumplikasyon, kabudlayan kag bulnerabilidad sang proyekto sa importasyon kag ang kadungan nga mga kasaypanan sa plano kag sa implementasyon sini. Ang kapaslawan sang bug-os nga proyekto sa importasyon kag mga kaangot nga kasaypanan gilayon kag lubos nga ginsaway. Apang liwat, sadtong 1974, sa sutsot sang nahinambitan nga mga kadre militar, liwat gindesisyunan ang isa pa ka plano sa idalum sang mas kumplikado, mas mabudlay, mas limitado kag mas bulnerable nga mga kahimtangan kag ginpatuman ini agud mapaslawan man lang. Liwat nga ang mga kapaslawan kag kasaypanan gilayon lubos nga ginsaway. Ang mga plano sadtong 1972 kag 1974 sa importasyon may ginapangako nga istrategiko nga bentaha, apang sang napaslawan, wala naman sang gindulot nga istrategiko nga kahalitan sa pungsodnon nga pagpalapad kag pagpauwag sang mga rebolusyonaryo nga pwera.

Sadtong 1974, walay kaduda-duda ang mga kadalag-an sang Partido sa pungsodnon nga pagpalapad kag pag-uswag sang mga rebolusyonaryong pwera.

Nagdaku ang katapuan sang Partido halin 2,000 sadtong 1972 tubtob sa 4,000 sadtong 1974, apang nakakonsentra pa ini sa mga sentral nga organong istap kag rehiyunal nga organisasyon sang Partido nga ara sa Manila-Rizal. Sadtong 1974, nagdisisyon ang sentral nga pamunuan nga

buhinan kag pasimplehon ang mga sentral nga organong istap. Gin-asignar ang pinakadaku nga isip sang mga katapu sang Partido sa mga organisasyon sang Partido sa gwa sang Manila-Rizal. Sa bug-os nga pungsod nagadaku ang isip kag kusog sang mga prente kag sonang gerilya. Paborable kag ginakinahanglan sadto ang pagpabaskog sang tugas kag pagpamuno sang Partido sa sulod sang hangaway sang banwa.

Halin sa ulihi nga bahin sang 1974 tubtob sa temprano nga bahin sang 1975, ang Partido nakalunsar kag nakapamuno sa may pila ka gatus nga welga sang mamumugon sa bilog nga pungsod. Sandig sa mga welga nga ini, mahimo na matantya nga sa ulihi, antes matapos ang dekada, magalutaw ang isa ka higante nga mga kahublagan protesta sang masa, kalakip ang mga unyon sang mamumugon, mga organisasyon sang mangunguma kag mga organisasyon sang istudyante, liwat nga magatuhaw sa pagpamuno sang Partido.

Ang bug-os nga tuig sang 1975 isa ka tuig sang madasig nga pag-uswag sang mga rebolusyonaryong pwera sa pungsudnon nga sakop. Sadtong Disyembre sang amo nga tuig, naghiwat ang Komite Sentral sang plenum nga ang balor kag lebel sang mga nahimo katumbas sang isa ka pungsudnon nga kongreso sang Partido. Ginpun-an sini ang kubay sang Komite Sentral paagi sa pagnominar sa mga pinakamaayo nga kadre sa mga organisasyon sang Partido sa mga rehiyon kag mga sentral nga organo nga istap kag, pagpili paagi sa sikreto nga balota sang mga bag-o nga katapu sang Komite Sentral halin sa isa ka malaba nga listahan sang mga nominado. Ginbalikan kag gintun-an sini ang rebolusyonaryo nga inagihan gikan sa tanan nga bahin sang pungsod sugod sadtong 1968 kag nagkuha sa mga ini sang mga positibo kag negatibo nga leksyon. Gintasa kag gintantya ang mga mabaskog kag kahuyangan sang rebolusyonaryo nga pwera sa nagkalain-lain nga rehiyon kag kag naghimo sang madamo nga importante nga mga disisyon para sa pagpabaskog sang mga ini. Nabalay sini ang kongklusyon nga napaslawan ang layi military sang rehimeng US-Marcos nga waskon ang rebolusyonaryo nga kahublagan, kag sa baylo, nagtuga pa sang paborable nga kondisyon para sa armadong rebolusyon. Naabot sang Partido ang katapuan nga 5,000 kag sang BHB, ang pwera nga halos 1,000 ka Pulang hangaway nga armado sang mga riple nga awtomatik, luwas sa mga isa ka libo pa nga mas mahuyang ang armas (mga riple nga tag-isa ka lupok kag malip-ot nga pusil).

Sa Naaminhan-Sidlangan nga Luzon, may pila ka gatus ka Pulang hangaway nga naka-riple sang awtomatik (napasulod sa duha ka kumpanya sa matalon nga rehiyon sang Isabela, isa ka ginpadaku nga platun sa

Tumauni kag isa pa nga ginpadaku nga platun sa Aurora); sa Naaminhan-Nakatungdan nga Luzon, pila ka napulo nga Pulang hangaway nga ara sa mga iskwad; sa Sentral Luzon, halos isa ka gatos, dugang pa ang 30 halin sa isa ka kumpanya sa Aurora nga nagsaylo sa Nueva Ecija; sa Nabagatnan nga Katagalugan, pila ka napulo sa Quezon; sa Bikol, relatibo nga mas gamay bisan pa nagaabot man sa pila ka napulo nga bilin sang kumpanya sa Sorsogon; sa Nasidlangan nga Kabisay-an kag Nakatungdan nga Kabisay-an, pila ka napulo; kag sa Mindanao, mga 150 nga ara sa tugas sang labi pa nga madamo nga maluya pa ang pusil. Sa Mindanao, Samar kag Panay, pinakamadamo ang pugakhang, garand kag M-1 karbin nga nagaabot sa ginatos-gatos ang numero. Nangin dugang ang mga ini sa mga riple nga awtomatik.

Sa panahon 1976-1977, nagtayuyon ang pagdaku sa isip kag kusog sang mga prenteng gerilya kag sang mga legal nga demokratikong pwera sa madasigan kag kumulatibo nga pamaagi. Ang pangunahon nga linya sa pag-uswag amo ang pagpabaskog sa kaugalingon sang mga organisasyon sang Partido sa mga rehiyon sa pihak sang pagkakadakip sang mga nagapanguna nga sentral nga pinuno sang Partido sadtong 1976 kag 1977. Ang mga komite sang Partido sa mga rehiyon nga nakabasa, nag-tuon kag nag-aplikar sang *Mga Partikular nga Kinaiya sang Aton nga Inaway Banwa* kag sang *Ang aton Gilayon nga mga Hilikuton*, nagbaskog ang pagsalig sa paglunsar sang rebolusyonaryo nga armadong paghimakas kag pagtukod sang Partido, hangaway sang banwa kag baseng masa.

Ang mga rebolusyonaryong pwera sa Naaminhan-Nakatungdan nga Luzon nakaugat sang madalum sa kubay sang pumuluyo sa Kordilyera kag sa kapatagan sang Pangasinan. Ang ara sa Sentral Luzon nagsandig sa mga rebolusyonaryo nga tradisyon sang pumuluyo sa rehiyon kag nagpalapad sa gwa sang dulunan sang orihinal nga baseng masa sa Tarlac sadtong 1969-72. Ang mga yara sa Manila-Rizal nakapanginpulos sa tayuyon nga pag-uswag sang mga ligal nga demokratiko nga pwera kag mga ipokrito nga tikang sang kaaway sa “normalisasyon”. Ang mga kadre sa Nabagatnan nga Katagalugan kag Bikol naghimud-os sa rebolusyonaryo nga paghimakas sa pihak sang mga malala nga pagsayup sang mga nahauna nga pamunuan sang komite sang Partido sa Nabagatnan nga Luzon kag sang isa ka superbisor nga gindeploy sang Pungsudnon nga Pamatnugutan sa Operasyon sang BHB tubtob 1974, kag sa pihak sang mga seryoso kag negatibo nga epekto nga gintuga sang mga nasambit nga kasaypanan.

Sadtong 1976 kag 1977, makita na sang sentral nga pamunuan nga magadamo ang mga prenteng gerilya nga may mga platun nga magserbi nga sentro de grabidad, nga nakasandig sa malapad nga lambat sang mga iskwad, nga kada isa may kapasidad sa paghulag sa sakop sang isa ka sonang gerilya (angay kadaku sang munisipalidad mas-o-menus) kag nabahin-bahin sa mga armadong yunit pangpropaganda (kon wala sang mas mabaskog nga pwera sang kaaway nga nakakonsentra sa areya).

4. Paano nagtuhaw ang oportunistong burges sa sulod sang liwat gintukod nga Partido Komunista sang Pilipinas?

Sa ano man nga rebolusyonaryo nga partido sang proletaryado, sa tagsa ka partikular nga panahon, nasalaming, bisan paano kag tubtob sa sa isa ka lebel, ang mga kontradiksyon sa katilingban nga ginaluntaran sini. Ang layi sang indi alalangay nga pag-uswag nagaluntad sa Partido sa kabilugan kag sa mga bahin sini. May permihan nga problema sang pagremolde sa mga katapu sang Partido nga halin sa petiburgesya sa syudad kag sa subong may petiburgis nga estilo sang pagpangabuhi. Sa isa ka partido komunista, permi may basehan ang pag-usbong sang suhetibismo kag oportunismo. Gani bisan sa pinakamaayo nga tindog sini, permi man nga nagaluntad ang banggianay sang duha ka linya sa tunga sang mga proletaryo nga rebolusyonaryo kag mga elemento nga nagadala sang burgis nga impluwensya sa sulod sang Partido.

Halin 1968 tubtob sa 1977, ang mga indibidwal muklat ukon indi-muklat nga nagdala kag nagduso sang burgis nga impluwensya, ispontanyo kag lapta-lapta sa pangkabilugan. Ang mga mayor nga kasaypanan kag pagkulang ginasaway gilayon. Apang sugod sadtong 1978, may ara pila ka indibidwal sa mga sentral nga nagapamuno kag istap nga organo nga sistematiko nagpalapnag sang eklektisismo sa ideolohiya kag nagapamatuk sa Marxista-Leninista nga pag-analisa sang katilingban nga Pilipino. Tuga sang petiburgis nga pagkatapok kag sa madasig nga pagdaku sang rebolusyonaryo nga kahublagan bunga sang pagpatuman sang *Ang Atong Gilayon nga mga Hilikuton*, nagpangita sila sang rason para sa paglumpat sang armadong paghimakas halin sa temprano nga sub-halintang pakadto sa abanse nga sub-halintang sang istrategikong dependensya nga wala ginapatuman ang kumprehensibo nga mga rekisitos sang inaway banwa. Ang iban pa nga indi magremolde nga populista kag *Christian Democrats* nga nakasulod sa Partido nagapangita sang rason nga likidahon ang Partido

ukon ipaidalom ini sa mga burges nga pulitiko nga kontra sa rehimeng US-Marcos kag paatrason pakadto sa repormismong burges.

Sadto man nga 1978, may pila ka elemento sa komite sang Partido sa Manila-Rizal nga nagasalimuang sa *mania* sang pagpakigbanggianay kag nagadutdot nga himuon nga halam-balanon sa prinsipyo ang pag-entra sang Partido ukon indi sa paltik nga “eleksyon sa IBP” sadtong 1978 nga ginpadihut sang diktadurang US-Marcos. Gani nangin imposible para sa sentral nga pamunuan kag sa pamunuan sang Manila-Rizal nga makaabot sa disisyon nga katulad sadtong nahimo na sang Partido sa mga eleksyon sang 1969 kag 1971. Imbes makig-ugyon sa sentral nga pamunuan sa paglaragway sa piniliay sang 1978 bilang isa lang ka palaggwaon, nagdutdot ang pamunuan sa Manila-Rizal sa pagpwersa sang isyu kag botohan sandig sa pagkatunga sa boykot-pasakop. Ang halambalanon dogmatiko nga ihinurma suno sa kasaysayan sang mga Bolshevik. Sadtong 1979, naggamo ang organisasyon sang Partido sa Manila-Rizal.

Halin 1980, pila ka mataas nga opisyal sang Partido ang nagumpisa sang sistematiko nga pagsabwag sang linya nga lihis, naga-uk-ok kag nagaupang sa husto nga linya kag proseso sang pagpauswag sa rebolusyonaryong kahublagan. Sa pangunahon, nagporma “Wala” ang oportunisto sa linya nga “istratehikong kontra-opensiba” kag “regularisasyon” sadtong 1980 kag sa kadugayon, sa linya sang pagkumbinar sang adbenturismong militar kag insureksyunismong urban sadtong 1982. Pangaduha diri, hayagan nga nagporma Tuo ang oportunisto sadtong 1980 sa linya nga paglikida sa Partido kag pagbaylo diri sang “Bag-ong Katipunan”, isa ka pormal nga organisasyon sang nagahiliugyon nga prente, bilang sentro sang rebolusyon.

Upod sa mga pasimuno nga nabuyagyag nga muklat, masupog kag sistematiko nga nagpalapta sang oportunisto kag rebisyunista nga linya kag nagpadihut batuk sa Partido amo sila ni Ricardo Reyes, Filemon Lagman, Arturo Tabara, Romulo Kintanar, Joel Rocamora. May dalagku sila nga salabaton sa ideolohiya, pulitika kag organisasyon kag may ara man dalagku nga salabton kriminal a rebolusyonaryong kahublagan. (Lantawon ang mga dokumento sang pagbuyagyag sa mga salabton sa ideolohiya, pulitika kag organisasyon kag salabton kriminal sang kada isa sa ila nga ara sa ikaduha nga bahin sang Ikatlong Libro sang Basehan nga Kurso sang Partido.)

Bisan nagsamo diri ang sala nga linya, padayon nga nag-ubay ang husto nga linya sa kadam-an sang mga kadre kag katapu sang partido, nga nagbunga naman sang madasig nga pagdaku sang rebolusyonaryo nga pwera halin 1981 asta 1984, labi na bangud sa madasig nga paglala sang krisis sang nagahari nga sistema. Ang mga sandigan kag mayor nga dokumento sang Partido katulad sang *Ubay para sa mga Kadre kag Katapu sang Partido* (1968), *katilingban kag Rebolusyon Pilipino* (1970), *Mga Partikular nga Kinaiya sang Aton nga Inaway Banwa* (1974) kag *Ang Gilayon Naton nga Mga Hilikuton* (1976) ang nagkurit sang husto nga linya pang-ideolohiya, pangpulitika kag pang-organisasyon kag nakaupang sa paglatom sang lubos sa Partido sang sala nga mga linya.

Ang pinaka-mapangwasak nga epekto sang sala nga linya sang pagkumbinar sa adbenturismong militar kag insureksyunismong urban makita sa Mindanao sa diin nangin tuman katingkad ang malala nga pag-atras sang mga gilayon kag dasigay nga gintukod nga mga kumpanya sang hangaway sang banwa sadtong 1984 kag ang nagluntad nga isteryang kontra-impormer nga naglab-ot sa Kampanyang Ahos sadtong 1985-86. Ining sala nga linya kag mga resulta sini (lakip ang maduguon nga *witchhunt* nga gintawag Kampanyang Ahos) wala husto naanalisa, nasaway kag nasikway. Tigaylo, mas aktibo pa nga ginduso ang sala nga linya sa pungsudnon nga sakop. Halin 1985, nagbaskog ang militarismo sang umpisa nga magbulag ang “Pangkabilugan nga Kumand” sang BHB sa absolutong pagpamuno sang Partido kag nagpanguna sa pagduso sang “istratehikong kontra-opensiba” kag “regularisasyon” paagi sa serye sang mga kumperensya militar.

Ang mga dungganon nga kadalag-an kag madasig nga pagdaku sang rebolusyonaryo nga kahublagan halin 1981 tubtob sa 1984 indi bangud sa sala nga linya kundi bunga sang solido nga pundasyon nga ginlatag sang Partido sang liwat ini nga gintukod sang 1968 nga padayon nga ginpatuman sang mga proletaryo nga rebolusyonaryo kag bangud sa madasig nga paglubha sang dalayon nga krisis sang nagahari nga sistema. Gani, sa pihak sang pagsabwag sang sala nga linya halin 1980 tubtob sa 1989, ang mga proletaryo nga rebolusyonaryo nag-angkon sang malig-on nga basehan agud magpursiger, sa suporta sang pumuluyo, batuk sa sala nga linya pungan ang pagdausdos sang rebolusyonaryong pwera kag ipatuman ang ikaduha nga dungganon nga kahublagan sa pagpanadlong.

Ang mga nagapanguna nga kasaypanan, paglihis kag kakulangan nga natumod sa nagligad nga sobra isa ka dekada nga dapat tadlungon nagalakip sang mga masunod:

a. Ang madugay na nga pagpabaya sa Marxista-Leninista nga edukasyong teoretikal, ang pagkawala kag pagnubo sang paghatag importansya sa mga sinulatan sang mga dungganon nga manunudlo nga komunista kag mga basehan nga dokumento sang Partido, ang pagdaku sang impluwensya sang mga pamensaron nga indi proletaryo, ang paglapnag sang suhetibismo nga petiburges kag ang pakagaruk sa ideolohiya sang pila ka kadre;

b. Ang paglisa sa linya nga anti-rebisyunista, ang misrepresentasyon sang mga rebisyunista kag burukrata kapitalista nga partido kag rehimen bilang komunista kag sosyalista, dala sang walay dinangtan nga paghandum sang ila ayuda nga ginkabig makahulug sa pag-abanse ukon indi sang armado nga paghimakas kag dayon, ang pagbukas sang ganhaan sa mga pagkagumon sadtong nagkalabagsak ang mga ini kag nagbaskog ang opensiba sa ideolohiya sang mga imperyalista.

k. Ang pagkwestyon kag sa amo sina, ang paghalog nga walay bastante nga sandigan nga datus sa pag-analisa sang Partido sa malakolonya kag malapyudal ang katilingban Pilipino, bisan ang katilingban nga ini tuman ka kaathag nga wala sang pag-uswag kag padayon nga nagagaruk, kag bisan ang pagkwestyon nagatungtong sa pahapyaw lang nga pagtuon sa ginahambal nga distribusyon sang populasyon sa syudad kag baryo kag sa misrepresentasyon sang mga industriya nga tipong dalagku-nga-kumprador kag sektor sa serbisyo bilang pruwaba sang basehan nga industriyalisasyon;

d. Ang pagtuhaw sang oportunismo nga tipong ultra-Wala kag maka-Tuo, nahanungod sa linya sa sahi sang estratehiya kag taktika sang rebolusyon nga pungsudnon demokratiko kag sang mga nagapanguna nga hinganiban sang banwa sa pagrebolusyon (ang Partido, ang hangaway sang banwa kag ang nagahiliugyon nga prente);

e. Ang ultra-Wala nga linya nga oportunista sang “regularisasyon” nga ang buot silingon wala napanahon kag indi masustiner nga mga pormasyon militar kadungan ang burukratisasyon sa syudad, nga pareho gin-ganyat sang kumbinasyon sang panan-awan nga lunsay militar kag insureksyunismo, nga nagtuga sang pinakadaku nga kahalitan labina sa baseng masa kag sa matutom nga hilikuton pangmasa kag solido nga pag-organisa;

g. Ang pasulit-sulit nga pagtuhaw sang isteryang makamamatay kag napangwasak sa kaugalingon, pareho sang KAHOS nga pinamalala sa tanan sa kasubong sini nga tipo sang insidente, pagkaligad sang siklo sang matunog pero temporaryo nga mga kadalag-an militar kag mga insureksyunista nga gulpe-de-gulat sa umpisa, kag pagkadula sang baseng masa pagkatapos, malubha nga halit sa kadugayon kag sa ulihi nga bahin, ang sobra nga kahadlok;

h. Ang pagtalikod sa estratehikong linya sang inaway banwa, pareho sang mga oportunistang ultra-Wala kag maki-tuo, nga nagtalaod sa panan-awan nga absolute nga makabanggi ang paghimakas pangpolutika kag paghimakas militar kag sa handum nga gub-on ang absolute nga pagpamuno sang Partido sa hangaway sang banwa, bisan pa ang mga ultra-Wala matinkad sa pagdali nga agumon ang lubos nga kadalag-an kag sa pagkaligta sa kumbinasyon sang armado nga paghimakas, reporma sa duta kag pagtukod sang baseng masa, samtang ang mga maki-tuo matinkad sa pagtulod pakadto sa populismo, repormismo kag pag-ampo;

i. Ang nagabaskog nga huyog sa Tuo nga oportunismo bunga sang mga kapaslawan sa adbenturismong militar kag insureksyunismo, pagpapatampok sa kasaypanan nga boykot bilang pinakamalala kuno nga pagsayup sang Partido sadtong 1985-86 agud takpan ang labi pa nga mas malala nga kasaypanan sa KAHOS, burukratismo sa syudad, pagkabutong sang mga kadre sa mga ginawelduhan nga pusisyon sa syudad, kag pag-untat sang ilig sang mga edukadong pamatan-on nga kadre para sa hilikuton pangmasa kag armado nga paghimakas sa kaumhan;

l. Ang mga sala nga ideya sang nagahiliugyon nga prente nga nagalikida ukon nagataklob sa pagpamuno sang sahing proletaryo kag sa duha-ka-halintang nga rebolusyong Pilipino, pagluhod sa kontra-Marxista nga opensiba sa ideolohiya sang kaaway, kag paglapos sa sulod sang Partido sang mga populista, liberal, sosyal-demokratiko kag iban pa nga petiburges nga ideya kag sang mga sala nga panan-awan sa negosasyong pangkalinungan kag paghimakas para sa matarung kag malawigan kalinungan; kag

m. Ang mga atake sa prinsipyo sang Partido, labi na sa prinsipyo sang demokratiko sentralismo nga ginabansagan nga awtoritarianismo, ang mga atake personal sa mga prinsipal nga lider sang Partido para padalion ang pagpangguba sa Partido, ang pagreklamo nahanungod sa “proseso” sang mga elemento nga sige ang mga aktibidad nga anti-demokratiko kag paksyunal kag pagsabwag sang intriga agud itampalas ang mga basehan nga prinsipyo kag pagpamuno sang Partido sa lain-lain nga lebel, kag ang

walay habas nga ultra-demokrasya, sektarismo kag pagmusing sa integridad sang Partido.

5. Paano nakapanghalit ang mga malala nga paglihis sa husto nga linya sa sulod sang Partido kag sa rebolusyonaryo nga kahublagaan ?

Halin 1980 tubtub 1985, nag-arangka sa pagdaku ang Partido kag ang rebolusyonaryong kahublagaan sang walay katulad sa nagligad. Bunga ini sang madasig nga paglala sang krisis sang nagahari nga sistema halin 1979, natipon nga kusog sang rebolusyonaryo nga pwera kag nagapadayon nga husto nga linya sa pagtrabaho nga ginasakdag sang daku nga mayorya sang mga kadre kag hangaway. Bisan pa man, ang pagdaku kag pagbaskog nga ini gindunganan man sang pagbaskog sang "Wala" nga oportunistang linya sang "regularisasyon" kag insureksyunismong urban nga nagsabotahe sa pag-abanse sang rebolusyonaryo nga kahublagaan. Sa kadugayon, ang "Wala" nga oportunismo ginsamuan sang Tuo nga oportunismo sa dagway sang paglikida sa pagpamuno sang Partido sa sulod sang nagahiliugyon nga prente, kag *medium term program* sa pag-angkon kuno sang gahum sa bulig sang isa ka seksyon sang mga nagahari nga sahi kag nakasandig sa ginalauman nga paglupok sang ispontanyo nga pagpamatok sang pumuluyo, kag rebisyunismo sa dagway sang Gorbachovismo.

Ang natabu nga malala nga mga paglihis sa husto nga linya sa sulod sang Partido nagtuga sang indi-matupungan nga kahalitan sa Partido kag iban pa nga rebolusyonaryo nga pwera. Sandig s mga datos halin sa mga rehiyon, naklaro ang matuod-tuod nga kalalaon sang mga disoryentasyon kag paglihis, subong man ang matuod-tuod nga mga kahalitan nga gintuga sang mga ini.

a. Nagkitid ang baseng masa sang lampas sa 60% sang nalab-ot nga putuk-putukan sang kadakuon sadtong tunga-tunga sang dekada 1980. Sa madamo nga rehiyon nag-abot sa 80-85% ang ginbagsak sang baseng masa kag sa pinakamalala, 91%.

Paliwat-liwat sa mga rehiyon ang mga dalagku nga kahalitan sa baseng masa bunga sang pagpabaya, indi-napanahon nga "regularisasyon" kag burukratismo ginpatungan sang mga panibag-o nga kahalitan tuga sang pagpamilit sa mga "kampanya nga pol-mil" bilang sabat sa pangkabilugan nga opensiba sang kaaway kag mga dislokasyong tuga sang

insureksyunismo. Ang naulihi nga duha ang halos padayon nga nagwasak sa baseng masa sa madamo nga prente.

b. Bangud sa mas daku nga kahalitan sa baseng masa kag sa mga kahalitan sa Partido nga bunga sang tudo nga kampanyang paksyunalista kag kontra-Partido, sa madamo nga lugar, ang kabilugan nga katag sang pwersa kag baseng masa mas malapit sa lebel sadtong pagsulod sang mga tuig nga 1980. Dapat konsiderahon man ang mga bentaha kag disbentaha naton subong kon ipaanggid sadto.

k. Ang gangsterismo malubha nga disoryentasyon kon sa diin pinakamalala ang paglapnag sang gangsterismo sa Kabisay-an nga maglapos sa tanan nga rehiyon, nagguba sang relasyon sa masa, nangin pangunahon nga paktor sa pagkabagsak sang baseng masa sa pila ka lugar kag nagpagaruk sa mga partisano sa syudad kag daku nga isip sang kadre nga nakabase sa syudad. Naglapnag sa Kabisay-an ang konsepto sang larga nga kumpiskasyon kag ekspropriasyon sang mga “kaaway sa sahi” nga wala sang pagpili sa kabilugan nga lebel sang inaway kag mga kunsiderasyon sa pulitika—agud gastuhan kuno ang inaway. Ang pinakalala nga porma sang gangsterismo ang kuno “covert operations” sa Panay nga wala sang kinatuhay sa mga operasyong akyat-balay nga ang target mga alyado sa sulod kag palibot sang mga sonang gerilya.

Malala man ang lebel nga nalab-ot sang gangsterismo sa anay GC kag sa MR. Matingkad ang anay GC bangud sa paghatag sang bonus nga mas madasig pa nga naglulong sang mga operatiba nila sa gangsterismo kag kagarukan.

Sa lain-lain nga panahon, naimbolber man sa mga operasyong gangster ang Bikol kag CL kag ang partisano sa syudad sang TK.

Luwas sa mga kagarukan, ang gangsterismo nagpalapnag sang nagapalala nga pagpasipala sa pagpamuno sang Partido kag nagdangat sa pasulit-sulit nga mga kaso sang pagbulag agud magtukod sang mga sindikato nga kriminal katulad sang RSG.

d. Ang mga konsepto nga nagpakagamay, nagpahalog kag ulihi nga bahin nagapatunaw sa pagpamuno sang proletaryado kag Partido naglutaw kag nagalapnag sa nagkalain-lain nga sakop kag linya sang hilikuton.

Ang una nga direkta nga porma sang konsepto nga ini amo ang konsepto sang Katipunan bilang nagahiliugyon nga prente nga

nakapaibabaw kundi man nagatunaw sa pagpamuno sang Partido. Kadungan sini ang pagkua sa konstitusyon sang CNL sadtong 1981 sang probisyon sa pagpamuno nga proletaryo kag perspektiba nga sosyalista.

Pagkatapos, naglapnag ang konsepto sang “separado nga dinamismo” sang mga organisasyon pangmasa kag nagahiliugyon nga prente nga nakatuon sa pagpakagamay sang nagapamuno nga papel sang Partido.

Halin 1987, ginsakdag sang GC ang “regularisasyon sang kumand” nga nagahatag tum-ok sa nagapadaku nga gahum sang indibidwal nga kumander kag bertikal nga ilig sang kumand sa sulod sang hangaway sang banwa. Ginpagamay ang papel sang mga yunit sang Partido sa sulod sang mga yunit sang hangaway, ginpaidalum ang mga ini sa gahum sang mga indibidwal nga kumander kag sa sulod sang GC mismo, padayon nga gintunaw ang kolektibo nga kabuhi sang Partido. Sa bertikal nga ilig sang kumand, gusto nga pabaskugon agud sampawan mangin ang pagpamuno sang mga pangteritoryo nga komite sang Partido sa hangaway sang banwa sa ila mga sakop.

May mga partikular nga porma man ang mga pag-atake sa pagpamuno sang Partido sa mga talatapan nga ligal. Lapnagon sa mga ini ang pagpabaya sa kolektibo nga kabuhi kag hilikuton sang Partido kag ang pagpaluntad sang mga relasyon sa ideolohiya, pulitika kag organisasyon nga lubos nga nakaupod sa mga hilikuton kag areglo sang opisina. Sa kadugayon, nagdamo ang kaso sang mga burukratang NGO nga nagaangkon sa mga ligal nga talatapan bilang ila personal nga kaharian tubtob hayag nga nagaatake sa Partido. Sa ulihi nga bahin, ang mga oportunistang mga traidor nagpalapnag sang konsepto sang mga ligal nga organisasyon kag institusyon nga wala sang kahublagan nga likom.

Sa iya konsepto sang NDF, kumprehensibo nga gin-atake ni Reyes ang pagpamuno sang Partido nga gusto niya islan sang isa ka pluralista nga sentro sang pagpamuno, isa ka konsepto sang taliba nga organisasyon nga wala sang iban kundi pagpakunu-kuno sang pagpamuno nga petiburges nga naghawan sang dalan sa pagpamuno nga kitaon nga iya sang burges. Pagkatapos sang paltik nga kongreso sadtong 1990, gintinguhaan sang updanay nga Reyes-Gonzales nga bungkagon ang NUFC agud islan sang NDF.

e. mas malala sa ihibalo sang Ika-10 Plenum ang aktwal nga kasangkaron kag kalalaon sang insureksyunista nga himbunanay sadtong 1990 kag 1991. Imbolbado didto ang mga nagapamuno nga kadre sa halos

tanang nga organo nga nakabase sa MR (Reyes kag NUFC, GC, KRMR, NPS, SGVC kag KTKR-CL), nga sa lain-lain nga lebel muklat nga lansakan nga naglapas sa demokratiko sentralismo sang Partido. Sa paglagas sang “pag-alsa sang lapaw pa sa tipong-EDSA,” aktwal nga ginkasa ang daku nga bahin sang organisasyon sang Partido sa mga putsista nga plano. Gindistrungka ang katag sang mga pwersa kag hilikuton sa MR, CL kag iban pa nga apektadong lugar. Gintalana ang pag-arangka sa mga estratehiko nga makahulugang nga engkwentro nga kon nadayon magasuong sang rebolusyonaryo nga pwersa sa pat-ud kag walay kapuslanan nga kapahamakan.

Ang himbunanay nga insureksyunista ang makapaathag sa madamo nga tuhay nga hulag sang mga nasambit nga organo sadtong 1990-1992, upod na ang damol kag kabug-aton sang intriga nga nagatiyog sa mga organo nga ini kag ang kaugot nila tanang (luwas sa KTKR-CL) sa “Liwat nga Palig-unon” kag kahublagaan sa pagpanadlong.

g. Base sa kaugalingon nga pagtumod kag pagsaway sang mga rehiyon, labi nga nag-athag ang mga partikular nga porma sang mga mga dalagku nga paglihis kag kasaypanan sa lain-lain nga lugar.

Luwas sa mga gintumod sa “Liwat nga Palig-unon” kag “Pangkabilugan nga Pagrepaso,” madugang ang “kasa-hasa-bulwak” sang VIQUI kag ang lain-lain nga porma sang pagpatuman sang linya nga RA-WA sa Kabisay-an. Ginpatuman sa Kabisay-an ang linya nga RA-WA nga mas madugay pa sangsa Mindanao halin 1985. Ginpatuman ini sa Panay sa porma sang estratehiya sang kumbinasyon sang paghimakas pangpulitika kag paghimakas nga militar; sa Sentral nga Kabisay-an, sa porma sang estratehiya sang kumbinasyon sang gerilya nga pagpakig-away, partisano kag pag-alsa; kag sa Negros, sa mga paghimakas nga pol-mil nga nagtinguha nga magpalupok sang insureksyunaryo nga sitwasyon sadtong 1987 kag sa insureksyunista nga interpretasyon sa “Pila ka Pagpaathag sa mga Katungdanan” sang KPKS sadtong 1990. Ang kasingkion/sang paghimakas nga pol-mil sa Davao City sadtong 1984 gintupungan kundi man labawan sang “pagpinit” sa syudad sang Cebu paagi sa pagpakig-away partisano sadtong 1985 kag “pagtuga sang insureksyunaryo nga sitwasyon” sa Bacolod sadtong 1987.

h. Sadtong 1991 nagpalapnag si Reyes, Tabara kag Kintanar sang konsepto sang “open season” sa lain-lain nga estratehiya bilang preparasyon sa kongreso sang Partido. Nangin sistematiko ang ila pagduso

sang insureksyunismo kag pag-atake sa linya sang malawigan nga inaway banwa.

Si Reyes ang naghimo kag nagpalibot sang kaugalingon nga kumprehensibong oryentasyon sa hilikuton nga nagahiliugyon nga prente nga ginlikum sa sentral nga pamunuan. Nagmandu siya sang pagpanalawsaw agud pamataud-an nga indi na malapyudal ang katilingban Pilipino. Si Gonzales naghiwat sang mga pormal nga pagtuon sa estratehiya nga nagaatake sa linya sang Partido.

Sa Negros, ginpalapnag halin 1991 ang bag-o nga kurso sang pagtuon nga nagasakdag sang insureksyunismo.

Sa MR, ginpalapnag ang kurso nga Leninista nga padayon ginbulos sa basehan nga kurso sang Partido, kalakip ang mga konsepto sang paghimakas nga pol-mil, gilayon nga paghatag tum-ok sa paghanda sa insureksyon, “pag-alsa sang lapaw pa sa tipong-EDSA,” kag panan-awan nga kapoy na sa inaway ang masa sa kaumhan gani dapat saku-sakuon sang MR ang kadalag-an paagi sa bugso kag insureksyon.

i. Mas temprano pa sangsa sa tantya sang Ika-10 Plenum ang paggamit ni Reyes sang mga paidalum kag kontra-Partido nga maniobra agud sakdagon ang iya insureksyunismo, rebisyunismo kag oportunisto. Gin-anunsyo niya sa pamantalaan nga sadto pa sang 1988 likum na siya nga may padihut batuk sa Partido.

Nabuyagyag man ang mga mas malala nga paglapas sa demokratiko sentralismo partikular nanday Tabara kag Kintanar katulad sang mga likum nga operasyong gangster, pagpugong sa pagpapanaog sang mga malahalon nga desisyon, kag pagpatuman sang kaugalingon nga mga polisiya sa mga dalagku nga halambalanon nga likum sa mga sentral nga organo. (Lantawon sa mga papel nahanungod sa mga salabton nga kriminal kag IPO sang mga pinuno nga traidor.)

l. Sa paglapad sang impluwensya kag pagdaku sang organisasyon sa kahimtangan nga malala ang kakulangan sa pagtukod sa ideolohiya, talalupangdon ang pagtuhaw sang korupsiyon kag paglala sang burukratismo sa pila ka bahin sang organisasyon. Natalupangdan ang mga tendensya nga ini sa madamo-mo nga yunit nga nakadeploy sa mga ginawelduhan nga hilikuton ligal, mga nagapamuno nga organo nga nakabase sa syudad, yunit partisano nga imbolbado sa mga operasyon nga gangster kag yunit nga nakadeploy sa pagbuhis. Bisan sa mga yunit sang Partido sa mga lokalidad sa kaumhan may nakakatawag-igtalupangod nga

paglapnag sang mga magagmay nga kaso sang korupsiyon kag nepotismo, kaangot sa pagdumala sa mga proyekto sa sosyo-ekonomya kag mga kadalag-an sa rebolusyon agraryo.

m. Matuod nga lapnagon ang manubo nga lebel sa teorya bunga sang malawig nga pagpabaya sa hilikuton sa ideolohiya kag pagbaskog sang mga impluwensya nga petiburges kag burges. Kalakip sa mga talalupangdon nga kahuyangan sa madamo nga kadre kag katapu sang Partido ang mga nagasunod:

- Kulang sa kinaalam sa kasaysayan sang Pilipinas, sang rebolusyonaryo nga paghimakas sang pumuluyong Pilipino, sang Partido kag sang pangkalibutan nga kahublagaan nga komunista;
- May ara mga dalagku nga pal-at paghakos sa linya, programa kag mga polisiya sang Partido;
- Mahuyang ang paghangup sa proletaryo nga panindugan, pananawan kag pamaagi kag sa paggamit sang mga ini sa pag-atubang sa mga halambalanon kag hilikuton;
- Kabos sa paghangup sa linyang masa kag sa mga prinsipyo kag pamaagi sang hilikuton nga propaganda, edukasyon kag pag-organisar sa masa; kag
- Kulang sa kinaalam sa sosyalismo kag moderno nga rebisyunismo.

n. Sa nalab-ot nga kalalaon sang mga paglihis kag kasaypanan, daku ang nangin papel sang liberalismo kag burukratismo nga nagluntad sa mga sentral nga nagapamuno nga organo. Tigaylo nga gilayon usisaon kag aksyunan, ang mga seryoso nga simtomas sang pagkagaruk kag mga indikasyon sang mga paglapas sa mga pagsulundan sang Partido ginpabay-an ukon indi gani madali nga napalampas. Tuman kalaka kag iregular ang mga pagsaway kag pagsaway sa kaugalingon. Wala direkta gin-usisa ang kahimtangan sa mga dalagku nga bahin sang organisasyon sa tuman kalawig nga panahon gani malala na ang mga problema sang mabatyagan kag makita.

6. Ano ang Ikaduha nga Dungganon nga Kahublagaan sa Pagpanadlong?

Ang Ikaduha nga Dungganon nga Kahublagaan sa Pagpanadlong amo ang pungsudnon sang sakop nga kahublagaan sa pagpanadlong nga ginlunsar sang Partido sadtong 1992. Isa ka halambalanon nga kabuhi-kag-

kamatayon nga para sa bug-os nga Partido ang liwat nga palig-unon ang mga basehan nga prinsipyo sini, tindugan ang iya husto nga linya kag sawayon, isikway kag tadlungon ang mga dalagku nga paglihis kag kasaypanan nga nagpabilin sa tuman kalawig nga panahon (nagsuklob sa katunga sang pagluntad sang Partido kag sang armadong rebolusyon) kag nagtuga sang walay tupong nga mga kapaslawan sa Partido, Bag-ong Hangaway sang Banwa kag bug-os nga rebolusyonaryong kahublagang masa.

Naglab-ot sa putuk-putukan ang malala nga paglihis sang maglunsar ang mga masupog nga oportunistang sang todo-larga nga kampanya nga kontra-Partido, nga sa umpisa isa ka kampanya nga nagatuyo upangan ang kahublagan sa pagpanadlong, kakason ang lehitimo nga pamunuan sang Partido agud ibulos ang kaugalingon kag himuon nga burges-liberal nga partido ang Partido Komunista sang Pilipinas. Sang mapaslawan ang pagtinguha nga ini, lubos kabangis nila nga ginpalapta ang ila hilo agud pihak-pihakon ang Partido kag ginlunsar ang tudo-larga nga kampanyang demolisyon.

Sa maayo nga palad, ang paglunsar sang Partido sang Ikaduha nga Dunganon nga Kahublagan sa Pagpanadlong napanahon nga nangin matalum nga armas nga naglapos sa pinakakorason sang ginlunsar naman nga todo-larga nga kampanya nga kontra-Partido sang mga rebisyunista nga traidor kag nagpaslaw kag nagbuyagyag sa mga ini. Ang mga malala nga paglihis kag kasaypanan mahimo pa tani nga mas nakapanghalit kon indi sa paghimud-os sang labi nga mas madamo nga mayorya sang mga kadre kag katapu sang Partido nga nagasakdag sa mga basehan nga prinsipyo sang Partido kag determinado nga isulong ang rebolusyonaryong kawsa.

Ang kahublagan sa pagpanadlong, pangunahon kag sa esensya, isa ka paghimud-os nga pang-edukasyon agud tumuron, sawayon kag isikway ang mga paglihis, kasaypanan kag kahuyangan kag sa sini labi pa nga pabaskugon ang Partido kag rebolusyonaryo nga kahublagan. Ang katuyuan amo nga tugahon sa sulod sang Partido ang mas mataas nga lebel sang rebolusyonaryo nga kamuklatan kag militansya kag sa sini, mas mataas nga lebel man sang paghiliusa. Nagakahulugan ini sang paglunsar sang mga pagsuma kag pagsawayanay sa lain-lain nga lebel sang

organisasyon sang Partido, pagtuon sa tatlo ka-lebel nga kurso sang Partido kag pagtalana sang husto nga direksyon sa praktikal sa mga hilikuton.

Paagi sa Ikaduha nga Dunganon nga Kahublagan sa Pagpanadlong liwat nga ginpalig-on ang mga basehan nga prinsipyo sang Partido nga nagalakip sang mga masunod :

- a. Pagsunod sa teorya sang Marxismo-Leninismo-Maoismo
- b. Pagsikway sa moderno nga rebisyunismo
- k. Makasahi nga pag-analisa sa katilingban Pilipino bilang malakolonyal kag malapyudal
- d. Pangkabilugan nga linya sang bag-ong demokratikong rebolusyon
- e. Nagapamuno nga papel sang proletaryado paagi sa Partido
- g. Teorya sang inaway banwa kag estratehiko nga linya sang paglikup sang kasyudaran gikan sa kaumhan
- h. Nagahiliugyon nga prente suno sa rebolusyonaryo nga linya sa sahi
- i. Demokratiko sentralismo
- l. Sosyalista nga perspektiba, kag
- m. Proletaryo nga internasyunalismo

Madinalag-on nga ginsikway ang “nawala ” kag Tuo nga oportunistang linya kag rebisyunismo kag ang mga masupog/mangtas nga oportunistang rebisyunista nga traidor.

7. Ano ang kritikal kag matinugahon nga mga katungdanan sang Kahublagan sa pagpanadlong?

Agud lubuson ang Ikaduha nga Dunganon nga Kahublagan sa Pagpanadlong kag tanan-nga-bahin-nga isulong ang rebolusyonaryo nga kahublagan pakadto sa bag-o kag mas mataas nga lebel, gintalana ang kritikal kag matinugahon nga mga katungdanan sang kahublagan sa pagpanadlong nga ginalakipan sang nagasunod:

a. Sakdagon ang teorya kag praktika sang Marxismo- Leninismo-Maoismo!

Ang kahublagan sa pagpanadlong, sa daku nga bahin kag sa esensya, isa ka kahublagan nga pagtuon sang Marxista-Leninista nga teorya kag praktika. Tuman kamalahalon ang teoretikal nga pagtuon

bangud indi mahimo mag-angkon sang rebolusyonaryo nga kahublagan nga wala sang rebolusyonaryo nga teorya. Ang pagka-tunay kag epektibo sang teorya nakabase sa integrasyon sini sa kongkreto nga rebolusyonaryo nga praktika kag pag-ubay diri halin sa kadalag-an pakadto sa dugang pa nga kadalag-an sa mga liko kag pagbag-o sang rebolusyonaryo nga paghimakas.

Ginasulong sini ang pagtuon kag pagsapraktika sang mga basehan nga prinsipyo nga Marxista-Leninista kag ginapataas sa lebel sang Marxista-Leninista nga teorya ang manggaran nga rebolusyonaryo nga inagihan sang Partido Komunista sang Pilipinas kag sang rebolusyonaryo nga kahublagan pangmasa. Ginatuyo sini nga pauswagon ang Marxista-Leninista nga panindugan, panan-awan kag pamaagi sang mga proletaryo nga rebolusyonaryo. Dapat matutong nga uyatan sang mga kadre kag katapu sang Partido ang layi sang kontradiksyon kag magamit ini nga maayo sa pag-analisa sa mga sahi kag rebolusyonaryo nga paghimakas.

Ginasaway kag ginapamatukan sang kahublagan sa pagpanadlong, ang suhetibismo nga naghatag dalan sa “Nawala” kag Tuo nga oportunistang kasaypanan nga nagtuga sang daku nga kahalitan sa Partido kag rebolusyonaryo nga kahublagan. Ginasiway sini ang eklektisismo, empirisismo kag dogmatismo nga naglapos sa Partido sa tuman kalawig nga panahon. Ginapamatukan sini ang pagpakanubo sa Marxismo-Leninismo-Maoismo kag sa rebolusyon Pilipino, ang paglihis sa kontra-rebisyunista nga linya paagi sa pagsakdag sa rebisyunismong Brezhnev kag Gorbachov, ang pagpakanubo sa duha-ka-halintang nga rebolusyong Pilipino paagi sa bulag nga pagsimba sa mga kahublagan nga wala sang proletaryo nga rebolusyonaryo nga pagpamuno, kag ang indi tampad nga praktika sang wala-sa-konteksto nga pagkopya sa dungganon nga Lenin agud atakehon ang linya sang Partido.

Ginatudlo sang kahublagan sa pagpanadlong nga ang teoretikal nga edukasyon sa sulod sang Partido ginakinahanglan kag ang pangpulitika nga edukasyon sa pungsudnon nga demokratiko nga rebolusyon indi bastante. Tuyo sini nga liwat nga papagsikon, paayuhon kag palapnagon ang tatlo ka lebel sang edukasyong pangpartido: basehan, intermedya kag abanse. Sakop sang mga materyales sa pagtuon ang mga sinulatan sang mga dungganon nga komunista nga lider kag manunudlo kag ang pinakamalalahanon nga dokumento sang Partido nga nagasulong sang husto nga rebolusyonaryo nga linya. Antes pa man sa pormal nga kurso sang pagtuon, pagapadamuon kag igapanagtag na ang mga materyales agud mabasa kag matun-an. Tanan nga mga yunit kag organo sang Partido

ginabuyok nga maghiwat sang pangkatilingban nga pagpanayasad, mga pagsuma, pagsaway-kag-pagsaway sa kaugalingon kag pagpaathag sang mga katungdanan santo sa Marxista-Leninista nga linya.

b. Tayuyon nga maghimud-os sa kontra-rebisyunista nga linya!

Krusyal ang kamalahalon sang tayuyon nga paghimud-os sa kontra-rebisyunista nga linya. Bisan basang-basa na ang papel sang moderno nga rebisyunismo bunga sang pagpukan sang Unyon Sobyet kag sang rebisyunista nga partido nga Sobyet kag sang nagligad nga pagkadugmok sang mga nagapamuno nga Partido kag rehimen sa pila ka pungsod kag sang padayon nga pagkagaruk sang mga ara sa iban pa nga pungsod, ang mga manugbandera sang moderno nga rebisyunismo, neo-rebisyunismo kag sosyal demokrasya padayon nga nagatinguha nga magpalawak sang impluwensya paagi sa pagpakigkorus sa mga imperyalista kag ila mga alagad nga anti-komunistang petiburges sa isa ka pang-ideolohiya kag pangpulitika nga opensiba nga makatiliplang nga naghingalan sa sobra tatlo ka dekada sang moderno nga rebisyunismo bilang “depektuso nga sosyalismo” ukon “Stalinismo”.

Ginasaway kag ginasiway sang kahublagan sa pagpanadlong ang tanan nga paglihis sa kontra-rebisyunista nga linya. Ang una nga mayor nga paglihis nag-umpisa sadtong temprano nga bahin sang dekada 1980. Gin-unod sini ang suhetibista nga paghaum-haum nga ang Unyon Sobyet kag iya mga alyado magahatag sang ayudang militar kag pinansyal agud mapadasig ang kadalag-an sang rebolusyon Pilipino. Ang oportunistang ini may dagway nga “Nawala” apang sa kaundan, ini Tuo. Naghatag dalan ini sa pagbag-o sang panan-awan sang Partido sa Partido Komunista sang Unyon Sobyet kag iban pa nga kaanggid nga partido bilang indi na kuno rebisyunista, sa Unyon Sobyet, bilang indi na kuno sosyal imperyalista, kag sa mga satelayt sini, bilang indi na kuno mga neo-kolonya sang sosyal imperyalistang Sobyet. Ang ikaduha nga mayor nga paglihis nakaapekto sa pila ka yabi nga kadre sadtong ulihi nga bahin sang dekada 1980. Ginsakdag kag ginpalapta nila ang rebisyunismong Gorbachov sa pila ka bahin sang Partido. Sa kadugayon, ang pinakamalala sa mga oportunista nga ini, pareho ni Gorbachov nangin mga baraghal nga kontra-komunista nga nagagamit sang kontra-Stalinista nga mga slogan agud atakehon ang Partido.

Sa kahublagan nga edukasyon sa Marxismo-Leninismo, ang mga pagtuon magaanod sang pag-analisa sang moderno nga rebisyunismo kag

mga sinulatan ni Mao Zedong sa teorya kag praktika sang padayon nga pagrebolusyon sa idalum sang proletaryo nga pagpamuno agud makonsolida ang sosyalismo, mapamatukan ang moderno nga rebisyunismo kag maupangan ang pagbalik sang kapitalismo. Ginasulong sang Partido ang iya komprehensibo nga panindugan para sa sosyalismo, batuk sa moderno nga rebisyunismo kag dala ang maalikaya nga buwas-damlag sang sosyalismo kag komunismo batuk sa monopolyo kapitalismo.

k. Kumprontahon ang malapyudal kag malakolonyal nga kinaiya sang katilingban Pilipino!

Ang pagpabilin sang malapyudal kag malakolonyal nga kinaiya sang katilingban nga Pilipino tuman kaathag. Ini isa ka katilingban nga ginaharian sang daku nga kumprador burgesya kag sang sahi nga agalon nga mayduta sa serbisyo sang dumuluong nga monopolyo kapitalismo. Ang ekonomya sini agraryo kag wala sang mga basehan nga industriya. Ang manupaktura sini nga nagasalig-sa-import kag may manubo nga dugang nga balor para sa lokal nga konsumo ukon liwat i-eksport, maluya kag nagakapukan.

Ginasikway kag ginatadlong sang kahublagan sa pagpanadlong ang linya nga ginaduso sang mga “Nawala ” kag Tuo nga oportunistang halin sang ulihi nga bahin sang dekada 1970. Ginahatagan nila kredito ang rehimen US, IMF-World Bank kag mga dumuluong nga multinasyunal, sa ginasilang nila nga industriyalisasyon kag urbanisasyon sang Pilipinas, tubtub sa punto, suno sa mga oportunistang, nga ang teorya kag istrategikong linya sang malawigan nga inaway banwa daan na kag ginakinahanglan sang pagpapino, pagpasanto sa mga pagbag-o. Ang sala nga paglaragway sa katilingban nga Pilipino ang nagpahamtang sang basehan sa "Wala" nga oportunistang linya sang “SCO” kag “regularisasyon” nga nagkumbina sang insureksyunismong urban kag adbenturismong militar; subong man, sang Tuo nga oportunistang linya sang repormismo nga nakasandig sa syudad. Sa subong, ginbuyagyag na sang duha ka tipo sang oportunistang ang ila kaugalingon bilang maki-tuo nga kontra-rebolusyonaryo, nga nagasakdag sang iskema sang rehimen US-Ramos nga lupigon ang rebolusyonaryo nga kahublagan kag himuon nga “newly industrializing country” (amo pa lang naga-industriyalisa nga pungsod) ang Pilipinas antes ang tuig nga 2000. Tuman kaathag subong nga wala ginhimo nga industriyalisado sang rehimen US-Marcos ang Pilipinas, gani subong

naman nagapusta ang mga oportunistang sa rehimen US-Ramos agud maagum ang industriyalisasyon.

Tuman ka malahalon nga husto nga malaragway ang kinaiya sang katilingban Pilipino bangud ginalatag sini ang basehan sang husto nga pangkabilugan nga linya sang rebolusyonaryo nga kahublagan. Ang padayon nga krisis sang malakolonyal kag malapyudal nga katilingban pareho sang Pilipinas nagakinahanglan sang istrategikong linya sang malawigan nga inaway banwa. Ginasakdag sang kahublagan sa pagpanadlong ang pagtuon sa padayon nga pangkatilingban nga pag-analisa nga ginhimo sang Partido sadtong 1968-1970, nga ginpadayon tubtob sa 1982 kag sa subong, direkta nga nagabanggi sa mga paltik nga pahayag sang mga manuglibod sang “*official development theory*” (teorya sang upisyal nga pagpauswag), dependyente nga kapitalismo, rebisyunismo, kag iban pa.

d. Ipatuman ang pangkabilugan nga linya sang bag-ong demokratikong rebolusyon!

Tuyo sang pangkabilugan nga linya sang bag-ong demokratikong rebolusyon nga makumpleto ang paghimakas sang pumuluoyong Pilipino para sa pungsudnon nga kahilwayan kag demokrasya. Bag-o ini bangud ginapamunuan sang proletaryado kag indi sang burgesya. Ini ang una nga halintang sang rebolusyon Pilipino nga magapadulong sa masunod nga halintang sang rebolusyon nga sosyalista. Ang mga rebolusyonaryong pwera nga magapatuman sang una nga halintang, ang pareho nga pwera man nga magaupisa sang ikaduha nga halintang sa idalum sang pagpamuno sang sahing mamumugon.

Ginasaway kag ginasiway sang kahublagan sa pagpanadlong ang oportunistang nga linya nga nagpaidalum sang proletaryado sa burgesya. Ginatinguhaan sang mga oportunistang nga paluyahon ang makasahi nga pagpamuno sang proletaryado paagi sa paggamit sang mga argumentong petiburges agud mapabilin kag mapadaku ang interes sang daku nga burgesya kag sahi nga agalon nga mayduta. Ginpalawig kag ginpalus-aw nila ang pungsudnon demokratiko nga programa kag ginduso ang ideya sang pagtukod sang isa ka kuno pungsudnon-demokratiko nga estado kag pungsudnon-demokratiko nga ekonomya pagkatapos maagaw sang mga rebolusyonaryong pwera ang gahum pangpulitika.

Ang rebolusyonaryo nga linyang makasahi sang Partido amo ang: kaptan ang makasahi nga pagpamuno sang proletaryado, magsalig pangunahon sa alyansa sang mamumugon-mangunguma, buyukon sa aton nga bahin ang petiburgesyang sa syudad agud mangin basehan nga pwersa sang rebolusyon, buyukon man sa aton bahin ang nahanunga nga burgesyag agud mangin positibo nga pwersa sang rebolusyon kag gamiton ang mga kontradiksyon sa kubay sang dalagku nga burgesyag kag reaksyunaryo nga agalon nga mayduta agud mahamulag kag mapusa ang gahum sang pinaka-reaksyunaryo nga paksyon sa ano man nga natalana nga panahon. Sa pag-agaw sang gahum pangpulitika, nakumpleto na sa basehan ang bag-ong demokratiko nga rebolusyon kag sugdan na ang rebolusyon sosyalista.

e. Tukuron ang Partido bilang taliba nga pwersa sang proletaryado kag sang pumuluyo!

Sa panahon sang moderno nga imperyalismo kag proletaryo nga rebolusyon, ang sahi nga mamumugon walay duda nga pinaka-produktibo kag pina-kaprogresibong pwersa sa Pilipinas kag sa kalibutan. Base sa obhetibo nga kahimtangan kag malawig na nga inagihan sa rebolusyonaryong paghimakas, ini ang sahi nga ginatalana nga magpamuno sa bag-ong demokratiko kag sosyalista nga halintang sang rebolusyon nga Pilipino. Ang abanse nga ditatsment sang proletaryado amo ang Partido Komunista sang Pilipinas. Ini ang nagapamuno nga pwersa sang proletaryado kag bug-os nga pumuluyong Pilipino sa bag-ong demokratikong rebolusyon sa konteksto sang proletaryo-sosyalista nga rebolusyon kag indi sang pangkalibutan nga burges kapitalista nga rebolusyon.

Lubos nga ginasikway sang kahublagaan sa pagpanadlong ang pamensaron nga ang rebolusyonaryong paghimakas para sa pungsudnon nga kahilwayan kag demokrasya batuk sa imperyalismo, pyudalismo kag burukrata kapitalismo mapadaog nga wala sang makasahi nga pagpamuno sang proletaryado. Ang subong sini nga pamensaron lihis sa kasaysayan sang petiburgesyag sa ila pagkasunud-sunuran (kooptasyon), sa duwahan nga kinaiya sang nahanunga nga burgesyag, sa ila pagkamaluya kag kawawad-an sang basehan nga industriya, kag sa hugot nga paghimbunanay sang dalagku nga burges kumprador kag sahing agalon nga mayduta sa mga imperyalista sa pagpamigos kag pagpanghimulos sa pumuluyong Pilipino. Kabaliskad man ini sa gilayon nga kasaysayan kag subong nga sirkumstansya nga nagapakita nga ang pungsudnon-

demokratiko nga kahublagan isa na ka mabaskog nga pwersa bunga sang pagtilaw, napamatud-an kag padayon nga pagpamuno sang sahi nga mamumugon paagi sa taliba sini nga Partido, ang Partido Komunista sang Pilipinas. Ginapamatukan sang kahublagan sa pagpanadlong ang mga oportunistang nangin manuglibod sang burges nga pluralismo kag anti-komunismong Gorbachov, ang mga masupog nga nagapamatok sa taliba nga papel sang sahing mamumugon kag mga ispesyal nga ahente sa psywar sang burgesya kag subong nga nagaharing sistema.

Ginapursiger sang kahublagan sa pagpanadlong ang prinsipyo sang taliba nga papel sang proletaryado paagi sa Partido Komunista sang Pilipinas. Ang pagkagaruk sang pila ka yabi nga kadre sang Partido sa nagligad, nga naglab-ot tubtub sa sa punto sang pag-atake sa taliba nga papel sang sahing mamumugon, nagatum-ok sa malala nga kakulangan sa pang-ideolohiya kag pangpulitika nga edukasyon sa sulod sang Partido. Katuyuan gani sang kahublagan sa pagpanadlong ang tanan-nga-bahin nga pagpabaskog sa Partido sa ideolohiya, pulitika kag organisasyon, agud padayon ini nga mangin abanse nga ditatsment sang nagapamuno nga sahi sa rebolusyon Pilipino.

g. Isulong ang malawigan nga inaway banwa kag ilunsar ang malaparan kag dasok nga pagpakig-away gerilya sandig sa padayon nga paglapad kag pagdalum sang baseng masa!

Ang teorya kag istrategikong linya sang malawigan nga inaway banwa nagakahulugan nga dapat likupan sang hangaway sang banwa ang mga syudad halin sa kaumhan kag magtipon sang kusog sa kaumhan tubtob sa masarangan sini nga agawon ang gahum pangpulitika sa mga syudad. Ang malawigan nga inaway banwa amo ang rebolusyonaryo nga proseso sang pag-agaw sang gahum sandig sa bagong-demokratiko nga linya. Isa ini ka rebolusyonaryo nga pangmasang pagtinguha. Sa proseso sang inaway banwa, ginatukod sang Partido ang alyansa sang mamumugon-mangunguma. Ginapatuman sini ang rebolusyonaryong reporma sa duta kag balay ang baseng masa sa dagway sang mga organisasyon pangmasa kag mga organo sang gahum pangpulitika. Indi makapreserbar kag makatipon sang kusog ang hangaway sang banwa kon wala ini sang mapag-on nga pundasyon sa partisipasyon kag suporta sang masa nga ginbunga sang lubos nga hilikuton pangmasa kag solido nga pag-organisa. Ang hangaway sang banwa mismo isa ka armado nga organisasyon pangmasa sa idalum sang absolutong pagpamuno sang Partido.

Hugot nga ginapamatukan kag ginakondena sang kahublagan sa pagpanadlong ang "Wala" nga oportunistang linya nga nagkumbina sang adbenturismong militar kag insureksyunismong urban. Ini ang naghatag sang pinakamalala nga kahalitan sa Partido kag sa rebolusyonaryong kahublagan sa bug-os nga kasaysayan nila. Ginbutang sini sa hamulag kag pasibo nga pusisyon ang wala-sa-panahon nga pagpadaku nga mga pormasyon militar kag nangin kabangdanan sang tuman nga paggamay sang baseng masa kag daku nga pagbuhin sang mga armado nga taktikal nga opensiba. Ginhimo sini nga bulnerable ang Partido kag rebolusyonaryong kahublagan sa istratihikong opensiba kag taktika nga "gradual constriction" sang kaaway. Nagpadulong ini sa pagbase sa syudad sang "general command" sang hangaway sang banwa kag sa pamensaron nga magsalig sa dumuluong nga suportang militar. Sala nga ginpresentsar sini ang dumuluong nga ayuda militar bilang krusyal nga sangkap, nga kon wala ini, magaus-os ukon mahimo mapundo ang rebolusyonaryong kahublagan. Nagbunga man ini sang mga kahalitan pareho sang mga madugo nga "witchhunt" kag gangsterismo. Ang mga indi magtadlong nga "Wala" nga oportunistang napaslawan kag nagwaslik indi lamang sa Tuo nga oportunistang pusisyon, kundi sa pinakamalala, sa pagkakantra-rebolusyonaryo nga ahente sang rehimeng US-Ramos.

Resulta sang kahublagan sa pagpanadlong, may panibag-o nga pagkatag sang pwersa sang hangaway sang banwa. May kasarangan-kadaku nga sentro-de-grabidad nga ginabug-os sang mas o menos 30% sang kabilugan nga isip sang Pulang hangaway sa tagsa kag prenteng gerilya. Ang mayorya sang Pulang hangaway subong nakadeploy sa mas malapad nga sakop agud makahulag sa mas daku nga isip sang munisipalidad kag makahimo sang matutom nga hilikuton pangmasa agud mapalapad kag makonsolida ang baseng masa. Ang may kalaparon nga mga areya nga temporaryo nadula ginarekober na subong kag may bag-o nga lugar pa nga ginabuksan bilang pagpasangkad sang rebolusyonaryo nga hilikuton. Ang subong nga linya amo ang paglunsar sang dasok kag malaparan nga gerilya nga pagpakig-away sa basehan sang nagapalapad kag nagapadalam nga baseng masa. Ginapatuman sang Partido ang minimum nga programa sa reporma sa duta kag nagatukod sang baseng masa sa nagapalapad nga sakop. Ginakoordina sini ang armado nga paghimakas nga nakabase sa kaumahan bilang prinsipal nga porma sang paghimakas, kag ang nakabase sa syudad nga ligal nga demokratiko nga kahublagan pangmasa bilang sekundaryo apang malahalon kag ginakinahanglan nga porma sang paghimakas. Ang organisasyon sang

Partido sa syudad determinado subong nga magpadala sang nagapadamo nga isip sang kadre kag katapu sang Partido sa kaumhan.

h. Sakdagon ang rebolusyonaryo nga linya nga makasahi sa nagahiliugyon nga prente!

Ang rebolusyonaryong linya nga makasahi sa nagahiliugyon nga prente indi tuhay sa makasahi nga linya sa kabilugan sang bag-o nga demokratiko nga rebolusyon sang gin-paathag na sadto. Mahimo itib-ong ang nagahiliugyon nga prente, may ara ukon wala man ini sang porma pang-organisasyon. Sa maayo nga palad, madamo na sang inagihan ang Partido sa pagtukod sang mga pormal nga organisasyon pang-nagahiliugyon nga prente sa ligal kag ilegal nga pamaagi. May mga alyansa nga nakabase sa mga makasahi kag sektoral nga interes ukon sa pila ka mga malahalón nga isyu sa ligal nga kahublagan nga demokratiko. Halin 1973, ara na ang likum nga Pungsudnon Demokratiko nga Prente. Pinainportante sa tanan nga mga alyansa ang basehan nga alyansa sang sahing mamumugon kag sahing mangunguma. Sa pagtukod sang ini nga alyansa, ginasakdag sang Partido ang kontrapyudal nga linyang makasahi, sa diin pangunahon nga ginasaligan sang proletaryado ang mga imol kag manubo-nga-nahanunga nga mangunguma kag mga mamumugon sa uma, ginabuyok ang iban pa nga nahanunga nga mangunguma, ginanyutralisa ang mga manggaranon nga mangunguma, ginapanginpuslan ang mga kontradiksyon sa tunga sang mga naathagan kag malaut nga agalon nga mayduta agud mahamulag kag mawasak ang gahum sang mga despotiko nga agalon nga mayduta. Halin 1969, ang linyang makasahi nga ini ang ginasanod sa pagtukod sang mga organo sang gahum pangpulitika sa kaumhan.

Hugot nga ginakondena kag ginapamatukan sang kahublagan sa pagpanadlong ang mga pagtinguha sang mga sadto “Nawala” kag Tuo nga oportunistista sa sulod sang Partido nga subong hayagan na nga Natuo nga kontra-rebolusyonaryo agud likidahon ang makasahi nga pagpamuno sang proletraryado kag waskon ang basehan nga alyansa sang proletaryado kag sahing mangunguma, nga amo ang pundasyon sang rebolusyonaryo nga nagahiliugyon nga prente. Ginasaway kag ginasikway sang kahublagan sa pagpanadlong ang serye sang mga Tuo nga oportunistista nga pagtinguha nga likidahon ang nagapamuno nga papel sang sahi nga mamumugon sa nagahiliugyon nga prente, umpisa sa 1980 nga konsepto sang “taliba nga prente”, pakadto sa 1985 kag 1987 nga desisyon nga itransporma ang NDF

bilang isa ka “pederasyon” ukon “kumpederasyon”, sa diin ginapabuhian sa Partido ang papel sini bilang sentro sang rebolusyon, tubtob sa 1990 nga pagtinguha nga maitransorma ang NDF bilang isa ka magumon nga pederasyon sang mga miembrong-organisasyon kag mga indibidwal, sa diin ginaampo sang Partido ang nagapamuno nga papel sini sa rebolusyon kag ang independensya kag inisyatiba sini kag ginapaidalum ang Partido sa isa ka sistema sang piniliay sa diin nagaluntad na ang pat-ud nga mayorya sang petiburgis nga mga hubon kag indibidwal nga nagaimponer diri sang burgis nga nasyunalismo, pluralismo kag *mixed economy* (salamo nga ekonomya).

Gina-aplikar sang kahublagan sa pagpanadlong ang pagpaathag sang Partido sa mansig-nila papel kag sa husto nga mga relasyon sang Partido, Bag-ong Hangaway sang Banwa, kag Pungsodnon nga Demokratikong Prente sandig sa husto nga rebolusyonaryo nga linyang makasahi. Ginatum-ukan sini ang prinsipyo sang pagpatuman sang pagpamuno sang sahi nga mamumugon sa nagahiliugyon nga prente. Sa ngalan sang proletaryado kag bug-os nga pumuluyo, uyat sang Partido ang rebolusyonaryo nga armado nga paghimakas kag nagahiliugyon nga prente bilang mga hinganiban sang rebolusyonaryong kahublagan. Uyat sini ang independensya kag inisyatiba sa ano man nga tipo sang areglo sa nagahiliugyon nga prente kag ginasakdag sini ang pagsulundan para sa konsensus sa kubay sang mga magkaalyado nga organisasyon, kabaylo sa isa ka sistema sang piniliay sa diin ang mga indi-proletaryo nga hubon may sigurado na nga mayorya.

i. Sundon ang prinsipyo sang demokratiko sentralismo!

Ang demokratiko sentralismo ang basehan nga prinsipyo pang-organisasyon sang Partido. Sentralismo ini nga nakabase sa demokrasya kag demokrasya nga nakabase sa sentralisado nga pagpamuno. Indi na nga kinahanglan nga liwaton diri ang tanan nga mga probisyon sang Konstitusyon sang Partido nahanungod sa demokratiko sentralismo. Pero, pabay-an ninyong ipunto namon nga ang demokratiko sentralismo wala lang nagapatungod sa demokratiko kag kolektibo nga proseso sang pagdesisyon. Kon amo lang sini, tani wala na sang kinatuhay sa tunga sang Partido kag sang isa ka korporasyon pangnegosyo ukon pangrelihiyoso. Ang esensya sang sentralismo sa Partido amo ang komitment sini sa mga basehan nga Marxista-Leninista nga prinsipyo kag polisiya nga maathag nakasaad sa Konstitusyon kag Programa sang Partido. Ang demokrasya

amo ang pamaagi kon sa diin ang esensya sang sentralismo nakasuklob sa kongkreto nga praktika sang rebolusyon, kag sa diin ang diyalektiko nga relasyon ukon pagpakig-angtanay nagakatabo sa tunga sang sentral nga pamunuan kag sang pangkabilugan nga katapuan sang Partido paagi sa mga napilian nga nagatiglawas nga organo sang pamunuan.

Ginapamatukan kag ginasiway sang kahublagan sa pagpanadlong ang mga pamensaron katulad sang mga masunod: nga ang pagtuon sa mga basehan nga prinsipyo sang Partido nagakahulugan sang “pundamentalismo” (ano man ang buot silingon sini), nga kinahanglan may “demokratiko nga pluralismo” sa baylo nga demokratiko sentralismo kag ang mga anti-komunista mahimo mangin katapu sang Partido, nga ang paganalisa sa mga katapu sang Partido isa ka “ingkwisisyon”, nga ang mga paksyon sa Partido, ang mga “kawkus” kag “awtonomong mga hubon ” nila mahimo tugtan, nga ang mga atake nga publiko batuk sa Partido sang mga nagasiling nga katapu kuno sila sang Partido wala nasakop sang disiplina sang Partido kag ang mga ini lehitimo kag demokratiko. Halin 1992 kag, nauna na, sa mas manubo pa nga lebel, ang mga sadto “Nawala” kag Tuo nga oportunistang elemento nagganyat sang ultrademokrasya. Ginapamatukan sang Partido ang burukratismo kag ultrademokrasya. Kada isa sini sa ila may isa-ka-bahin nga salot; ang isa amo nga basta na lang magdikta halin sa mataas kag ang isa pa amo ang tiraniya sang mga manugdumog. Ang nangin mga Tuo nga kontra-rebolusyonaryo amo ang pinakamasupog nga nagahimo sang subong sini sa bug-os nga kasaysayan sang Partido.

Sa kahublagan sa pagpanadlong, lubos nga ginapaathag sang Partido ang kahulugan sang demokratiko sentralismo. Ginapakita sini kon paano nahimo ang mga dokumento sang rektipikasyon, kon paano gindesisyunan, kon paano ginapatuman kag kon paano labi pa nga ginapamanggad ang mga ini. Tanan nga mga manubo nga organo kag organisasyon sang Partido ginabuyok nga maghimo sang dugang pa nga mga pagsuma kag pagsaway kag pagsaway sa kaugalingon. Tanan nga mga kadre kag katapu sang Partido ginabuyok magpartisipar sa mga pagdesisyon kag pagsaway kag pagsaway-sa-kaugalingon. May mga dulunan ang disiplina kag sa sulod sang mga dulunan nga ini may pangsulod nga demokrasya sa Partido agud gani maseguro nga ang disiplina impormado kag naathagan. Dapat permi nga ginahatagan sang igtalupangod sang Partido ang paghiliusa, pagka-solido kag seguridad sang Partido bilang isa ka kinahanglanon sa rebolusyonaryo nga paghimakas. Sa

sulod sang Partido, may diyalektiko nga relasyon sa tunga sang disiplina kag kahilwayan.

1. Lantawon ang sosyalista nga rebolusyon!

Walay pulos ang paglunsar sang pungsudnon-demokratiko nga rebolusyon subong kon wala sang sosyalista nga perspektiba. Una sa tanan, indi mapadaog ang pungsodnon-demokratikong rebolusyon kon ang mga paktor nga nagatugot sa sosyalista nga rebolusyon wala nagaluntad sa proseso sang pungsudnon-demokratiko nga rebolusyon. Ang mga paktor agud madala ang pumuluyo sa halintang sang sosyalista nga rebolusyon amo ang makasahi nga pagpamuno sang proletaryado paagi sa Partido, ang hangaway sang banwa bilang pangunahon nga sangkap sang gahum pang-estado sa idalum sang absolutong pagpamuno sang Partido, ang makasahi nga diktadurya sang proletaryado sa tugas sang demokratiko nga pungsod nga porma sang gubyrno, kag ang basehan nga rebolusyonaryong alyansa sang sahing mamumugon kag sahing mangunguma bilang pundasyon sang nagahiliugyon nga prente. Sa malip-ot nga pulong, ara sa kamot sang sahing mamumugon kag rebolusyonaryong partido sini ang gahum agud maumpisahan ang sosyalista nga transpormasyon. Sa pag-agaw sang gahum pangpulitika sa pungsudnon nga sakop, nakumpleto na sa basehan ang pungsudnon-demokratiko nga rebolusyon kag maumpisahan na ang sosyalista nga rebolusyon. Matukod ang sosyalista nga sektor sang mga talapuanan nga pang-estado kag mga kooperatiba, bisan pa may mga temporaryo nga konsesyon sa mga nagabungkal sang kaugalingon nga duta kag sa mga petiburgis kag nahanunga nga burgesya.

Sa atubang sang pagpukan sang mga rebisyunista nga nagapamuno nga partido kag rehimen sa pila ka pungsod kag ang nagapadayon nga pagkagaruk sang mga ini sa iban pa nga pungsod, ginaway kag ginakondena sang kahublagan sa pagpanadlong ang moderno nga rebisyunismo kag ginasadag sini ang sosyalismo. Ginapamatukan sini ang mga opensiba sa ideolohiya kag pulitika sang mga imperyalista kag ang mga reaksyunaryo nga sala nga nagalaragway sa sosyalismo agud tiplangon ang pumuluyo. Sa ubay sang teorya ni Mao nahanungod sa nagapadayon nga rebolusyon sa idalum sang diktadurya sang proletaryado, absoluto nga kinahanglan nga tun-an sang Partido ang mga proseso kag kadalag-an sang duha ka-halintang nga rebolusyon sa kasaysayan sang pangkalibutanon nga kahublagan nga komunista, kag ang ginhimo sang mga moderno nga rebisyunista nga pag-uk-ok kag pagbaliskad sang mga

ini. Ang Marxismo-Leninismo-Kaisipan Mao Zedong nagahatag sa aton sang basehan kag lubos nga pagsalig para sa kadalag-an sang paghimakas sa monopolyo-kapitalismo kag reaksyon, para sa pag-agom sang sosyalismo kag, sa kadugayon, sang komunismo.

Ginakinahanglan ang pagpalawig sang teoretikal nga pagtuon nga ginsulong sang kahublagan sa pagpanadlong tubtob sa sa paghangup nga ang mga pungsudnon-demokratiko kag sosyalista nga rebolusyon pat-ud liwat nga magamadlos, kag ang teorya kag praktika ni Mao sa nagapadayon nga rebolusyon sa idalum sang diktadurya sang proletaryado isa ka daku nga kaban para sa pagkonsolida sang sosyalismo, pagpamatok sa rebisyunismo kag pag-upang sa pagpanumbalik sang kapitalismo sa masunod nga panahon nga ang mga sosyalista nga katilingban liwat matukod sa mas malapad nga sakop sa ibabaw sang duta.

m. Isulong ang rebolusyon Pilipino sa ispiritu sang proletaryo nga internasyunalismo!

Ang bag-ong demokratikong rebolusyon sa Pilipinas subong ara sa unahan sang rebolusyonaryo nga paghimakas sang proletaryado kag pumuluyo sa kalibutan batuk sa imperyalismo, moderno nga rebisyunismo kag reaksyon. Isa ini sa pila lang subong ka rebolusyonaryo nga kahublagan nga ginapamunuan sang Marxista-Leninista nga partido, may mapuslanon nga kabaskugon kag, labi sa tanan, nagalunsar sang armado nga rebolusyonaryo nga proseso para sa pagpukan sang mga imperyalista kag mga lokal nga reaksyunaryo. Tambaling papel ang ginatungdan sang rebolusyon Pilipino sa pagdala sang sulo sang armadong rebolusyon sa kalibutan samtang ang mas lapnagon nga armado nga pagrebolusyon sa kalibutan manug-abot pa lang. Muklat ang Partido sa iya internasyunalista nga katungdanan sa pagpamuno sa armado nga rebolusyon. Dapat ini nga ipabugal. Apang ang ini nga katungdanan nagapangayo sang matutom nga pagtrabaho kag ispiritu sang pagpakasakit kag pagka-mapainubuson sa atubang sang mga dalagku nga upang kag nagapadaku nga pagtinguha sang mga imperyalista kag reaksyunaryo nga tutukan ang rebolusyon Pilipino sa katuyuan nga waskon ini.

Ginakondena kag ginasikway sang kahublagan sa pagpanadlong ang kontra-rebolusyonaryong linya nga ang pumuluyong Pilipino ginakapoy na sa ila pagpangapin sang kaugalingon batuk sa walay untat nga kalakasan sang mga imperyalista kag makasahi nga pagpamigos kag

pagpanghimulos, subong man ang linya nga ang PKP kag ang NDF dapat magsunod sa kon ano ang uso kag sikat subong sa kalibutan, ang kapitulasyon sa kaaway. Napaslawan sa pagduso sang ila linya sang pagkumbinar sang adbenturismong militar kag insureksyunismong urban kag sa pag-angkon sang dumuluong nga ayuda-militar kag ayuda-pinansyal, ang mga nagapanguna nga "Wala" nga oportunistang nagligad nangin mga Tuo nga kontra-rebolusyonaryo na kag amo ang pinakaaktibo subong sa pagpalapta sang makasuluka nga linya sang kapitulasyunismo kag repormismo. Sila subong ang nakahanay sa mga madugay na nga nagapanguna nga Tuo nga oportunistang, nga malawig na nga nagbuyagyag sang ila kaugalingon bilang daan na nga mga anti-komunista kag may ara lang sangkapudyot nga kinaalam nahanungod sa Pulang gahum pangpulitika sa kaumhan. Ang mga Tuo nga kontra-rebolusyonaryo nga ini nagakuha sang pinansya halin sa mga dumuluong nga ahensyang pampinansya para sa pagpalapta sang linya nga anti-komunismo, kontra-Stalinismo, repormismo kag kapitulasyunismo.

Para sa pinakapektibo nga pagpatuman sang iya internasyunalista nga katungdanan, ang Partido padayon nga nagapabaskog sang kaugalingon, nagalunsar sang malawigan nga inaway banwa kag nagatukod sang mga organisasyon pangmasa kag mga organo sang gahum pangpulitika sa basehan nga makatindog-sa-kaugalingon. Wala sang pamaagi nga mahimo mawasak sang kaaway ang rebolusyonaryo nga kahublagan bangud sa nagalala nga krisis sang lokal nga nagahari nga sistema kag pangkalibutanon nga sistemang kapitalista. Kadungan sini, ang Partido aktibo nga nagapakigbuligay sa iban pa nga Marxista-Leninista nga partido kag pormasyo nga pre-partido sa luwas sa pagpalapnag sang teroya kag praktika sang Marxismo-Leninismo-Maoismo, kag sa iban pa nga mga entidad batuk sa imperyalismo kag tanan nga reaksyon para sa liwat nga magdaluyong ang kahublagankontra-imperyalista kag sosyalista sa bug-os nga kalibutan. □

Mga Repirensya:

1. Ubay para sa mga Kadre kag Katapu sang Partido
2. "Pahayag sa Ika-20 nga Anibersaryo sang Partido Komunista sang Pilipinas"

3. "Pahayag sa Ika-25 nga Anibersaryo sang Partido Komunista sang Pilipinas"
4. (Maxismo-Leninismo-Kaisipang Mao Zedong Bilang Ubay sa Rebolusyong Pilipino)
5. Liwat nga Palig-unon ang Pagkapot sang Sandigan nga Prinsipyo sang Partido kag Tadolong ang mga Kasaypanan
6. Pangkabilugan nga Pagbalik-tuon sa mga Malahalon nga Hitabo kag Disisyon (1980-1991)

Ang mga Dokumento sang Ikaduha nga Dungganon nga Kahublagan sa Pagpanadlong

Ginalakip ang listahan sang mga sandigan nga dokumento sang Ikaduha nga Dungganon nga Kahublagan sa Pagpanadlong bilang rekisito nga balasahon kag repirensya sa pagtalakay sang topiko Ang Partido.

Ang mga dokumento sang Ikaduha nga Dungganon nga Kahublagan sa Pagpanadlong amo ang rekisito nga mga pagtulun-an kaangut sa kasaysayan sang aton Partido kag pagtukod sini sa ideolohiya, pulitika kag organisasyon. Indi mangin lipas ang importansya sang mga ini pagkatapos sang Ikaduha nga Dungganon nga Kahublagan sa Pagpanadlong, tigaylo magapadayon bilang kabahin sang mga sandigan nga ubay nga dokumento para sa matutom nga pagtukod sang aton Partido sa ideolohiya, pulitika kag organisasyon.

Ang mga balasahon kaangut sa Ikaduha nga Dungganon nga Kahublagan sa Panadlong amo ang mga masunod:

A. Pagsuma sang Partido

Liwat Palig-unon ang Pagkaput ang Sandigan nga Prinsipyo sang Partido kag Tadlungon ang mga Kasaypanan

Pangkabilugan nga Pagbalik-tuon sa mga Malahalon nga Hitabo kag Disisyon (1980-1991)

Pahayag sa Ika-25 Anibersaryo sang liwat nga pagtukod sang Partido Komunista sang Pilipinas (Disyembre 26, 1993)

Pila ka Pinili nga resolusyon sang Ika-10 Plenum sang KS, KPKS kag KTKS

B. Linyang Anti-rebisyunista

Manindugan Para sa Sosyalismo Batuk sa Moderno nga Rebisyunismo

Mga Tesis sang Partido Komunista sang Pilipinas Para sa Kumperensya Internasyunal sang mga Partido kag Organisasyon nga Marxista-Leninista, Hunyo 1992.

Mga Tesis sa Sitwasyon sang Kalibutan (Ginsumiter sang delegasyon sang Partido Komunista sang Pilipinas sa Ikaapat nga Kumperensya sang Kumperensya nga Internasyunal sang mga Partido kag Organisasyon nga Marxista-Leninista)

K. Batuk sa mga kontra-rebolusyonaryo nga traidor

Disisyon sa pagpahalin

Pagbuyagyag sa mga salabton sa IPO kag salabton kriminal sang mga pasimuno sa tudo-larga nga kampanyang anti-Partido

Sa idalom ang balayon sang pang-ayuda nga mga pamangkot kag mga nagapanguna nga punto nga dapat mahatagan sang atensyon sa pagbasa kag pagtuon sa mga sandigan nga dokumento sang Ikaduha nga Dunganon nga Kahublagan sa Pagpanadlong.

1. Ano ang mga yabi nga halambalanon sa pagsuma kag kahublagan sa pagpanadlong?

Yabi nga halambalanon sa pagsuma kag kahublagan sa pagpanadlong ang linya sa ideolohiya, pulitika kag organisasyon. Diri nakasandig ang kabuhi sang Partido bilang abanse nga ditatsment sang sahing mamumugon kag ang husto nga pagpamuno sini asta sa kadalag-an sang duha-ka-halintang nga rebolusyon.

2. Paano napundar sang Partido ang mga sandigan nga prinsipyo nga ini? Ano ka malahalon ang mga ini sa rebolusyonaryo nga pagsulong?

- a. Balik-tun-an sa kasaysayan kon paano nasalapan sang sahing mamumugon ang MLKMZ kag ginlatag ang mga sandigan nga prinsipyo kag husto nga linya sang aton Partido.

- b. Ipakita ang mga kadalag-an nga naagum sang aton Partido halin sadtong liwat gintukod ini sa ubay sang husto nga linya.

3. Ngaa kinahanglan liwat palig-unon ang pagkaput sang aton mga sandigan nga prinsipyo?

- a. Ano ang mga sandigan nga prinsipyo sang Partido?
- b. Tumuron ang paglutaw sang sala nga linya sa sulod sang Partido halin sadtong ulihi nga bahin sang dekada sitenta kag ang nangin bunga sini nga malubha nga mga kahalitan. Kadungan man, ipakita kon paano natumod, nasaway kag amat-amat na nakambyo sa malig-on kag husto nga rebolusyonaryo nga banas ang Partido.

4. Hangpon ang mga masunod:

Ang pagtukod sang Partido, una sa tanan, amo ang pagtukod sa ideolohiya

- Kon wala sang rebolusyonaryong teorya, wala sang rebolusyonaryong kahublagan.
- Nabalay ang solido nga rebolusyonaryong kusog sa ubay kag pundasyon sang husto nga teorya.
- Malahalon ang malig-on nga pagkaput sa prinsipyo, hugot nga pagkapyot kag wala sang paglisa sa pagtib-ong sang mga istrategiko nga katungdanan samtang pleksible naman sa taktika

Walay untat ang hilikuton pang-ideolohiya sang Partido. Kinahanglan ang pasulit-sulit nga pagpaathag sang aton panindugan, pagpalig-on, pagpamanggaran kag pagpadalom sa paghangup kag pagpatuman sang mga sandigan nga prinsipyo sang aton Partido.

- Nagakadapat nga mangin muklat sa pagremolde samtang ginabago ang kalibutan
- Bilang produkto sang syentipiko nga pagtuon kag paghimakas, angkon sang Partido ang husto nga prinsipyo. Ginaaplikar ang mga prinsipyo nga ini sa reyalidad, kag nangin ubay sa pagremolde sa mga katapu sini. Sa proseso kinahanglan tudo-tudo kag padayon sa pagpamatuk kag pagpangibabaw sa impluwensya sang iban nga sahi sang mga reaksyunaryo. Sa sini, mapat-ud naton ang pagtukod

sang partido nga konsolidado sa ideolohiya, pulitika kag organisasyon.

- Bisan sa pinakamaayo nga tindog sini, ginasalaming sang Partido ang nagaluntad sa katilingban nga banggianay sang sahi, kag ang layi sang indi alalangay nga pagbag-o. Sa proseso sang pagpadalom sang paghangup, pagpamanggaran kag malig-on nga pagtib-ong sa mga rebolusyonaryong prinsipyo, nagaluntad ang banggianay sa tunga sang husto kag sala, sa tunga sang burges kag proletaryo nga panindugan, panan-awan kag pamaagi.
- Ang isa ka Partido nga sa una may husto nga mga prinsipyo, ang mahimo man mag-atras kag mapaslawan kag maggaruk katulad sang mga Lava, mga rebisyunista nga rehimen sa Nasidlangan nga Europa kag Unyon Sobyet kon indi mangin mapangmatyag kag maghimo sang padayon kag tudo-tudo nga hilikuton pang-ideolohiya.
- Kon wala sang subong nga ikaduha nga kahublagan sa pagpanadlong agud ibuyagyag ang bangkarote nga linya sang adbenturismong militar, insureksyunismo, kapityulasyunismo, paksyunalismo, isplitismo kag likidasyunismo, repormismo kag parlamentarismo sang mga opurtunista nga traidor nga ginpamunuan nanday Reyes, Tabara, Kintanar kag Lagman, indi makabangon ang Partido kag ang kahublagan nga rebolusyonaryo sa dalagku nga kahalitan kag malubha nga kahuyangan dala sang mga nagligad nga paglihis.

5. Ano ang moderno nga rebisyunismo kag paano ini nagtuhaw kag nag-uswag?

- a. Ang rebisyunismo amo ang sistematiko nga pagbag-o kag paglihis sa Marxismo, sa mga sandigan nga rebolusyonaryong prinsipyo sang proletaryado nga ginlatag nanday Marx kag Engels kag labi pa nga ginpauswag sang nagsunod nga mga teorista kag lider sa sosyalista nga rebolusyon kag konstruksyon. Ginakabig sang mga rebisyunista ang ila kaugalingon bilang mga Marxista, nagahambal pa gani nga ang ila ginahimo amo ang napanahon kag matinugahon nga pag-aplikar sang Marxismo, apang sa esensya, matam-is nga putos lang nila ini sa burges nga mga ideya nga anti-proletaryo kag anti-Marxista nga ila ginapalpnag.

- b. Ang modernong rebisyunismo katulad man sang klasikal nga rebisyunismo apang natuhay sa una bangud ginatib-ong kag ginapraktika sang mga partido komunista nga ara sa poder nga kontrolado sang mga rebisyunista.
- c. Ang masahi nga basehan sang moderno nga rebisyunismo amo ang burgesya sa sulod sang Partido komunista kag sang sosyalista nga estado. Nagaluntad ini sa katilingban nga sosyalista bisan pa sa panahon nila ni Stalin kag Mao. Ang bag-ong burgesya mabudlay tumuron kag batuan. Apang nagmadinalag-on si Mao nga tumuron kag batuan ini.
- d. Sa tian nga makapangibabaw ang mga rebisyunista batuk sa mga proletaryo nga rebolusyonaryo kag makahari, ginapataw nila sa nagahari nga partido, estado kag pumuluyo ang mga rebisyon sa linya sa ideolohiya, pulitika kag organisasyon.

6. Ano ang teorya ni Mao sang nagapadayon nga rebolusyon sa proletaryong diktadura?

- a. Ginatib-ong sini ang gintudlo ni Lenin nga ang sosyalismo kag proletaryo nga diktadura magaluntad sa isa ka istorikal nga panahon asta malutos ang imperyalismo sa bug-os nga kalibutan kag mangin posible na ang komunismo.
- b. Ang nagapanguna nga kontradiksyon sa katilingban nga sosyalista amo ang sa tunga sang prolertayado kag sang burgesya. Ang bag-o nga burgesya sa sulod sang Partido, estado kag katilingban amo ang isa ka seryuso nga problema nga pagaatubangon sang bug-os nga istoriko nga panahon sang sosyalismo. Ginabuligan sang internasyunal nga burgesya ang bag-o nga burgesya sa katilingban nga sosyalista.
- c. Dapat hilwayon sang sosyalista nga relasyon sa produksyon ang mga pwera sa produksyon (ang naulihi indi nagakadapat magdikta sang pagpabilin ukon sa pag-atras sa relasyon sa produksyon nga nagaluntad antes ang sosyalista nga relasyon sa produksyon).
- d. Ang superistruktura dapat marebolusyunisa kag magpauswag sa moda sang produksyon.
- e. Ang mga kontradiksyon sa katilingban nga madugay na nga natumod halin pa sa ila ni Marx asta kay Stalin dapat nga solbaron. Ang mga ini amo ang kontradiksyon sa tunga sang

kaumhan kag kasyudaran, sa tunga sang agrikultura kag industriya kag sa tunga sang pisikal kag mental nga pagtrabaho; sa tunga sang mga salin sang magagmayan nga produksyon sang balaklunon kag sosyalista nga ekonomya; kag sa tunga sang sosyalista nga rebolusyon kag ang duso sang mga daan nga gawi kag kinaugali.

- f. Sa paglubad sang tanan nga halambalanon, ang rebolusyonaryong pulitika sang proletaryado ang dapat sa kumand kag ang linyang masa ang dapat pursigihan. Tun-an ang linya kag mga pamaagi sa patag sang pulitika, ekonomya, kultura kag relasyon internasyunal.

7. Ano ang kinaiya kag mga kalainan nga dala sang paksyunalismo kag sang todo-larga nga kampanyang anti-Partido nga ginlunsar sang mga kontra-rebolusyonaryo nga traidor?

- a. Hangpon ang kinaiya kag mga kalainan dala sang paksyunalismo kag sang tudo-larga nga kampanyang anti-Partido nga ginlunsar sang mga kontra-rebolusyonaryo nga traidor.
- b. Hangpon ang mga hilo nga ginpalapta sang mga kontra-rebolusyonaryo nga traidor kag ang mga sabat kag pagpaathag nga ginhimo sang aton Partido.

8. ano ang mga nagapanguna nga liksyon sa pagpamatuk kag pagpaslaw sa tudo-larga nga kampanyang anti-Partido nga ginlunsar sang mga kontra-rebolusyonaryong traidor?

Hakson ang importansya sang maathag nga pagguhit sang linya sang pagtuhay sa tunga sang husto kag sala, matalom kag walay pang-alang-alang nga pagbuyagyag sa mga kontra-rebolusyonaryo nga traidor, pagsikway sa sentrismo nga isa ka tipo sang Tuo nga opurtunismo kag nagapabor sa mga kontra-rebolusyonaryo nga traidor kag nagapahuyang sa Partido. #

